

《入楞伽經》CBETA 電子版

版本記錄: 1.2

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 16, No. 671

No. 671 [Nos. 670, 672]

入楞伽經卷第一

元魏天竺三藏菩提留支譯

請佛品第一

歸命大智海毘盧遮那佛。如是我聞。一時婆伽婆住大海畔摩羅耶山頂上楞伽城中。彼山種種寶性所成。諸寶間錯光明赫炎。如百千日照曜金山。復有無量花園香樹皆寶香林。微風吹擊搖枝動葉。百千妙香一時流布。百千妙音一時俱發。重巖屈曲處處皆有仙堂靈室龕窟。無數眾寶所成。內外明徹日月光暉不能復現。皆是古昔諸仙賢聖。思如實法得道之處。與大比丘僧及大菩薩眾。皆從種種他方佛土俱來集會。是諸菩薩具足無量自在三昧神通之力奮迅遊化。五法自性二種無我究竟通達。大慧菩薩摩訶薩而為上首。一切諸佛手灌其頂而授佛位。自心為境善解其義。種種眾生種種心色。隨種種心種種異念。無量度門隨所應度隨所應見而為普現

爾時婆伽婆。於大海龍王宮說法。滿七日已度至南岸。時有無量那由他釋梵天王諸龍王等。無邊大眾悉皆隨從向海南岸。爾時婆伽婆。遙望觀察摩羅耶山楞伽城。光顏舒悅如動金山。熙怡微笑而作是言。過去諸佛應正遍知。於彼摩羅耶山頂上楞伽城中。說自內身聖智證法。離於一切邪見覺觀。非諸外道聲聞辟支佛等修行境界。我亦應彼摩羅耶山楞伽城中為羅婆那夜叉王上首說於此法。爾時羅婆那夜叉王。以佛神力聞如來聲。時婆伽婆離海龍王宮度大海已。與諸那由他無量釋梵天王諸龍王等圍遶恭敬。爾時如來觀察眾生阿梨耶識大海水波。為諸境界猛風吹動。轉識波浪隨緣而起。爾時羅婆那夜叉王而自歎言。我應請如來入楞伽城。令我長夜於天人中。與諸人天得大利益快得安樂。爾時楞伽城主羅婆那夜叉王。與諸眷屬乘花宮殿至如來所。與諸眷屬從宮殿下遶佛三匝。以種種伎樂樂於如來。所持樂器皆是大青因陀羅寶而用造作。大毘琉璃瑪瑙諸寶以為間錯。無價色衣以用纏裹。以梵聲等無量種音。歌歎如來一切功德。而說偈言

心具於法藏	離無我見垢
世尊說諸行	內心所知法
白法得佛身	內身所證法
化身示化身	時到入楞伽
今此楞伽城	過去無量佛
及諸佛子等	無量身受用

世尊若說法 無量諸夜叉
能現無量身 欲聞說法聲

爾時羅婆那楞伽王。以都吒迦種種妙聲。歌歎如來諸功德已。復更以伽他妙聲歌歎如來。而說偈言

如來於七日 大海惡獸中
渡海至彼岸 出已即便住
羅婆那王共 妻子夜叉等
及無量眷屬 大智諸大臣
叔迦婆羅那 如是等天眾
各各悉皆現 無量諸神通
乘妙花宮殿 俱來到佛所
到已下花殿 禮拜供養佛
依佛住持力 即於如來前
自說己名字 我十頭羅刹
願垂哀愍我 及此城眾生
受此楞伽城 摩羅耶寶山
過去無量佛 於此楞伽城
種種寶山上 說身所證法
如來亦應爾 於此寶山中
同諸過去佛 亦說如是法
願共諸佛子 說此清淨法
我及楞伽眾 咸皆欲聽聞
入楞伽經典 過去佛讚歎
內身智境界 離所說名字
我念過去世 無量諸如來
諸佛子圍遶 說此修多羅
如來於今日 亦應為我等
及諸一切眾 說此甚深法
未來諸世尊 及諸佛子等
於此寶山上 亦說此深法
今此楞伽城 微妙過天宮
牆壁非土石 諸寶羅網覆
此諸夜叉等 已於過去佛
修行離諸過 畢竟住大乘
內心善思惟 如實念相應

願佛憐愍故
願佛天人師
夜叉及妻子
聾耳等羅剎
曾供養過去
今復願供養
欲聞內心行
願佛憐愍我
共諸佛子等
我所有宮殿
寶冠諸瓔珞
阿舒迦園林
及所乘花殿
我於如來所
願大牟尼尊
我及諸佛子
願佛垂哀愍
爾時三界尊
即為夜叉說
夜叉過去佛
憐愍夜叉故
未來佛亦爾
為諸夜叉等
夜叉此寶山
現見法行人
夜叉今告汝
憐愍汝等故
如來略答竟
羅婆那羅剎
如來及佛子
羅婆那夜叉
以諸婁女樂
到彼妙城已
及其夜叉妻
更持勝供具

為諸夜叉說
入摩羅耶山
欲得摩訶衍
亦住此城中
無量億諸佛
現在大法王
欲得摩訶衍
及諸夜叉眾
入此楞伽城
妻子及眷屬
種種莊嚴具
種種皆可樂
施佛及大眾
無有不捨物
哀愍我受用
受佛所說法
為我受用說
聞夜叉請已
過去未來佛
此勝寶山中
說內身證法
於此寶山中
亦說此深法
如實修行人
乃能住此處
我及諸佛子
受汝施請說
寂靜默然住
奉佛花宮殿
受已即皆乘
亦自乘華殿
樂佛到彼城
羅婆那夜叉
夜叉男女等
種種皆微妙

供養於如來
諸佛及菩薩
羅婆那等眾
觀察所說法
供養大慧士
大士能問佛
我與夜叉眾
一切諸聽者
大士說法勝
我尊重大士
離諸外道邊
說內法清淨
爾時佛神力
崔嵬百千相
無量億花園
香氣廣流布
一一寶山中
亦有羅婆那
十方佛國土
佛子夜叉王
而此楞伽城
皆悉見自身
如來神力作
諸山及園林
一一山中佛
如來悉為說
出百千妙聲
佛及諸佛子
羅婆那夜叉
在己本宮殿
而作是思惟
說法者為誰
我所見何法
彼諸佛國土
如此諸妙事

及諸佛子等
皆受彼供養
供養說法者
內身證境界
數數而請言
內身行境界
及諸佛子等
咸請仁者問
修行亦最勝
請問佛勝行
亦離二乘過
究竟如來地
復化作山城
嚴飾對須彌
皆是眾寶林
芬馥未曾聞
皆示現佛身
夜叉眾等住
及於諸佛身
皆來集彼山
所有諸眾等
入化楞伽中
亦同彼楞伽
寶莊嚴亦爾
皆有大智問
內身所證法
說此經法已
一切隱不現
忽然見自身
更不見餘物
向見者誰作
是誰而聽聞
而有此等事
及諸如來身
今皆何處去

為是夢所憶	為是幻所作
為是實城邑	為乾闥婆城
為是翳妄見	為是陽炎起
為夢石女生	為我見火輪
為見火輪烟	我所見云何
復自深思惟	諸法體如是
唯自心境界	內心能證知
而諸凡夫等	無明所覆障
虛妄心分別	而不能覺知
能見及所見	一切不可得
說者及所說	如是等亦無
佛法真實體	非有亦非無
法相恒如是	唯自心分別
如見物為實	彼人不見佛
不住分別心	亦不能見佛
不見有諸行	如是名為佛
若能如是見	彼人見如來
智者如是觀	一切諸境界
轉身得妙身	是即佛菩提

爾時羅婆那十頭羅刹楞伽王。見分別心過。而不住於分別心中。以過去世善根力故。如實覺知一切諸論。如實能見諸法實相。不隨他教善自思惟覺知諸法。能離一切邪見覺知。善能修行如實行法。於自身中能現一切種種色像。而得究竟大方便解。善知一切諸地上上自體相貌。樂觀心意意識自體。見於三界相續身。斷離諸外道常見。因智如實善知如來之藏。善住佛地內心實智。聞虛空中及自身中出於妙聲。而作是言。善哉善哉楞伽王。諸修行者悉應如汝之所修學。復作是言。善哉楞伽王。諸佛如來法及非法如汝所見。若不如汝之所見者名為斷見。楞伽王。汝應遠離心意識。如實修行諸法實相。汝今應當修行內法。莫著外義邪見之相。楞伽王。汝莫修行聲聞緣覺諸外道等修行境界。汝不應住一切外道諸餘三昧。汝不應樂一切外道種種戲論。汝不應住一切外道圍陀邪見。汝不應著王位放逸自在力中。汝不應著禪定神通自在力中。楞伽王。如此等事皆是如實修行者行。能降一切外道邪論。能破一切虛妄邪見。能轉一切見我見過。能轉一切微細識行修大乘行。楞伽王。汝應內身入如來地修如實行。如是修行者。得轉上上清淨之法。楞伽王。汝莫捨汝所證之道。善修三昧三摩跋提。莫著聲聞緣覺外道三昧境界以為勝樂。如毛道凡夫外道修行者。汝莫分別。楞伽王。外道著我見。有我相故虛妄分別。外道見有四大之相。而著色聲香味觸法以為實有。聲聞緣覺見無明緣行以為實有。起執著心離如實空。虛妄分別專著有法。而墮能見所見

心中。楞伽王。此勝道法。能令眾生內身覺觀。能令眾生得勝大乘能生三有。楞伽王。此入大乘行。能破眾生種種翳瞶種種識波。不墮外道諸見行中。楞伽王。此是入大乘行。非入外道行。外道行者依於內身有我而行。見識色二法以為實。故見有生滅。善哉楞伽王。思惟此義。如汝思惟即是見佛

爾時羅婆那楞伽王。復作是念。我應問佛。如實行法。轉於一切諸外道行。內心修行所觀境界。離於應佛所作應事更有勝法。所謂如實修行者證於法時。所得三昧究竟之樂。若得彼樂是則名為如實修行者。是故我應問大慈悲如來世尊。如來能燒煩惱薪盡。及諸佛子亦能燒盡。如來能知一切眾生心使煩惱。如來遍至一切智處。如來如實善能知解是相非相。我今應以妙神通力見於如來。見如來已。未得者得已得者不退。得無分別三昧三摩跋提。得增長滿足如來行處

爾時世尊如實照知楞伽王應證無生法忍時至。憐愍十頭羅剎王故。所隱宮殿還復如本。身於種種寶網莊嚴山城中現

爾時十頭羅剎楞伽王。見諸宮殿還復如本。一一山中處處皆見有佛世尊應正遍知三十二相妙莊嚴身而在山中。自見己身遍諸佛前。又見一切諸佛國土及諸國王念身無常由貪王位妻子眷屬五欲相縛無解脫期。便捨國土宮殿妻妾象馬珍寶施佛及僧入於山林出家學道。又見佛子在山林中勇猛精進投身餓虎師子羅剎以求佛道。又見佛子在林樹下讀誦經典為人演說以求佛道。又見菩薩念苦眾生坐於道場菩提樹下思惟佛道。又見一一佛前皆有聖者大慧菩薩說於內身修行境界。亦見一切夜叉眷屬圍遶而說名字章句

爾時世尊智慧觀察現在大眾非肉眼觀。如師子王奮迅視眄呵呵大笑。頂上肉髻放無量光。肩脇腰髀胸卍德處及諸毛孔。皆放一切無量光明。如空中虹如日千光。如劫盡時大火熾然猛炎之相。帝釋梵王四天王等。於虛空中觀察如來。見佛坐於須彌相對楞伽山頂上呵呵大笑。爾時菩薩眾帝釋梵天四天王等作是思惟。何因何緣如來應正遍知。於一切法中而得自在。未曾如是呵呵大笑。復於自身出無量光默然而住。專念內身智慧境界不以為勝。如師子視觀楞伽王念如實行

爾時聖者大慧菩薩摩訶薩。先受楞伽羅婆那王所啟請已念楞伽王。知諸一切大菩薩眾心行之法。觀察未來一切眾生。心皆樂於名字說法。心迷生疑如說而取著於一切聲聞緣覺外道之行。諸佛世尊離諸一切心識之行能笑大笑。為彼大眾斷於疑心。而問佛言。如來何因何緣何事呵呵大笑。佛告聖者大慧菩薩。善哉善哉善哉大慧。復善哉大慧。汝能觀察世間妄想分別之心邪見顛倒。汝實能知三世之事而問此事。如汝所問智者之問亦復如是。為自利利他故。大慧。此楞伽王。曾問過去一切諸佛應正遍知如是二法。今復現在亦欲問我如是二法。此二法者。一切聲聞緣覺外道。未嘗知此二法之相。大慧。此十頭羅剎。亦問未來一切諸佛如此二法

爾時如來知而故問羅婆那王而作是言。楞伽王。汝欲問我隨汝疑心今悉可問。我悉能答斷汝疑心令得歡喜。楞伽王。汝斷虛妄分別之心。得地對治方便觀察。如實智慧能入內身如實之相三昧樂行三昧佛即攝取汝身。善住奢摩他樂境界中。過諸聲聞緣覺三昧不淨之垢。能住不動善慧法雲等地。善知如實無我之法。大寶蓮花王座上而坐。得無量三昧而受佛職。楞伽王。汝當不久自見己身亦在如是蓮花王座上而坐法爾住持。無量蓮花王眷屬無量菩薩眷屬。各各皆坐蓮花王座。而自圍遶迭相瞻視。各各不久皆得住彼不可思議境界。所謂起一行方便行住諸地中。能見不可思議境界。見如來地無量無邊種種法相。一切聲聞緣覺四天王帝釋梵王等所未曾見

爾時楞伽王。聞佛世尊聽已問已。彼於無垢無量光明大寶蓮花眾寶莊嚴山上。無量天女而自圍遶。現於無量種種異花種種異香散香塗香。寶幢幡蓋寶冠瓔珞莊嚴身具。復現世間未曾聞見種種勝妙莊嚴之具。復現無量種種樂器。過諸天龍夜叉乾闥婆阿修羅迦樓羅緊陀羅摩睺羅伽人非人等所有樂具。復隨三界欲界色界無色界。所有樂具皆悉化作。復隨十方諸佛國土。所有種種勝妙樂具皆悉化作。化作無量大寶羅網。遍覆一切諸佛菩薩大眾之上。復豎無量種種寶幢。羅婆那王作如是等變化事已。身昇虛空高七多羅樹。住虛空中。雨種種伎樂雨種種花。雨種種香雨種種衣。滿虛空中如澍大雨。以用供養佛及佛子。雨供養已從上而下。於虛空中即坐第二電光明大寶蓮花王種種寶山上

爾時如來見其坐已發於微笑。聽楞伽王問二種法。時楞伽王白佛言。世尊。此二種法我已曾問過去諸佛應正遍知。彼佛世尊已為我說。世尊。我今現在依名字章句亦問如來。如來畢竟應為我說。世尊。應化化佛說此二法非根本如來。世尊。根本如來修集三昧樂境界者。不說心識外諸境界。善哉世尊。如來自身於一切法而得自在。惟願世尊應正遍知說此二法。一切佛子及我已身亦願欲聞

爾時世尊知而即告楞伽王言。楞伽王。汝問此二法。爾時夜叉王更著種種金冠瓔珞金莊嚴具而作是言。如來常說。法尚應捨何況非法。世尊。云何言二法捨。世尊。何者是法何者非法。世尊。捨法云何有二。以墮分別相中。虛妄分別是有無法無大有大。世尊阿梨耶識知名識相。所有體相如虛空中有毛輪住。不淨盡智所知境界。世尊。法若如是云何而捨。佛告楞伽王。楞伽王。汝不見瓶等無常敗壞之法。毛道凡夫分別境界差別之相。楞伽王。何故不如是取。有法非法差別之相。依毛道凡夫分別心有。非聖證智以為可見。楞伽王。且置瓶等種種相事。毛道凡夫心謂為有。非謂聖人以為有法。楞伽王。譬如一火炎燒宮殿園林草木。見種種火光明色炎各各差別。依種種薪草木長短。分別見有勝負之相。此中何故不如是知有法非法差別之相。楞伽王。非但火炎依一相續身中見有種種諸相差別。楞伽王。如一種子一相續生牙莖枝葉華果樹林種種異相。如是內外所生諸法。無明及行陰界入等一切諸法。三界所生皆有差別。現樂形相言語去來勝智異相。一相境界而取於相。見下中上勝相染淨善不善相。楞伽王。非但種種法中見差別相。覺如實道者內證行中亦有見於種種異相。何況法非法無

分別種種差別相。楞伽王。有法非法種種差別相

楞伽王。何者為法。所謂一切外道聲聞緣覺毛道凡夫分別之見。從因實物以為根本生種種法。如是等法應捨應離。莫取於相而生分別。見自心法計以為實。楞伽王。無瓶實法而毛道凡夫虛妄分別。法本無相。如實知觀名捨諸法

楞伽王何等為非法。所謂無有身相。唯自心滅妄想分別。而諸凡夫見實法非實法。菩薩如實見如是捨非法。復次楞伽王。何者復為非法。所謂兔馬驢駝角石女兒等無身無相。而毛道凡夫取以為無。為世間義說於名字非取相。如彼瓶等法可捨。智者不取如是虛妄分別。兔角等名字法亦是可捨。是故捨法及非法。楞伽王。汝今問我法及非法云何捨。我已說竟

楞伽王。汝言我於過去應正遍知已問此法。彼諸如來已為我說。楞伽王。汝言過去者即分別相。未來現在分別亦爾。楞伽王。我說真如法體是如實者亦是分別。如分別色為實際。為證實智樂修行無相智慧。是故莫分別如來為智身智體。心中莫分別。意中莫取我人命等。云何不分別。意識中取種種境界。如色形相如是莫取。莫分別可分別

復次楞伽王。譬如壁上畫種種相。一切眾生亦復如是。楞伽王。一切眾生猶如草木無業無行。楞伽王。一切法非法無聞無說。楞伽王。一切世間法皆如幻。而諸外道凡夫不知。楞伽王。若能如是見如實見者名為正見。若異見者名為邪見。若分別者名為取二。楞伽王。譬如鏡中像自見像。譬如水中影自見影。如月燈光在屋室中影自見影。如空中響聲自出聲取以為聲。若如是取法與非法。皆是虛妄妄想分別。是故不知法及非法。增長虛妄不得寂滅。寂滅者名為一心。一心者名為如來藏。入自內身智慧境界。得無生法忍三昧

入楞伽經問答品第二

爾時聖者大慧菩薩與諸一切大慧菩薩。俱遊一切諸佛國土。承佛神力從坐而起更整衣服。合掌恭敬以偈讚佛

佛慧大悲觀	世間離生滅
猶如虛空花	有無不可得
佛慧大悲觀	一切法如幻
遠離心意識	有無不可得
佛慧大悲觀	世間猶如夢
遠離於斷常	有無不可得
佛慧大悲觀	煩惱障智障
二無我清淨	有無不可得
佛不入不滅	涅槃亦不住
離覺所覺法	有無二俱離
若如是觀佛	寂靜離生滅

彼人今後世 離垢無染取

爾時大慧菩薩摩訶薩。如法偈讚佛已。自說姓名

我名為大慧 願通達大乘

今以百八問 仰諮無上尊

最勝世間解 聞彼大慧問

觀察諸眾生 告諸佛子言

汝等諸佛子 及大慧諮問

我當為汝說 自覺之境界

爾時聖者大慧菩薩摩訶薩。聞佛聽問頂禮佛足。合掌恭敬以偈問曰

云何淨諸覺 何因而有覺

何因見迷惑 何因有迷惑

何因有國土 化相諸外道

云何名佛子 寂靜及次第

解脫何所至 誰縛何因脫

禪者觀何法 何因有三乘

何因緣生法 何因作所作

何因俱異說 何因無而現

何因無色定 及與滅盡定

何因想滅定 何因從定覺

云何因果生 何因身去住

何因觀所見 何因生諸地

破三有者誰 何身至何所

云何處而住 云何諸佛子

何因得神通 及自在三昧

何因得定心 最勝為我說

何因為藏識 何因意及識

何因見諸法 何因斷所見

云何性非性 云何心無法

何因說法相 云何名無我

何因無眾生 何因有世諦

何因不見常 何因不見斷

云何佛外道 二相不相違

何因當來世 種種諸異部

云何名為空 何因念不住

何因有胎藏 何因世不動

云何如幻夢
陽炎水中月
云何說覺支
何因國亂動
何因不生滅
何因覺世間
云何無分別
真如有幾種
何因地次第
何因二無我
幾種智幾戒
誰作諸寶性
誰生於語言
五明處伎術
伽陀有幾種
法復有幾種
何因飲食種
云何名為王
何因護國土
何因而有地
解脫有幾種
弟子有幾種
如來有幾種
摩羅有幾種
自性有幾種
云何施假名
何因有風雲
何因有樹林
何因象馬鹿
何因為婬陋
何因為六時
男女及不男
何因修行退
教何等人修
諸眾生去來

說如撻闍婆
世尊為我說
何因菩提分
何因作有見
何因如空花
何因無字說
何因如虛空
何名心幾岸
真如無次第
何因境界淨
何因眾生生
金摩尼珠等
眾生種種異
誰能如是說
云何長短句
解義復有幾
何因生愛欲
轉輪及小王
諸天有幾種
何因星日月
行者有幾種
阿闍梨幾種
本生有幾種
異學有幾種
心復有幾種
世尊為我說
何因有點慧
世尊為我說
何因人捕取
世尊為我說
何因成闍提
為我說其生
何因修行進
令住何等法
何因何像類

何因致財富
云何為釋種
何因甘蔗種
長壽仙何親
世尊如虛空
何因佛世尊
種種名色類
何因不食肉
食肉諸種類
何因日月形
師子形勝相
亂側覆世界
一切寶國土
如箏篋琵琶
離日月光土
何等為化佛
何等如智佛
云何於欲界
云何色究竟
如來般涅槃
世尊住久如
如來立幾法
比尼及比丘
何因百變易
聲聞辟支佛
何因世間通
何因七地心
僧伽有幾種
云何醫方論
迦葉拘留孫
常為諸佛子
何故說人我
何故不但說
何因男女林
雞羅及鐵圍

世尊為我說
何因有釋種
何因長壽仙
云何彼教授
為我分別說
一切時剎現
佛子眾圍遶
云何制斷肉
何因故食肉
須彌及蓮花
國土為我說
如因陀羅網
何因為我說
鼓種種花形
何因為我說
何等為報佛
何因為我說
不成等正覺
離欲中得道
何人持正法
正法幾時住
各見有幾種
世尊為我說
何因百寂靜
世尊為我說
何因出世通
世尊為我說
何因為破僧
世尊為我說
拘那含是我
何故如是說
何故說斷常
唯有於一心
呵梨阿摩勒
金剛等諸山

次及無量山
仙樂人充滿
大天佛聞彼
大乘諸度門
善哉善哉問
我今當次第
生及與不生
趣至無自體
聲聞辟支佛
須彌海及山
日月諸星宿
解脫自在通
滅及如意足
諸禪定無量
四空定滅盡
心意及意識
自性相所想
云何種種乘
一闡提四大
智境界教得
象馬諸禽獸
譬如因相應
何因有因果
但心無境界
百變及無相
呪術諸明處
諸山須彌地
大海日月星
上中下眾生
肘步至十里
兔毫窓塵幾
一升幾麩麥
一斛及十斛
頻婆羅幾塵
幾芥成草子

種種寶莊嚴
世尊為我說
所說諸偈句
諸佛心第一
大慧善諦聽
如汝問而說
涅槃空剎那
佛波羅蜜子
外道無色者
四天下土地
外道天修羅
力思惟寂定
覺支及道品
五陰及去來
發起心而說
無我法有五
所見能見二
金摩尼珠性
荒亂及一佛
眾生有無有
云何如捕取
力說法云何
林迷惑如實
諸地無次第
醫方工巧論
何故而問我
其形量大小
云何而問我
身各幾微塵
四十及二十
羊毛麩麥塵
半升幾頭數
百萬及一億
芥子幾微塵
幾草子成豆

幾銖成一兩
如是次第數
佛子今何故
緣覺聲聞等
身幾微塵成
火炎有幾塵
根根幾塵數
何因則自在
何因王守護
種種眾生欲
何因諸飲食
金剛堅固山
何因如幻夢
何因而有雲
何因種種味
何因諸莊嚴
云何諸妙山
解脫至何所
云何禪境界
云何無因作
何因淨諸覺
何因轉所作
何因斷諸想
破三有者誰
云何無人我
何因問我相
云何為胎藏
何因斷常見
何因言及智
勘解師弟子
云何飲食魔
何因有樹林
云何種種剎
何因種種師
何因有醜陋

幾兩成一分
幾分成須彌
不如是問我
諸佛及佛子
何故不問此
風微塵有幾
毛孔眉幾塵
轉輪聖帝主
解脫廣略說
云何而問我
何因男女林
為我說云何
野鹿渴愛譬
何因有六時
男女非男女
佛子何因問
仙樂人莊嚴
誰縛云何縛
涅槃及外道
何因可見縛
何因有諸覺
幸願為我說
何因出三昧
何因身何處
何因依世說
云何問無我
汝何因問我
何因心得定
界性諸佛子
種種諸眾生
虛空聰明施
佛子何因問
何因長壽仙
汝何因問我
修行不欲成

色究竟成道	云何而問我
何因世間通	何因為比丘
云何化報佛	何因而問我
云何如智佛	云何為眾僧
箜篌鼓花剎	云何離光明
云何為心地	佛子而問我
此及餘眾生	佛子所應問
一一相相應	遠離諸見過
離諸外道法	我說汝諦聽
此上百八見	如諸佛所說
我今說少分	佛子善諦聽

生見不生見。常見無常見。相見無相見。住異見非住異見。剎那見非剎那見。離自性見非離自性見。空見不空見。斷見非斷見。心見非心見。邊見非邊見。中見非中見。變見非變見。緣見非緣見。因見非因見。煩惱見非煩惱見。愛見非愛見。方便見非方便見。巧見非巧見。淨見非淨見。相應見非相應見。譬喻見非譬喻見。弟子見非弟子見。師見非師見。性見非性見。乘見非乘見。寂靜見非寂靜見。願見非願見。三輪見非三輪見。相見非相見。有無立見非有無立見。有二見無二見。緣內身聖見非緣內身聖見。現法樂見非現法樂見。國土見非國土見。微塵見非微塵見。水見非水見。弓見非弓見。四大見非四大見。數見非數見。通見非通見。虛妄見非虛妄見。雲見非雲見。工巧見非工巧見。明處見非明處見。風見非風見。地見非地見。心見非心見。假名見非假名見。自性見非自性見。陰見非陰見。眾生見非眾生見。智見非智見。涅槃見非涅槃見。境界見非境界見。外道見非外道見。亂見非亂見。幻見非幻見。夢見非夢見。陽炎見非陽炎見。像見非像見。輪見非輪見。撻闍婆見非撻闍婆見。天見非天見。飲食見非飲食見。姪欲見非姪欲見。見非見見。波羅蜜見非波羅蜜見。戒見非戒見。日月星宿見非日月星宿見。諦見非諦見。果見非果見。滅見非滅見。起滅盡定見非起滅盡定見。治見非治見。相見非相見。支見非支見。巧明見非巧明見。禪見非禪見。迷見非迷見。現見非現見。護見非護見。族姓見非族姓見。仙人見非仙人見。王見非王見。捕取見非捕取見。實見非實見。記見非記見。一闍提見非一闍提見。男女見非男女見。味見非味見。作見非作見。身見非身見。覺見非覺見。動見非動見。根見非根見。有為見非有為見。因果見非因果見。色究竟見非色究竟見。時見非時見。樹林見非樹林見。種種見非種種見。說見非說見。比丘見非比丘見。比丘尼見非比丘尼見。住持見非住持見。字見非字見。大慧。此百八見過去諸佛所說。汝及諸菩薩當如是學

入楞伽經卷第一

入楞伽經卷第二

元魏天竺三藏菩提留支譯

集一切佛法品第三之一

爾時聖者大慧菩薩復白佛言。世尊。諸識有幾種生住滅。佛告聖者大慧菩薩言。大慧。諸識生住滅。非思量者之所能知。大慧。諸識各有二種生住滅。大慧。諸識二種滅者。一者相滅。二者相續滅。大慧。諸識又二種住。一者相住。二者相續住。大慧。諸識有二種生。一者相生。二者相續生。大慧。識有三種。何等三種。一者轉相識。二者業相識。三者智相識。大慧。有八種識。略說有二種。何等為二。一者了別識。二者分別事識。大慧。如明鏡中見諸色像。大慧。了別識亦如是見種種鏡像。大慧。了別識分別事識。彼二種識無差別相迭共為因。大慧。了別識不可思議熏變因。大慧。分別事識分別取境界。因無始來戲論熏習。大慧。阿梨耶識虛妄分別種種熏滅諸根亦滅。大慧。是名相滅。大慧。相續滅者。相續因滅則相續滅。因滅緣滅則相續滅。大慧。所謂依法依緣。言依法者。謂無始戲論妄想熏習。言依緣者。謂自心識見境界分別。大慧。譬如泥團微塵非異非不異。金莊嚴具亦復如是。非異非不異。大慧。若泥團異者非彼所成。而實彼成。是故不異。若不異者。泥團微塵應無差別。大慧。如是轉識阿梨耶識。若異相者。不從阿梨耶識生。若不異者。轉識滅阿梨耶識亦應滅。而自相阿梨耶識不滅。是故大慧。諸識自相滅。自相滅者業相滅。若自相滅者阿梨耶識應滅。大慧。若阿梨耶識滅者。此不異外道斷見戲論。大慧。彼諸外道作如是說。所謂離諸境界相續識滅。相續識滅已即滅諸識。大慧。若相續識滅者。無始世來諸識應滅。大慧。諸外道說相續諸識從作者生。不說識依眼色空明和合而生。而說有作者。大慧。何者是外道作者。勝人自在時微塵等是能作者。

復次大慧。有七種自性。何等為七。一者集性自性。二者性自性。三者相性自性。四者大性自性。五者因性自性。六者緣性自性。七者成性自性。

復次大慧。有七種第一義。何等為七。一者心境界。二者智境界。三者慧境界。四者二見境界。五者過二見境界。六者過佛子地境界。七者入如來地內行境界。

大慧。此是過去未來現在諸佛如來應正遍知性自性第一義心。大慧。依此性自性第一義心。諸佛如來畢竟得於世間出世間。諸佛智慧眼同相別相諸法建立。如所建立不與外道邪見共同。大慧。云何不與外道邪見共同。所謂分別自心境界妄想見。而不覺知自心想見。大慧。諸愚癡凡夫。無有實體以為第一義。說二見論。

復次大慧。汝今諦聽我為汝說。虛妄分別以為有物。為斷三種苦。何等為三。謂無知愛業因緣滅。自心所見如幻境界。大慧。諸沙門婆羅門作如是說。本無始生依因果而現。復作是說。實有物住依諸緣故。有陰界入生住滅。以生者滅故。大慧。彼沙門婆羅門說。相續體本無始有若生若滅若涅槃若道若業若果若諦。破壞諸法是斷滅論。非我所說。何以故。以現法不久當可得故。不見根本故。大慧。譬如瓶破不得瓶用。

。大慧。譬如焦種不生芽等。大慧。彼陰界入是滅。過去陰界入滅。現在未來亦滅。何以故。因自心虛妄分別見故。大慧。無彼陰界入相續體故。大慧。若本無始生依三法生種種識者。龜毛何故不生沙不出油。汝之所立決定之義是即自壞。汝說有無說生。所成因果亦壞。大慧。若如是依三法因緣。應生諸法因果自相。過去現在未來有無諸相譬喻。及阿含自覺觀地依自見薰心。作如是說。大慧。愚癡凡夫亦復如是。惡見所害邪見迷意。無智妄稱一切智說

大慧。若復有沙門婆羅門。見諸法離自性故。如雲火輪捷鬪婆城不生不滅故。如幻陽炎水中月故。如夢內外心依無始世來虛妄分別戲論而現故。離自心虛妄分別可見因緣故。離滅盡妄想說所說法故。離身資生持用法故。離阿梨耶識取境界相應故。入寂靜境界故。離生住滅法故。如是思惟觀察自心以為生故。大慧。如是菩薩不久當得世間涅槃平等之心。大慧。汝巧方便開發方便。觀察一切諸眾生界。皆悉如幻如鏡中像故。無因緣起遠離內境故。自心見外境界故。次第隨入無相處故。次第隨入從地至地三昧境界故。信三界自心幻故。大慧。如是修行者當得如幻三昧故。入自心寂靜境界故。到彼岸境界故。離作者生法故。得金剛三昧故。入如來身故。入如來化身故。入諸力通自在大慈大悲莊嚴身故。入一切佛國土故。入一切眾生所樂故。離心意意識境界故。轉身得妙身故。大慧。諸菩薩摩訶薩如是修行者。必得如來無上妙身。大慧。菩薩欲證如來身者。當遠離陰界入心因緣和合法故。遠離生住滅虛妄分別戲論故。諸法唯心。當如是知見三界因無始世來虛妄分別戲論而有故。觀如來地寂靜不生故。進趣內身聖行故。大慧。汝當不久得心自在無功用行究竟故。如眾色隨摩尼寶化身入諸眾生微細心故。以入隨心地故。令諸眾生次第入地故。是故大慧。諸菩薩摩訶薩應當善知諸菩薩修行自內法故

爾時聖者大慧菩薩摩訶薩。復白佛言。惟願世尊。為諸菩薩摩訶薩。說心意意識五法自體相應法門諸佛菩薩修行之處。遠離自心邪見境界和合故。能破一切言語譬喻體相故。一切諸佛所說法心。為楞伽城摩羅耶山大海中諸菩薩。說觀察阿梨耶識大海波境界。說法身如來所說法故

爾時佛告聖者大慧菩薩摩訶薩言。大慧。有四因緣眼識生。何等為四。一者不覺自內身取境界故。二者無始世來虛妄分別色境界薰習執著戲論故。三者識自性體如是故。四者樂見種種色相故。大慧。是名四種因緣。於阿梨耶識海起大勇波能生轉識。大慧。如眼識起識。一切諸根毛孔一時轉識生。如鏡中像多少一時。復有隨因緣次第生。大慧。猶如猛風吹境心海而識波生不斷因事相故。迭共不相離故。業體相使縛故。不覺色體故。而五識身轉故。大慧。不離彼五識因了別識相名為意識。共彼因常轉故。大慧。五識及心識不作是念。我迭共為因。自心見虛妄分別取諸境界。而彼各各不異。相俱現分別境界。如是彼識微細生滅。以入修行三昧者不覺不知微細熏習。而修行者作是心。我滅諸識入三昧。而修行者不滅諸識入三昧。大慧。熏集種子心不滅。取外境界諸識滅。大慧。如是微細阿梨耶識行。除佛如來及入地諸菩薩摩訶薩。諸

餘聲聞辟支佛外道修行者不能知故。入三昧智力亦不能覺。以其不知諸地相故。以不知智慧方便差別善決定故以不能覺諸佛如來集諸善根故。以不能知自現境界分別戲論故。以不能入種種稠林阿梨耶識窟故。大慧。惟下中上如實修行者。乃能分別見自心中虛妄見故。能於無量國土為諸如來授位故。得無量自在力神通三昧故。依善知識佛子眷屬而能得見心意意識自心自體境界故。分別生死大海以業愛無智以為因有故。大慧。是故如實修行者。應推覓親近善知識故。爾時世尊。而說偈言

譬如巨海浪	斯由猛風起
洪波鼓冥壑	無有斷絕時
梨耶識亦爾	境界風吹動
種種諸識浪	騰躍而轉生
青赤鹽珂乳	味及於石蜜
眾華與果實	如日月光明
非異非不異	海水起波浪
七識亦如是	心俱和合生
譬如海水動	種種波浪轉
梨耶識亦爾	種種諸識生
心意及意識	為諸相故說
諸識無別相	非見所見相
譬如海水波	是則無差別
諸識心如是	異亦不可得
心能集諸業	意能觀集境
識能了所識	五識現分別

爾時聖者大慧菩薩摩訶薩。以偈問佛

青赤諸色像	自識如是見
水波相對法	何故如是說

爾時世尊以偈答曰

青赤諸雜色	波中悉皆無
說轉識心中	為凡夫相說
彼業悉皆無	自心離可取
可取及能取	與彼波浪同
身資生住持	眾生惟識見
是故現轉識	水波浪相似
大海波浪動	鼓躍可分別
阿梨耶識轉	何故不覺知
凡夫無智慧	梨耶識如海

波浪轉對法 是故譬喻說

爾時聖者大慧菩薩摩訶薩。復說偈言

日出光等照 下中上眾生
如來出世間 為凡夫說實
佛得究竟法 何故不說實
若說真實者 彼心無真實
譬如海波浪 鏡中像及夢
俱時而得現 心境界亦然
境界不具故 是故次第現
識者識所識 意者然不然
吾則以現見 定中無如是
譬如巧畫師 及畫師弟子
布綵圖眾像 我說法亦爾
綵色本無文 非筆亦非器
為眾生說故 綺錯畫眾像
言說離真實 真實離名字
我得真實處 如實內身知
離覺所覺相 解如實為說
此為佛子說 愚者異分別
種種皆如幻 唯見非真實
如是種種說 隨事實不實
為此人故說 於彼為非說
彼彼諸病人 良醫隨處藥
如來為眾生 唯心應器說
妄想非境界 聲聞亦非分
諸如來世尊 自覺境界說

復次大慧。若菩薩摩訶薩。欲知自心離虛妄分別能取可取境界相者。當離憤鬧離睡眠蓋初夜後夜常自覺悟修行方便。離諸外道一切戲論。離聲聞緣覺乘相。當通達自心現見虛妄分別之相

復次大慧。菩薩摩訶薩建立住持智慧心相者。於上聖智三相當勤修學。大慧。何等為上聖智三相。所謂無所有相。一切諸佛自願住持相。內身聖智自覺知相。修行此已能捨跛驢智慧之相。得勝子第八地三相修行。大慧。何者無所有相。謂觀聲聞緣覺外道相。大慧。何者一切諸佛自願住持相。謂諸佛本自作願住持諸法。大慧。何者內身聖智自覺知相。一切法相無所執著。得如幻三昧身。諸佛地處進趣修行。大慧。是名上聖智三相。若成就此三相者。能到自覺聖智境界。是故大慧。諸菩薩摩訶薩求上

聖智三相者當如是學

爾時聖者大慧菩薩摩訶薩。知諸大菩薩眾心之所念。承佛如來住持之力。問於如來名聖智行分別法門體。世尊。願為我說名聖智行分別法門體。依百八見分別說。如來應正遍知。依此百八見為諸菩薩摩訶薩。分別說自相同相妄想分別體修行差別法。大慧。諸菩薩善得此妄想分別自體法行差別能清淨人無我法無我。善解諸地過諸聲聞辟支佛禪定三摩跋提之樂。得諸佛如來不可思議境界修行故。得離五法自體相行。入諸佛法身體真實行故。得如來法身善決定處。如幻境界所成故。一切國土從兜率天阿迦尼吒處得如來法身故

佛告聖者大慧菩薩。有一種外道邪見執著空無。所有妄想分別智因有二。自體無體。分別兔角無。如兔角無諸法亦無。大慧。復有餘外道。見四大功德實有物。見各各有差別相實無兔角。虛妄執著妄想分別實有牛角。大慧。彼諸外道墮於二見不知唯心。妄想分別增長自心界。大慧。如身資生器世間等。惟是心分別。不得分別兔角離於有無。大慧。不得分別一切諸法離於有無。大慧。若有人離於有無。作如是言。無有有兔角分別。不得分別無有有兔角。彼人見相待因。不得分別無兔角。何以故。大慧。乃至觀察微細微塵不見實事。離聖人智境界。不得分別有牛角

爾時聖者大慧菩薩摩訶薩白佛言。世尊。世尊愚癡凡夫不見分別相。而比智分別彼人見無。佛告聖者大慧菩薩言。大慧。非觀分別心彼人無相。何以故。因虛妄分別心。依角有分別心。大慧。依止虛妄角有分別心。是故依依止因離相待法非見法彼無角。大慧。若離分別心更有分別。應離角有非因角有。大慧。若不離彼分別心。彼法乃至觀察微塵不見有實物。大慧。不離於心彼法應無。以彼二法有無不可得。若爾見何等法有何等法無。大慧。若不如是見有無。不得分別有無。此義云何。見有牛角見無兔角。不得如是分別。大慧。以因不相似故。有無義不成。以諸外道凡夫聲聞說有無義二俱不成故

大慧。復有餘外道。見色有因妄想執著形相長短。見虛空無形相分齊。見諸色相異於虛空有其分齊。大慧。虛空即是色。以色大入虛空故。大慧。色即是虛空。依此法有彼法依彼法有此法故。以依色分別虛空。依虛空分別色故。大慧。四大種生自相各別不住虛空。而四大中非無虛空。大慧。兔角亦如是。因牛角有言兔角無。大慧。又彼牛角折為微塵。分別微塵相不可得見。彼何等何等法有。何等何等法無。而言有耶無耶。若如是觀餘法亦然

爾時佛告聖者大慧菩薩言。大慧。汝當應離兔角牛角虛空色異妄想見等。大慧。汝亦應為諸菩薩說離兔角等相。大慧。汝應當知自心所見虛妄分別之相。大慧。汝當於諸佛國土中為諸佛子。說汝自心現見一切虛妄境界。爾時世尊重說偈言

色於心中無	心依境見有
內識眾生見	身資生住處
心意與意識	自性及五法

二種無我淨	如來如是說
長短有無等	展轉互相生
以無故成有	以有故成無
分別微塵體	不起色妄想
但心安住處	惡見不能淨
非妄智境界	聲聞亦不知
如來之所說	自覺之境界

爾時聖者大慧菩薩摩訶薩。為淨自心現流。復請如來而作是言。世尊。云何淨除自心現流。為次第淨為一時耶。佛告聖者大慧菩薩摩訶薩言。大慧。淨自心現流。次第漸淨非為一時。大慧。譬如菴摩羅果漸次成熟非為一時。大慧。眾生清淨自心現流亦復如是。漸次清淨非為一時。譬如陶師造作諸器。漸次成就非為一時。大慧。諸佛如來淨諸眾生自心現流亦復如是。漸次而淨非一時淨。大慧。譬如大地生諸樹林藥草萬物。漸次增長非一時成。大慧。諸佛如來淨諸眾生自心現流亦復如是。漸次而淨非一時淨。大慧。譬如有人學諸音樂歌舞書畫種種伎術。漸次而解非一時知。大慧。諸佛如來淨諸眾生自心現流。亦復如是。漸次而淨非一時淨。大慧。譬如明鏡無分別心一時俱現一切色像。如來世尊亦復如是。無有分別淨諸眾生自心現流。一時清淨非漸次淨。令住寂靜無分別處。大慧。譬如日月輪相光明一時遍照一切色像非為前後。大慧。如來世尊亦復如是。為令眾生離自心煩惱見薰習氣過患。一時示現不思議智最勝境界。大慧。譬如阿梨耶識分別現境自身資生器世間等。一時而知非是前後。大慧。報佛如來亦復如是。一時成熟諸眾生界。置究竟天淨妙宮殿修行清淨之處。大慧。譬如法佛報佛放諸光明。有應化佛照諸世間。大慧。內身聖行光明法體。照除世間有無邪見亦復如是

復次大慧。法佛報佛說一切法自相同相故。因自心現見薰習相故。因虛妄分別戲論相縛故。如所說法無如是體故。大慧。譬如幻師幻作一切種種形像。諸愚癡人取以為實。而彼諸像實不可得。復次大慧。虛妄法體依因緣法。執著有實分別而生。大慧。如巧幻師依草木瓦石作種種事。依於呪術人工之力。成就一切眾生形色身分之相名幻人像。眾生見幻種種形色。執著為人而實無人。大慧。眾生雖見以為是人。無實人體。大慧。因緣法體隨心分別亦復如是。以見心相種種幻故。何以故。以執著虛妄相因分別心熏習故。大慧。是名分別虛妄體相。大慧。是名報佛說法之相。大慧。法佛說法者。離心相應體故。內證聖行境界故。大慧。是名法佛說法之相

大慧。應化佛所作應佛說施戒忍精進禪定智慧故。陰界入解脫故。建立識想差別行故。說諸外道無色三摩跋提次第相。大慧。是名應佛所作應佛說法相。復次大慧。法佛說法者。離攀緣故。離能觀所觀故。離所作相量相故。大慧。非諸凡夫聲聞緣覺外道境界故。以諸外道執著虛妄我相故。是故大慧。如是內身自覺修行勝相當如是學。大慧。汝當應離見自心相以為非實

復次大慧。聲聞乘有二種差別相。謂於內身證得聖相故。執著虛妄相分別有物故。大慧。何者聲聞內身證得聖相。謂無常苦空無我境界故。真諦離欲寂滅故。陰界入故。自相同相故。內外不滅相故。見如實法故。得心三昧。得心三昧已。得禪定解脫三味道果三摩跋提不退解脫故。離不可思議薰習變易死故。內身證得聖樂行法住聲聞地故。大慧。是名聲聞內身證得聖相。大慧菩薩摩訶薩入諸聲聞內證聖行三昧樂法。而不取寂滅空門樂。不取三摩跋提樂。以憐愍眾生故起本願力行。是故雖知不取為究竟。大慧。是名聲聞內身證聖修行樂相。大慧。菩薩摩訶薩應當修行內身證聖修行樂門而不取著大慧。何者是聲聞分別有物執著虛妄相。謂於四大堅濕熱動相。青黃赤白等相故。無作者而有生故。自相同相故。斟量相應阿含先勝見善說故。依彼法虛妄執著以為實有。大慧。是名聲聞分別有物執著虛妄相。大慧。菩薩摩訶薩於彼聲聞法應知而捨。捨已入法無我相。入法無我相已入人無我。觀察無我相已次第入諸地。大慧。是名聲聞分別有物執著虛妄相。大慧。所言聲聞乘有二種相者我已說竟

爾時聖者大慧菩薩摩訶薩復白佛言。世尊。世尊所說常不可思議法。內身證聖境界法第一前法。世尊。外道亦說常不可思議因果。此義云何。佛告聖者大慧菩薩言。大慧。諸外道說常不可思議因果不成。何以故。大慧。諸外道說常不可思議非因自相相應故。大慧。諸外道說常不可思議若因自相不相應者。此何等法。何等法了出。是故外道不得言常不可思議。復次大慧。諸外道說常不可思議者。若因自相相應者應成無常不可思議。以有因相故。是故不成常不可思議。大慧。我說常不可思議第一義。常不可思議。與第一義相因果相應。以離有無故。以內身證相故。以有彼相故。以第一義智因相相應。以離有無故。以非所作故。與虛空涅槃寂滅譬喻相應故。是故常不可思議。是故大慧。我說常不可思議。不同外道常不可思議論。大慧。此常不可思議。諸佛如來應正遍知實是常法。以諸佛聖智內身證得故。非心意意識境界故。大慧。是故菩薩摩訶薩應當修行常不可思議內身所證聖智行法。復次大慧。諸外道常不可思議。無常法相因相應故。是故無常。非因相而得名故。是故常法不可思議。大慧。若諸外道常不可思議。見有無法而言常。以彼法比智知言有常。大慧。我亦如是。即因此法作有無見。無常應常。何以故。以無因故。復次大慧。諸外道說若因相相應成常不可思議。以彼外道言因自相有無故者同於兔角。大慧。此常不可思議。諸外道等但虛妄分別。何以故。以無兔角但虛妄分別故。自因相無故。大慧。我常不可思議。惟內身證相因故。離作有無法故。是故常不可思議。以無外相故。常法相應故。大慧。諸外道等見無外相。比智知常不可思議以為常。彼外道等不知常不可思議。自因相彼因相故。以內身聖智證境界相故。大慧。彼外道於我法不應為說

復次大慧。諸聲聞辟支佛。畏生死妄想苦而求涅槃。不知世間涅槃無差別故。分別一切法與非法而滅諸根不取未來境界妄取以為涅槃。不知內身證修行法故。不知阿梨耶識轉故。大慧。是故彼愚癡人。說有三乘法。而不能知唯心想寂滅得寂滅法。是故彼無智愚人。不知過去未來現在諸佛如來應正遍知。自心見境界故。執著外心境界

故。是故大慧。彼愚癡人。於世間生死輪中常轉不住

復次大慧。過去未來現在一切諸佛。皆說諸法不生。何以故。謂自心見有無法故。若離有無諸法不生故。是故大慧。一切法不生。大慧。一切法如兔角驢駝等角。大慧。愚癡凡夫妄想分別分別諸法。是故一切諸法不生。大慧。一切諸法自體相不生。是內身證聖智境界故。非諸凡夫自體分別二境界故。大慧。是阿梨耶識。身資生器世間去來自體相故。見能取可取轉故。諸凡夫墮於生住滅二相心故。分別諸法生有無故。大慧。汝應知如是法故

復次大慧。我說五種乘性證法。何等為五。一者聲聞乘性證法。二者辟支佛乘性證法。三者如來乘性證法。四者不定乘性證法。五者無性證法。大慧。何者聲聞乘性證法。謂說陰界入法故。說自相同相證智法故。彼身毛孔熙怡欣悅。樂修相智不修因緣不相離相故。大慧。是名聲聞乘性證法故。彼聲聞人邪見證智。離起麤煩惱。不離無明熏習煩惱。見己身證相。謂初地中乃至五地六地離諸煩惱。同已所離故。熏習無明煩惱故墮不可思議變易死故。而作是言。我生已盡。梵行已立。所作已辦。不受後有。如是等得入人無我乃至生心。以為得涅槃故。大慧。復有餘外道求證涅槃。而作是言。覺知我人眾生壽命作者受者丈夫。以為涅槃。大慧。復有餘外道。見一切諸法依因。而有生涅槃心故。大慧。彼諸外道無涅槃解脫。以不見法無我故。大慧。是名聲聞乘外道性。於非離處而生離想。大慧。汝應轉此邪見修行如實行故

大慧。何者辟支佛乘性證法。謂聞說緣覺證法。舉身毛豎悲泣流淚。不樂憤鬧故。觀察諸因緣法故。不著諸因緣法故。聞說自身種種神通。若離若合種種變化。其心隨入故。大慧。是名緣覺乘性證法。汝當應知隨順緣覺說

大慧。何者如來乘性證法。大慧。如來乘性證法有四種。何等為四。一者證實法性。二者離實法證性。三者自身內證聖智性。四者外諸國土勝妙莊嚴證法性。大慧。若聞說此一一法時。但阿梨耶心。見外身所依資生器世間不可思議境界。不驚不怖不畏者。大慧當知。是證如來乘性人。大慧。是名如來乘性證法人相

大慧。何者不定乘性證法。大慧。若人聞說此三種法。於一一中有所樂者隨順為說。大慧。說三乘者為發起修行地故。說諸性差別非究竟地。為欲建立畢竟能取寂靜之地故。大慧。彼三種人離煩惱障熏習得清淨故。見法無我得三昧樂行故。聲聞緣覺畢竟證得如來法身故。爾時世尊重說偈言

逆流修無漏	往來及不還
應供阿羅漢	是等心亂惑
我說於三乘	一乘及非乘
諸聖如實解	凡夫不能知
第一義法門	遠離於二教
建立於三乘	為住寂靜處
諸禪及無量	無色三摩提

無想定滅盡 亦皆心中無

大慧。何者無性乘。謂一闡提。大慧。一闡提者無涅槃性。何以故。於解脫中不生信心不入涅槃。大慧。一闡提者有二種。何等為二。一者焚燒一切善根。二者憐愍一切眾生。作盡一切眾生界願。大慧。云何焚燒一切善根。謂謗菩薩藏作如是言。彼非隨順修多羅毘尼解脫說。捨諸善根。是故不得涅槃。大慧。憐愍眾生作盡眾生界願者。是為菩薩。大慧。菩薩方便作願。若諸眾生不入涅槃者。我亦不入涅槃。是故菩薩摩訶薩不入涅槃。大慧。是名二種一闡提無涅槃性。以是義故。決定取一闡提行。大慧菩薩白佛言。世尊。此二種一闡提。何等一闡提常不入涅槃。佛告大慧菩薩摩訶薩。一闡提常不入涅槃。何以故。以能善知一切諸法本來涅槃。是故不入涅槃。非捨一切善根闡提。何以故。大慧。彼捨一切善根闡提。若值諸佛善知識等。發菩提心生諸善根便證涅槃。何以故。大慧。諸佛如來不捨一切諸眾生故。是故大慧。菩薩一闡提常不入涅槃

入楞伽經卷第二

入楞伽經卷第三

元魏天竺三藏菩提留支譯

集一切佛法品第三之二

復次大慧。菩薩摩訶薩當善知三法自體相。大慧。何等三法自體相。一者虛妄分別名字相。二者因緣法體自相相。三者第一義諦法體相。大慧。何者虛妄分別名字相。謂從名字虛妄分別一切法相。是名虛妄分別名字之相。大慧。何者因緣法體自相相。大慧。因緣法體自相相者。從境界事生故。大慧。因緣法體境界事相。諸佛如來應正遍知。說虛妄分別差別有二種。何等二種。一者妄執名字戲論分別。二者妄執名字相分別境界相事相。大慧。何者妄執名字相境界相事相。謂即彼內外法自相同相。大慧。是名因緣法體二種自相相。以依彼法觀彼法生故。大慧。是名因緣法體自相相。大慧。何者第一義諦法體相。謂諸佛如來。離名字相境界相事相相。聖智修行境界行處。大慧。是名第一義諦相諸佛如來藏心。爾時世尊重說偈言

名相分別事 及法有二相
真如正妙智 是第一義相

大慧。是名觀察五法自相法門。諸佛菩薩修行內證境界之相。汝及諸菩薩應如是學

復次大慧。菩薩摩訶薩應當善觀二無我相。大慧。何等二種。一者人無我智。二者法無我智。云何人無我智。謂離我我所陰界入聚故。無智業愛生故。依眼色等虛妄執著故。自心現見一切諸根器身屋宅故。自心分別分別故。分別分別識故。如河流種子燈焰風雲。念念展轉前後差別輕躁動轉。如猿猴蠅等愛樂不淨境界處故。無厭足如火故。因無始來戲論境界熏習故。猶如轆轤車輪機關。於三界中生種種色種種身。如幻起尸。大慧。如是觀諸法相巧方便智。是名善知人無我智境界之相。大慧。何者法無我智。謂如實分別陰界入相。大慧。菩薩觀察陰界入等無我我所。陰界入聚因業愛繩迭共相縛。因緣生故無我無作者。大慧。陰界入等離同相異相故。依不實相分別得名。愚癡凡夫妄相分別以為有故。非證實者見以為有。大慧。菩薩如是觀察心意意識。五法體相一切離故諸因緣無。是名善知諸法無我智境界相。大慧。菩薩善知諸法無我已。觀察真如修寂靜行。不久當得初歡喜地。善能觀察歡喜地已。如是諸地次第轉明。乃至得證法雲之地。菩薩住彼法雲地已。無量諸寶間錯莊嚴。大蓮華王座大寶宮殿。如實業幻境界所生而坐其上。一切同行諸佛子等恭敬圍遶。十方諸佛伸手灌頂授於佛位。如轉輪王灌太子頂。過佛子地。過佛子地已。觀諸佛法如實修行。於諸法中而得自在。得自在已。名得如來無上法身。以見法無我故。大慧。是名如實法無我相。大慧。汝及諸菩薩應如是學

爾時聖者大慧菩薩復白佛言。世尊。世尊有無謗相願為我說。世尊。我及諸菩薩摩訶薩若聞得離有無邪見。速得阿耨多羅三藐三菩提。得阿耨多羅三藐三菩提已。遠離斷常邪見建立。便能建立諸佛正法。爾時世尊。復受聖者大慧菩薩摩訶薩請已。而

說偈言

心中無斷常 身資生住處
惟心愚無智 無物而見有

爾時世尊於此偈義復重宣說。告聖者大慧菩薩言。大慧。有四種建立謗相。何等為四。一者建立非有相。二者建立非正見相。三者建立非有因相。四者建立非有體相。大慧。是名四種建立

大慧。何者是謗相。大慧。觀察邪見所建立法不見實相。即謗諸法言一切無。大慧。是名建立謗相

復次大慧。何者建立非有相。謂分別陰界入非有法。無始來戲論非有實故。而執著同相異相。此法如是如是畢竟不異。大慧。依此無量世來煩惱薰習執著而起。大慧。是名建立非有相。大慧。何者建立非正見相。大慧。彼陰界入中。無我人眾生壽者作者受者。而建立邪見。謂有我等故。大慧。是名建立非正見相。大慧。何者建立非有因相。謂初識不從因生。本不生後時生如幻。本無因物而有因眼色明念故識生。生已還滅。大慧。是名建立非有因相。大慧。何者建立非有體謗法相。謂虛空滅涅槃無作無物建立執著。大慧。彼三法離有無故。大慧。一切諸法如兔馬驢駝角毛輪等故。離有無建立相故。大慧。建立謗相者諸凡夫虛妄分別故。不知但是心見。諸法是有非聖人所見故。大慧。是名建立非有體謗法相。大慧。汝當遠離不正見建立謗法相故

復次大慧。諸菩薩摩訶薩如實知心意識五法體相二種無我。為安隱眾生現種種類像。如彼虛妄無所分別。依因緣法。而有種種。大慧。菩薩摩訶薩亦復如是。依眾生現種種色如如意寶。隨諸一切眾生心念。於諸佛土大眾中現。如幻如夢如響如水中月鏡中像故。遠離諸法。不生不滅非常非斷故。現佛如來。離諸聲聞緣覺乘故。聞諸佛法。即得無量百千萬億諸深三昧。得三昧已依三昧力。從一佛土至一佛土供養諸佛。示現生於諸宮殿中讚歎三寶。現作佛身菩薩聲聞大眾圍遶。令諸一切眾生得入自心見境。為說外境無物有物。令得遠離建立有無法故。爾時世尊重說偈言

佛子見世間 惟心無諸法
種類非身作 得力自在成

爾時聖者大慧菩薩復請佛言。惟願世尊為我等說一切法空無生無二離自體相。我及一切諸菩薩眾。知諸法空無生無二離自體相已離有無妄想。速得阿耨多羅三藐三菩提。爾時佛告聖者大慧菩薩摩訶薩言。善哉善哉。善哉大慧。諦聽諦聽。我當為汝廣分別說。大慧白佛言。善哉世尊。唯然受教。佛告大慧言。大慧。空者即是妄想法體句。大慧。依執著妄想法體。說空無生無體相不二。大慧。空有七種。何等為七。一者相空。二者一切法有物無物空。三者行空。四者不行空。五者一切法無言空。六者第一義聖智大空。七者彼彼空。大慧。何者是相空。謂一切法自相同相空。見迭共積聚。大慧。觀察一一法自相同相。無一法可得。離自相他相二相。無相可住可見。是故名為自相空。大慧。何者一切法有物無物空。謂自體相實有法生大慧。諸法自體相

有無俱空。是故名為自體相有物無物空。大慧。何者是行空。謂諸陰等離我我所。依因作業而得有生。大慧。是故名為行空。大慧。何者不行空。謂陰法中涅槃未曾行。大慧。是名不行空。大慧。何者一切法無言空。謂妄想分別一切諸法無言可說。大慧。是名一切法無言空。大慧。何者第一義聖智大空。謂自身內證聖智法空。離諸邪見熏習之過。大慧。是名第一義聖智大空。大慧。何者彼彼空。謂何等何法等法處。彼法無此法有。彼法有此法無。是故言空。大慧。我昔曾為鹿母說殿堂空者。無象馬牛羊等名為空。有諸比丘等名為不空。而殿堂殿堂體無。比丘比丘體亦不可得。而彼象馬牛羊等非餘處無。大慧。如是諸法自相同相。亦不可得離此彼處。是故我言彼彼空。大慧。是名七種空。大慧。此彼彼空最為麁淺。大慧。汝當應離彼彼空不須修習。大慧言。何者不生。大慧。自體不生而非不生。依世諦故說名為生。依本不生故言不生。大慧言。何者無體相。大慧。我說無體相者。一切諸法體本不生。是故我言諸法無體。而相續體刹那不住。大慧。以見異異相故。是故一切法無體相。大慧言。何者名為不二法相。大慧。二法相者。謂日光影長短黑白。彼如是等法各各別名。不得言不二。大慧。如世間涅槃一切諸法各各有二。大慧。何等涅槃。彼處無世間。何處世間。彼處無涅槃。以異因相故。是故我言一切諸法不二。一切諸法不二者。世間涅槃無二故。是故汝應修學諸法空不生無體不二故。爾時世尊重說偈言

我常說空法 遠離於斷常
生死如幻夢 而彼業不失
虛空及涅槃 滅二亦如是
凡夫分別生 聖人離有無

爾時佛告聖者大慧菩薩摩訶薩言。大慧。一切法空不生無體不二相。入於諸佛如來所說修多羅中。凡諸法門皆說此義。大慧。一切修多羅。隨諸一切眾生心故分別顯示。大慧。譬如陽焰迷惑禽獸。虛妄執著生於水想。而陽焰中實無有水。大慧。一切修多羅說法亦復如是。為諸凡夫自心分別令得歡喜。非如實聖智在於言說。大慧。汝應隨順於義。莫著所說名字章句

爾時聖者大慧菩薩摩訶薩白佛言。世尊。世尊。如修多羅說。如來藏自性清淨。具三十二相。在於一切眾生身中。為貪瞋癡不實垢染陰界入衣之所纏裹。如無價寶垢衣所纏。如來世尊復說常恒清涼不變。世尊。若爾外道亦說我有神我常在不變。如來亦說如來藏常乃至不變。世尊。外道亦說有常作者。不依諸緣自然而有周遍不滅。若如是者。如來外道說無差別。佛告聖者大慧菩薩言。大慧。我說如來藏常。不同外道所有神我。大慧。我說如來藏空實際涅槃不生不滅無相無願等文辭章句。說名如來藏。大慧。如來應正遍知。為諸一切愚癡凡夫。聞說無我生於驚怖。是故我說有如來藏。而如來藏無所分別寂靜無相。說名如來藏。大慧。未來現在諸菩薩等。不應執著有我之相。大慧。譬如陶師依於泥聚微塵輪繩。人功手木方便力故作種種器。大慧。如來世尊亦復如是。彼法無我離諸一切分別之相。智慧巧便說名如來藏。或說無我。或

說實際及涅槃等。種種名字章句示現。如彼陶師作種種器。是故大慧。我說如來藏不同外道說有我相。大慧。我說如來藏者。為諸外道執著於我。攝取彼故說如來藏。令彼外道離於神我妄想見心執著之處。入三解脫門。速得阿耨多羅三藐三菩提。大慧。以是義故。諸佛如來應正遍知說如來藏。是故我說有如來藏。不同外道執著神我。是故大慧。為離一切外道邪見。諸佛如來作如是說。汝當修學如來無我相法。爾時世尊重說偈言

人我及於陰 眾緣與微塵
自性自在作 唯心妄分別

爾時聖者大慧菩薩。觀察未來一切眾生。復請佛言。唯願世尊。為諸菩薩說如實修行法。彼諸菩薩聞說如實修行之法。便得成就如實修行者。佛告聖者大慧菩薩摩訶薩言。大慧。有四種法得名為大如實修行者。何等為四。一者善知自心現見故。二者遠離生住滅故。三者善解外法有無故。四者樂修內身證智故。大慧。菩薩成就如是四法。得成就大如實修行者。大慧。何者菩薩摩訶薩觀察三界但是一心作故。離我我所故。無動無覺故。離取捨故。從無始來虛妄執著。三界薰習戲論心故。種種色行常繫縛故。身及資生器世間中六道虛妄現故。大慧。是名諸菩薩摩訶薩善知自心現見相。大慧。云何一切菩薩摩訶薩見遠離生住滅法。謂觀諸法如幻如夢故一切諸法自他二種無故不生。以隨自心現知見故。以無外法故。諸識不起觀諸因緣無積聚故。見諸三界因緣有故。不見內外一切諸法無實體故。遠離生諸法不正見故。入一切法如幻相故。菩薩爾時名得初地無生法忍。遠離心意意識五法體相故。得二無我如意意身。乃至得第八不動地如意意身故。大慧菩薩白佛言。世尊。何故名為如意意身。佛告大慧。隨意速去如念即至。無有障礙名如意身。大慧。言如意者。於石壁山障無量百千萬億由旬。念本所見種種境界自心中縛。不能障礙自在而去。大慧。如意身者亦復如是。得如幻三昧自在神力莊嚴其身。進趣一切聖智種類身無障礙隨意而去。以念本願力境界故。為化一切諸眾生故。大慧。是名菩薩摩訶薩遠離生住滅相。大慧。云何菩薩摩訶薩善解外法有無之相。所謂菩薩見一切法。如陽焰如夢如毛輪故。因無始來執著種種戲論分別妄想薰習故。見一切法無體相。求證聖智境界修行故。大慧。是名菩薩善解外法有無之相。即成就大如實修行者。大慧。汝應如是修學

爾時聖者大慧菩薩復請佛言。世尊。唯願世尊。說一切法因緣之相。我及一切諸菩薩等。善知諸法因緣之相。離於有無不正見等。妄想分別諸法次第一時生過。佛告大慧菩薩言。大慧。一切諸法有於二種因緣集相。所謂內外。大慧。外法因緣集相者。所謂泥團等柱輪繩人功方便緣故。則有瓶生。大慧。如泥團等因緣生瓶。如是纒疊草席種牙湏等人功生酪。生酪已生酥生酥已得醍醐。大慧。是名外法因緣集相。從下上上應知。大慧。何者內法因緣集相。大慧。所謂無明業愛。如是等法名內因緣集相。大慧。因無明等陰界入等。而得名為因緣集相。而諸凡夫虛妄分別各見別相。大慧。因有六種。何等為六。一者當因。二者相續因。三者相因。四者作因。五者了因。

六者相待因。大慧。當因者。作因已能生內外法。大慧。相續因者。能攀緣內外法陰種子等。大慧。相因者。能生相續次第作事而不斷絕。大慧。作因者。能作增上因如轉輪王。大慧。了因者。妄想事生已能顯示。如燈照色等。大慧。相待因者。於滅時不見虛妄生法。相續事斷絕故。大慧。如是諸法。凡夫自心虛妄分別。大慧。是諸法非次第生。非一時生。何以故。大慧。若一切法一時生者。因果不可差別。以不見因果身相故。若次第生者。未得身相不得言次第生。如未有子不能言父。大慧。愚癡凡夫自心觀察。次第相續不相應故。作如是言。因緣。次第緣。所緣緣。增上緣等能生諸法。大慧。如是次第諸法不生。大慧。虛妄分別取法體相。一時次第俱亦不生復次大慧。自心中見身及資生故。大慧。自相同相外法無法。是故次第一時不生。大慧。但虛妄識生自心見故。大慧。汝當應離不正見因緣生事次第一時生法。爾時世尊重說偈言

因緣無不生	不生故不滅
生滅因緣虛	非生亦非滅
為遮諸因緣	愚人虛妄取
有無緣不生	故諸法不起
以於三界中	熏習迷惑心
因緣本自無	不生亦不滅
見諸有為法	石女虛空花
轉可取能取	不生惑妄見
現本皆不生	緣本亦不有
如是等諸法	自體是空無
亦無有住處	為世間說有

爾時聖者大慧菩薩復白佛言。世尊。惟願世尊。為我說名分別言語相心法門。我及一切諸菩薩等若得善知名分別言語相心法門。則能通達言說及義二種之法。速得阿耨多羅三藐三菩提。得菩提已。言說及義。能令一切諸眾生等得清淨解。佛告聖者大慧菩薩言。善哉大慧。諦聽諦聽。當為汝說。大慧菩薩言。善哉世尊。唯然受教。佛告大慧菩薩言。大慧。有四種妄相言語。何等為四。一者相言說。二者夢言說。三者妄執言說。四者無始言說。大慧。相言說者。所謂執著色等諸相而生。大慧。夢言說者。念本受用虛妄境界。依境界夢覺已。知依虛妄境界不實而生。大慧。執著言說者。念本所聞所作業生。大慧。無始言說者。從無始來執著戲論煩惱種子熏習而生。大慧。我言四種言說虛妄執著者。我已說竟

爾時聖者大慧菩薩。復以此義勸請如來。而白佛言。世尊。惟願為我重說四種虛妄執著言語之相。眾生言語何處出。云何出何因出。佛告大慧菩薩言。大慧。從頭胸喉鼻脣舌牙齒轉故。和合出聲。大慧菩薩白佛言。世尊。口中言語虛妄法相。為異為不異。佛告大慧言。大慧。言語虛妄者。非異非不異。何以故。大慧。因彼虛妄法相

生言語故。大慧。若言語異者應無因生。大慧。若不異者。言說不能了前境界。大慧。說彼言語能了前境。是故非異非不異。大慧復白佛言。世尊。為言語即第一義。為言語所說為第一義。佛告大慧。非言語即第一義。何以故。大慧。為令第一義隨順言語入聖境界故。有言語說第一義。非言語即第一義。大慧。第一義者。聖智內證。非言語法是智境界。以言語能了彼境界。大慧。說第一義言語者。是生滅法念念不住。因緣和合有言語生。大慧。因緣和合者。彼不能了第一義。何以故。以無自相他相故。是故大慧。言語不能了第一義。復次大慧。隨順自心見外諸法無法分別。是故不能了知第一義。是故大慧汝當應離種種言語妄分別相。爾時世尊重說偈言

諸法本虛妄	無有自體實
是故諸言語	不能說有無
空及與不空	凡夫不能知
諸法無體相	說眾生亦爾
分別有無法	猶如化夢等
觀察一切法	不住於涅槃
亦不住世間	如王長者等
為令諸子喜	泥作諸禽獸
先與虛偽物	後乃授實事
我說種種法	自法鏡像等
為諸佛子喜	後說明實際

爾時聖者大慧菩薩復白佛言。世尊。唯願世尊。為諸菩薩及我身。說離有無一異俱不俱有無非有非無常無常。一切外道所不能行。聖智自證覺所行故。離於自相同相法故。入第一義實法性故。諸地次第上上清淨故。入如來地相故。依本願力如如意寶無量境界修行之相自然行故。於一切法自心現見差別相故。我及一切諸菩薩等。離於如是妄想分別同相異相。速得阿耨多羅三藐三菩提。得菩提已與一切眾生安隱樂具悉令滿足故。佛告大慧。善哉善哉。善哉大慧。汝為哀愍一切天人。多所安樂多所饒益。乃能問我如是之義。善哉善哉。善哉大慧。諦聽諦聽。我當為汝分別解說。大慧白佛言。善哉世尊。唯然受教。佛告大慧。愚癡凡夫不能覺知惟自心見。執著外諸種種法相以為實有。是故虛妄分別一異俱不俱有無非有非無常無常。因自心熏習依虛妄分別心故。大慧。譬如群獸為渴所逼依熱陽焰自心迷亂而作水想。東西馳走不知非水。大慧。如是凡夫愚癡心見。生住滅法不善分別。因無始來虛妄執著戲論熏習。貪瞋癡熱迷心逼惱。樂求種種諸色境界。是故凡夫墮於一異俱不俱有無非有非無常無常等。大慧。譬如凡夫見撻闍婆城生實城想。因無始來虛妄分別城想種子熏習而見。大慧。彼城非城非不城。大慧。一切外道亦復如是。因無始來戲論熏習。執著一異俱不俱有無非有非無常無常法故。大慧。以不覺知唯是自心虛妄見故。大慧。譬如有人於睡夢中見諸男女。象馬車步。城邑聚落。牛與水牛。園林樹木。種種山河。泉流浴池。宮

殿樓閣。種種莊嚴廣大嚴博。見身在中忽然即覺。覺已憶念彼廣大城。大慧。於意云何。彼人名為是聖者不。大慧白佛言。不也世尊。佛告大慧。一切愚癡凡夫外道邪見諸見亦復如是。不能覺知諸法。夢睡自心見故。執著一異俱不俱有無非有非無常無常見故。大慧。譬如畫像不高不下。大慧。愚癡凡夫妄見諸法有高有下。大慧。於未來世依諸外道邪見心熏習。增長虛妄分別一異俱不俱有無非有非無常無常等。大慧。而彼外道自壞壞他。說如是言。諸法不生不滅有無寂靜。彼人名為不正見者。大慧。彼諸外道謗因果法。因邪見故拔諸一切善根白法清淨之因。大慧。欲求勝法者當遠離說如是法人。彼人心著自他二見。執虛妄法墮於誹謗。建立邪心入於惡道。大慧。譬如目瞽見虛空中有於毛輪。為他說言如是如是青黃赤白汝何不觀。大慧。而彼毛輪本自無體。何以故。有見不見故。大慧。諸外道等依邪見心虛妄分別亦復如是。虛妄執著一異俱不俱有無非有非無常無常生諸法故。大慧。譬如天雨生於水泡似頗梨珠。愚癡凡夫妄見執著。生於珠想東西走逐。大慧。而彼水泡非寶珠非不寶珠。何以故。有取不取故。大慧。彼諸外道因虛妄心分別熏習亦復如是。說非有法依因緣生。復有說言實有法滅。復次大慧。彼諸外道建立三種量五分論。而作是言。實有聖者內證之法離二自體。虛妄分別故。大慧。離心意意識。轉身便得聖種類身。修行諸行無如是心。離自心見能取可取虛妄境界故。入如來地自身進趣證聖智故。如實修行者。不生有無心故。大慧。如實修行必得如是境界故。大慧。若取有無法者。即為我相人相眾生相壽者相故。大慧。說有無法自相同相。是名應化佛說。非法佛說。復次大慧。應化如來說如是法。隨順愚癡凡夫見心令其修行。非為建立如實修行。示現自身內證聖智三昧樂行故。大慧。譬如人見水中樹影。大慧。彼非影非不影。何以故。有樹則有無樹則無故。大慧。彼諸外道依邪見心妄想熏習亦復如是。分別一異俱不俱有無非有非無常無常。妄想分別故。何以故。以不覺知唯自心見故。大慧。譬如明鏡隨緣得見一切色像無分別心。大慧。彼非像非不像。何以故。有緣得見無緣不見故。大慧。愚癡凡夫自心分別見像有無。大慧。一切外道自心妄想分別鏡像亦復如是。見一異俱不俱故。大慧。譬如諸響因人山河水風空屋和合而聞。彼所聞響非有非無。何以故。因聲聞聲故。大慧。一切外道自心虛妄分別熏習。見一異俱不俱有無非有非無常無常故。大慧。譬如大地無諸草木園林之處因於日光塵土和合見水波動。而彼水波非有非無。何以故。令眾生歡喜不歡喜故。大慧。一切外道愚癡凡夫亦復如是。因無始來煩惱心熏習戲論分別生住滅一異俱不俱有無非有非無常無常。聖人內身證智門中。示現陽焰渴愛事故。大慧。譬如有人依呪術力起於死尸。機關木人無眾生體依毘舍闍力。依巧師力作去來事。而諸愚癡凡夫。執著以為實有。以去來故。大慧。愚癡凡夫諸外道等墮邪見心亦復如是。執著虛妄一異俱不俱有無非有非無常無常故。是故凡夫外道。虛妄建立如是法故。是故大慧。汝當遠離生住滅一異俱不俱有無非有非無常無常故。自身內證聖智分別故。爾時世尊重說偈言

五陰及於識	如水中樹影
如幻夢所見	莫依意識取
諸法如毛輪	如焰水迷惑
觀察於三界	一切如幻夢
若能如是觀	修行得解脫
如夏獸愛水	搖動迷惑心
彼處無水事	妄想見為水
如意識種子	境界動生見
愚癡取為實	彼法生如翳
無始世愚癡	取物如懷抱
如因榻出榻	誑凡夫入法
幻起尸機關	夢電雲恒爾
觀世間如是	斷有得解脫
陽焰虛空中	無有諸識知
觀諸法如是	不著一切法
諸識唯有名	以諸相空無
見陰如毛輪	何法中分別
畫及諸毛輪	幻夢犍闌婆
火輪禽趣水	實無而見有
常無常及一	二俱及不俱
依無始因縛	凡夫迷惑心
鏡寶水眼中	現諸種種像
妄見種種色	如夢石女兒
一切法無實	如獸愛空水

復次大慧。諸佛如來說法離四種見。謂離一異俱不俱故。遠離建立有無故。大慧。一切諸佛如來說法。依實際因緣寂滅解脫故。大慧。一切諸佛如來說法。依究竟境界。非因自性。自在天。無因。微塵時。不依如是說法

復次大慧。諸佛說法離二種障煩惱障智障。如大商主將諸人眾。次第置於至未曾見究竟安隱寂靜之處。次第安置令善解知乘地差別相故

復次大慧。有四種禪。何等為四。一者愚癡凡夫所行禪。二者觀察義禪。三者念真如禪。四者諸佛如來禪。大慧。何者愚癡凡夫所行禪。謂聲聞緣覺外道修行者。觀人無我自相同相骨鎖故。無常苦無我不淨執著諸相。如是如是決定畢竟不異故。如是次第因前觀次第上上乃至非想滅盡定解脫。是名愚癡凡夫外道聲聞等禪

大慧。何者觀察義禪。謂觀人無我自相同相故。見愚癡凡夫外道自相同相自他相無實故。觀法無我諸地行相義次第故。大慧。是名觀察義禪

大慧。何者觀真如禪。謂觀察虛妄分別因緣。如實知二種無我。如實分別一切諸法無實體相。爾時不住分別心中得寂靜境界。大慧。是名觀真如禪。大慧。何者觀察如來禪。謂如實入如來地故。入內身聖智相三空三種樂行故。能成辦眾生所作不可思議。大慧。是名觀察如來禪。爾時世尊重說偈言

凡夫等行禪	觀察義相禪
觀念真如禪	究竟佛淨禪
譬如日月形	鉢頭摩海相
虛空火盡相	行者如是觀
如是種種相	墮於外道法
亦墮於聲聞	辟支佛等行
捨離於一切	則是無所有
時十方剎土	諸佛真如手
摩彼行者頂	入真如無相

爾時聖者大慧菩薩摩訶薩白佛言。世尊。言涅槃。涅槃者。說何等法名為涅槃。佛告聖者大慧菩薩言。大慧。言涅槃者。轉滅諸識法體相故。轉諸見熏習故。轉心意阿梨耶識法相熏習。名為涅槃。大慧。我及諸佛說如是涅槃法體境界空事故。復次大慧。言涅槃者。謂內身聖智修行境界故。離虛妄分別有無法故。大慧。云何非常。謂離自相同相分別法故。是故非常。大慧。云何非斷。謂過去未來現在一切聖人內身證得故。是故非斷。大慧。般涅槃者非死非滅。大慧。若般涅槃是死法者。應有生縛故。大慧。若般涅槃是滅法者。應墮有為法故。是故大慧。般涅槃者非死非滅。如實修行者之所歸依故。復次大慧。言涅槃者非可取非可捨。非此處非彼處。非斷非常。非一義非種種義。是故名為涅槃。復次大慧。聲聞涅槃者。觀察自相同相覺諸法故。名聲聞涅槃。大慧。辟支佛涅槃者不樂憒鬧。見諸境界無常無樂無我無淨。不生顛倒相。是故聲聞辟支佛非究竟處生涅槃想故

復次大慧。我為汝說二法體相。何等為二。一者執著言說體相。二者執著世事體相。大慧。何者執著言說體相。謂無始來執著言說戲論熏習生故。大慧。何者執著世事體相。謂不如實知唯是自心見外境界故

復次大慧。諸菩薩摩訶薩依二種願力住持故。頂禮諸佛如來應正遍知問所疑事。大慧。何等二種願力住持。一者依三昧三摩跋提住持力。二者遍身得樂謂佛如來手摩其頂受位住持力。大慧。諸菩薩摩訶薩住初地中承諸如來住持力故。名入菩薩大乘光明三昧。大慧。諸菩薩摩訶薩入大乘光明三昧已。爾時十方諸佛如來應正遍知。與諸菩薩住持力故現身口意。大慧。如金剛藏菩薩摩訶薩。及餘成就如是功德相菩薩摩訶薩。大慧。如是諸菩薩摩訶薩。住初地中三昧三摩跋提力住持故。以百千萬億劫修集

善根力故。次第如實知地對治法相成就。菩薩摩訶薩至法雲地。住大寶蓮華王宮殿師子座上坐。同類菩薩摩訶薩眷屬圍繞。寶冠瓔珞莊嚴其身。如閻浮檀金瞻蔔日月光明勝蓮花色

爾時十方一切諸佛各申其手。遙摩蓮花王座上菩薩摩訶薩頂。如得自在王帝釋王轉輪王灌太子頂授位故。大慧。彼授位菩薩。及眷屬菩薩摩訶薩。依如來手摩頂故得遍身樂。是故言手摩菩薩頂住持力。大慧。是名諸菩薩摩訶薩二種住持力。大慧。諸菩薩摩訶薩。依此二種住持力故。能觀察一切諸如來身。大慧。若無二種住持力者。則不得見諸佛如來。大慧。若諸菩薩摩訶薩。離二種住持力能說法者。愚癡凡夫亦應說法。何以故。謂不以得諸佛住持力故。大慧。依諸如來住持力故。山河石壁草木園林及種種伎樂。城邑聚落宮殿屋宅。皆能出於說法之聲。自然皆出伎樂之音。大慧。何況有心者聾盲瘖瘂無量眾生離諸苦惱。大慧。諸佛如來住持之力。無量利益安樂眾生。大慧菩薩復白佛言。世尊。世尊何故諸菩薩摩訶薩入三昧三摩跋提及入諸地時。諸佛如來應正遍知作住持力。佛告大慧。為護魔業煩惱散亂心故。為不墮聲聞禪定地故。為內身證如來地故。為增長內身證法故。大慧。是故諸佛如來應正遍知。為諸菩薩作住持力。大慧。若諸如來不為菩薩作住持力者。墮諸外道聲聞辟支佛魔事故。不得阿耨多羅三藐三菩提。是故諸佛如來應正遍知。大慈攝取諸菩薩故。爾時世尊重說偈言

菩薩依自身	本願力清淨
入三昧授位	初地至十地
諸佛人中尊	神力作住持

入楞伽經卷第三

入楞伽經卷第四

元魏天竺三藏菩提留支譯

集一切佛法品第三之三

爾時聖者大慧菩薩摩訶薩復白佛言。世尊。如世尊說。十二因緣從因生果。不說自心妄想分別見力而生。世尊。若爾外道亦說從因生果。世尊。外道說言。從於自性自在天時微塵等因生一切法。如來亦說依於因緣而生諸法。而不說有自建立法。世尊。外道亦說從於有無而生諸法。世尊說言。諸法本無依因緣生生已還滅。世尊說從無明緣行乃至於有。依眼識等生一切法。如世尊說。亦有諸法無因而生。何以故。不從因生一時無前後生。以因此法生此法。世尊自說。因虛妄因法生。此法非次第生故。世尊。若爾外道說法勝而如來不如。何以故。世尊。外道說因無因緣能生果。如來說法因亦依果果亦依因。若爾因緣無因無果。世尊。若爾彼此因果展轉無窮。世尊說言。從此法生彼法。若爾無因生法。佛告聖者大慧菩薩摩訶薩言。大慧。我今當說。因此法生彼法。不同外道所立因果。無因之法亦從因生。我不如是。我說諸法從因緣生。非無因緣亦不雜亂。亦無展轉無窮之過。何以故。以無能取可取法故。大慧。外道不知自心見故。執著能取可取之法。不知不覺惟自心見內外法故。大慧。彼諸外道不知自心內境界故見有無物。是故外道有如是過。非我過也。我常說言。因緣和合而生諸法非無因生。大慧復言。世尊。有言語說應有諸法。世尊。若無諸法者應不說言語。世尊。是故依言說應有諸法。佛告大慧。亦有無法而說言語。謂兔角龜毛石女兒等。於世間中而有言說。大慧。彼兔角非有非無而說言語。大慧。汝言以有言說應有諸法者。此義已破。大慧。非一切佛國土言語說法。何以故。以諸言語惟是人心分別說故。是故大慧。有佛國土直視不瞬口無言語名為說法。有佛國土直爾示相名為說法。有佛國土但動眉相名為說法。有佛國土惟動眼相名為說法。有佛國土笑名說法。有佛國土欠喏名說法。有佛國土咳名說法。有佛國土念名說法。有佛國土身名說法。大慧。如無瞬世界及眾香世界。於普賢如來應正遍知。彼菩薩摩訶薩。觀察如來目不暫瞬。得無生法忍。亦得無量勝三昧法。是故大慧。汝不得言有言語說應有諸法。大慧。如來亦見諸世界中。一切微蟲蚊虻等眾生之類。不說言語共作自事而得成辦。爾時世尊重說偈言

如虛空兔角	及與石女兒
無而有言說	如是妄分別
因緣和合法	愚癡分別生
不知如實法	輪迴三有中

爾時聖者大慧菩薩摩訶薩復白佛言。世尊。世尊說常語法。依何等法作如是說。佛告聖者大慧菩薩言。大慧。依迷惑法我說為常。何以故。大慧。聖人亦見世間迷惑法非顛倒心。大慧。譬如陽焰火輪毛輪乾闥婆城幻夢水中月鏡中像。世間非智慧者。見有諸像。顛倒見故。有智慧者不生分別。非不見彼迷惑之事。大慧。有智慧者見彼

種種迷惑之事不生實心。何以故。離有無法故

佛復告聖者大慧菩薩言。大慧。云何迷惑法離於有無。謂諸愚癡凡夫。見有種種境界。如諸餓鬼大海恒河見水不見。大慧。是迷惑法不得言有不得言無。大慧。餘眾生見彼是水故不得言無。大慧。迷惑之事亦復如是。以諸聖人離顛倒見故。大慧。言迷惑法常者。以想差別故。大慧。因迷惑法見種種相。而迷惑法不分別異差別。是故大慧。迷惑法常。大慧。云何迷惑法名之為實。以諸聖人迷惑法中不生顛倒心。亦不生實心。大慧。而諸聖人見彼迷惑法起少心想。不生聖智事相。大慧。起少想者是謂凡夫非謂聖人。大慧。分別彼迷惑法顛倒非顛倒者。能生二種性。何等二種。一者能生凡夫性。二者能生聖人性。大慧。彼聖人性者。能生三種差別之性。所謂聲聞辟支佛佛國土差別性故。大慧。云何毛道凡夫分別迷惑法。而能生彼聲聞乘性。大慧。所謂執著彼迷惑法自相同相。能成聲聞乘性。大慧。是名迷惑法能生能成聲聞乘性。大慧。云何愚癡凡夫分別迷惑法。而能生彼辟支佛乘性。大慧。所謂執著彼迷惑法。觀察諸法自相同相不樂憤鬧。能生辟支佛乘性。大慧。是名迷惑法能生能成辟支佛乘性。大慧。云何智者即分別彼迷惑之法。能生佛乘性。大慧。所謂見彼能見可見惟是自心。而不分別有無法故。大慧。如是觀察迷惑之法。能生能成如來乘性。大慧。如是名為性義。大慧。何者一切毛道凡夫。即分別彼迷惑之法見種種事。能生世間所有乘性。以觀察諸法如是如是決定不異。是故大慧。彼迷惑法愚癡凡夫。虛妄分別種種法體。大慧。彼迷惑法非是實事非不實事。何以故。大慧。聖人觀察彼迷惑法不虛妄分別。是故聖人能轉心意意識身相。離煩惱習故。是故聖人轉彼迷惑法。名為真如。大慧。此名何等法。大慧。此名真如法。離分別法故。大慧。為此義故。我重宣說真如法體離分別法。彼真如中無彼虛妄分別法故。大慧菩薩復白佛言。世尊。彼迷惑法為有為無。佛告大慧。彼迷惑法執著種種相故名有。大慧。彼迷惑法於妄想中若有者。一切聖人皆應不離。執著有無虛妄法故。大慧。如外道說十二因緣。有從因生不從因生。此義亦如是。大慧言。世尊。若迷惑法如幻見者。此迷惑法異於迷惑。以迷惑法能生法故。佛告大慧。大慧。非迷惑法生煩惱過。大慧。若不分別迷惑法者不生諸過。復次大慧。一切幻法依於人功呪術而生。非自心分別煩惱而生。是故大慧。彼迷惑法不生諸過。惟是愚癡人見迷惑法故。大慧。愚癡凡夫執著虛妄微細之事。而生諸過非謂聖人。爾時世尊重說偈言

聖不見迷惑	世間亦無實
迷惑即是實	實法次迷惑
捨離諸迷惑	若有相生者
即彼是迷惑	不淨猶如翳

復次大慧。汝不得言幻是無故一切諸法亦無如幻。大慧言。世尊。為執著諸法如幻相故。言諸法如幻。為執著諸法顛倒相故。言諸法如幻也。世尊。若執著諸法如幻相者。世尊不得言一切法皆如幻相。若執著諸法顛倒相故言如幻者。不得言一切法如

幻。何以故。世尊。色有種種因相見故。世尊。無有異因色有諸相可見如幻。是故世尊。不得說言執著諸法一切如幻。佛告大慧。非謂執著種種法相。說言諸法一切如幻。大慧。諸法顛倒速滅如電故言如幻。大慧。一切諸法譬如電光即見即滅。凡夫不見。大慧。一切諸法亦復如是。以一切法自心分別同相異相。以不能觀察故不如實見。以妄執著色等法故。爾時世尊重說偈言

非見色等法 說言無幻法
故不違上下 我說一切法
不見有本性 如幻無生體

大慧菩薩復白佛言。世尊。如世尊說諸法不生。復言如幻。將無世尊前後所說自相違耶。以如來說一切諸法不如幻故。佛告大慧。我說一切法不生如幻者。不成前後有相違過。何以故。以諸一切愚癡凡夫不見生法及不生法。不能覺知自心有無外法有無。何以故。以不能見不生法故。大慧。我如是說諸法前後無有相違。大慧。我遮外道建立因果義不相當。是故我說諸法不生。大慧。一切外道愚癡群聚作如是說。從於有無生一切法。不說自心分別執著因緣而生。大慧。我說諸法有亦不生無亦不生。是故大慧。我說諸法不生不滅。大慧。我說一切諸法有者。護諸弟子令知二法。何等為二。一者攝取諸世間故。二者為護諸斷見故。何以故。以依業故有種種身攝六道生。是故我說言有諸法攝取世間。大慧。我說一切法如幻者。為令一切愚癡凡夫畢竟能離自相同相故。以諸凡夫癡心執著墮於邪見。以不能知但是自心虛妄見故。令離執著因緣生法。是故我說一切諸法如幻如夢無有實體。何以故。若不如是說者。愚癡凡夫執邪見心。欺誑自身及於他身。離如實見一切法故。大慧。云何住如實見。謂入自心見諸法故。爾時世尊重說偈言

如汝言諸法 一切不生者
是則謗因果 不生如實見
我說有生法 攝受諸世間
見諸法同幻 不取諸見相

復次佛告聖者大慧菩薩言。大慧。我今為諸菩薩摩訶薩。說名句字身相。以諸菩薩善知名句字身相故。依名句字身相。速得阿耨多羅三藐三菩提。得菩提已為眾生說名句字相。大慧菩薩白佛言。善哉世尊。惟願速說。大慧。何者名身。謂依何等。何等法作名名身事物名異義一。大慧。是名我說名身。大慧。何者是句身。謂義事決定究竟見義故。大慧。是名我說句身。大慧。何者是字身。謂文句畢竟故。大慧。復次名身者。依何等法了別名句。能了知自形相故。大慧。復次句身者。謂句事畢竟故。大慧。復次名身者。所謂諸字從名差別。從阿字乃至呵字。名為名身。大慧。復次字身者。謂聲長短音韻高下。名為字身。大慧。復次句身者。謂巷路行迹。如人象馬諸獸行迹等。得名為句。大慧。復次名字者。謂無色四陰依名而說。大慧。復次名字相者。謂能了別名字相故。大慧。是名名句字身相。大慧。如是名句字相。汝應當學為

人演說。爾時世尊重說偈言

名身與句身 及字身差別
凡夫癡計著 如象溺深泥

復次大慧。未來世中無智慧者。以邪見心不知如實法故。因世間論自言智者。有智者問如實之法。離邪見相一異俱不俱。而彼愚人作如是言。是問非是非正念問。謂色等法常無常為一為異。如是涅槃有為。諸行為一為異。相中所有能見所見為一為異。作者所作為一為異。四大中色香味觸為一為異能見所見為一為異。泥團微塵為一為異。智者所知為一為異。如是等上上次第相。上上無記置答。佛如是說是為謗我。大慧。而我不說如是法者。為遮外道邪見說故。何以故。大慧。外道等說謂身即命身異命異。如是等法外道所說是無記法。大慧。外道迷於因果義故。是故無記。非我法中名無記也。大慧。我佛法中離能見可見虛妄之想無分別心。是故我法中無有置答。諸外道等執著可取能取。不知但是自心見法。為彼人故我說言有四種問法。無記置答非我法中。大慧。諸佛如來應正遍知。為諸眾生有四種說言置答者。大慧。為待時故說如是法。為根未熟非為根熟。是故我說置答之義

復次大慧。一切諸法若離作者及因不生。以無作者故。是故我說諸法不生。佛告大慧。一切諸法無有體相。大慧白佛言。世尊。何故一切諸法無實體相。佛告大慧。自智觀察一切諸法自相同相不見諸法。是故我說一切諸法無實體相。佛告大慧。一切諸法亦無取相。大慧言。世尊。以何義故一切諸法亦無取相。佛告大慧。自相同相無法可取。是故我說無法可取。佛告大慧。一切諸法亦無捨相。大慧言。世尊。何故諸法亦無捨相。佛告大慧。觀察自相同相法無法可捨。是故我說一切諸法亦無捨相。佛告大慧。諸法不滅。大慧言。世尊。何故一切諸法不滅。佛告大慧。觀一切法自相同相無體相故。是故我說諸法不滅。佛告大慧。諸法無常。大慧言。世尊。何故一切諸法無常。佛告大慧。一切諸法常無常想常不生相。是故我說諸法無常。復次大慧。我說一切諸法無常。大慧言。世尊。何故一切諸法無常。佛告大慧。以相不生以不生體相。是故常無常。是故我說諸法無常。爾時世尊重說偈言

記論有四種 直答反質答
分別答置答 以制諸外道
有及非有生 僧佉毘世師
而說悉無記 彼作如是說
正智慧觀察 自性不可得
是故不可說 及說無體相

爾時聖者大慧菩薩摩訶薩白佛言。世尊。惟願世尊。為我等說須陀洹等行差別相。我及一切菩薩摩訶薩等。善知須陀洹等修行相已。如實知須陀洹斯陀含阿那含阿羅漢等。如是如是為眾生說。眾生聞已入二無我相淨二種障。次第進取地地勝相。得如來不可思議境界修行。得修行處已。如如意寶隨眾生念受用境界身口意行故。佛告大

慧言。善哉善哉。善哉大慧。諦聽諦聽。今為汝說。大慧白佛言。善哉世尊。唯然聽受。佛告大慧言。大慧。須陀洹有三種果差別。大慧言。何等三種。佛告大慧。謂下中上。大慧。何者須陀洹下。謂三有中七返受生。大慧。何者為中。謂三生五生入於涅槃。大慧。何者為上。謂即一生入於涅槃。大慧。是三種須陀洹有三種結。謂下中上。大慧。何者三結。謂身見疑戒取。大慧。彼三種結上上勝進得阿羅漢果大慧。身見有二種。何等為二。一者俱生。二者虛妄分別而生。如因緣分別法故。大慧。譬如依諸因緣法相虛妄分別而生實相。彼因緣法中非有非無。以分別有無非實相故。愚癡凡夫執著種種法相。如諸禽獸見於陽炎取以為水。大慧。是名須陀洹分別身見。何以故。以無智故。無始世來虛妄取相故。大慧。此身見垢見人無我乃能遠離。大慧。何者須陀洹俱生身見。所謂自身他身俱見。彼二四陰。無色色陰生時。依於四大及四塵等。彼此因緣和合生色。而須陀洹知已能離有無邪見斷於身見。斷身見已不生貪心。大慧。是名須陀洹身見之相。大慧。何者須陀洹疑相。謂得證法善見相已。先斷身見及於二見分別之心。是故於諸法中不生疑心。復不生心於餘尊者以為尊相為淨不淨故。大慧。是名須陀洹疑相。大慧。何者須陀洹戒取相。謂善見受生處苦相故。是故不取戒相。大慧。戒取者。謂諸凡夫持戒精進種種善行。求樂境界生諸天中。彼須陀洹不取是相而取自身內證迴向進趣勝處。離諸妄想修無漏戒分。大慧。是名須陀洹戒取相。大慧。須陀洹斷三結煩惱離貪瞋癡。大慧白佛言。世尊。世尊說眾多貪。須陀洹離何等貪。佛告大慧。須陀洹遠離與諸女人和合。不為現在樂種未來苦因。遠離打擗嗚抱眇視。大慧。須陀洹不生如是貪心。何以故。以得三昧樂行故。大慧。須陀洹遠離如是等貪。非離涅槃貪。大慧。何者斯陀含果相。謂一往見色相現前生心。非虛妄分別想見。以善見禪修行相故。一往來世間。便斷苦盡入於涅槃。是名斯陀含。大慧。何者阿那含相。謂於過去現在未來色相中生有無心。以見使虛妄分別心。諸結不生。不來故名阿那含。大慧。何者阿羅漢相。謂不生分別思惟可思惟。三昧解脫力通煩惱苦等分別心故。名阿羅漢

大慧菩薩白佛言。世尊。說三種阿羅漢。此說何等羅漢名阿羅漢。世尊為說得決定寂滅羅漢。為發菩提願善根忘善根羅漢為化應化羅漢。佛告大慧。為說得決定寂滅聲聞羅漢非餘羅漢。大慧。餘羅漢者。謂曾修行菩薩行者。復有應化佛所化羅漢。本願善根方便力故。現諸佛土生大眾中莊嚴諸佛大會眾故。大慧。分別去來說種種事。遠離證果能思惟所思惟可思惟故。以見自心為見所見說得果相。復次大慧。若須陀洹生如是心。此是三結。我離三結者。大慧。是名見三法墮於身見。彼若如是不離三結。大慧。是故須陀洹不生如是心。復次大慧。若欲遠離禪無量無色界者。應當遠離自心見相遠離少相。寂滅定三摩跋提相故。大慧。若不如是。彼菩薩心見諸法以惟心故。爾時世尊重說偈言

諸禪四無量	無色三摩提
少相寂滅定	一切心中無
逆流修無漏	及於一往來
往來及不還	羅漢心迷沒
思可思能思	遠離見真諦
惟是虛妄心	能知得解脫

復次大慧。有二種智。何等為二。一者觀察智。二者虛妄分別取相住智。大慧。何者觀察智。謂何等智觀察一切諸法體相。離於四法無法可得。是名觀察智。大慧。何者四法。謂一異俱不俱。是名四法。大慧。若離四法一切法不可得。大慧。若欲觀察一切法者。當依四法而觀諸法。大慧。妄想分別取相住智者。所謂執著堅熱濕動。虛妄分別四大相故。執著建立。因。譬喻相故建立非實法以為實。大慧。是名虛妄分別執著取相住持智。大慧。是名二種智相。大慧。諸菩薩摩訶薩。畢竟知此二相進趣法無我相。善知真實智地行相。知已即得初地得百三昧。依三昧力見百佛見百菩薩。能知過去未來各百劫事。照百佛世界。照百佛世界已。善知諸地上上智相。以本願力故。能奮迅示現種種神通。於法雲地中依法雨授位。證如來內究竟法身智慧地。依十無量善根願轉。為教化眾生種種應化。自身示現種種光明。以得自身修行證智三昧樂故

復次大慧。菩薩摩訶薩應善知四大及四塵相。大慧。云何菩薩善知四大及四塵相。大慧菩薩摩訶薩。應如是修行。所言實者。謂無四大處。觀察四大本來不生。如是觀已復作是念。言觀察者惟自心見虛妄覺知。以見外塵無有實物。惟是名字分別心見。所謂三界離於四大及四塵相。見如是已離四種見。見清淨法離我我所。住於自相如實法中。大慧。住自相如實法中者。謂住建立諸法無生自相法中。大慧。於四大中云何有四大。大慧。謂妄想分別柔軟濕潤。生內外水大。大慧。妄想分別煖增長力。生內外火大。大慧。妄想分別輕轉動相。生內外風大。大慧。妄想分別所有堅相。生內外地大。大慧。妄想分別內外共虛空生內外想。以執著虛妄內外邪見。五陰聚落四大及四塵生故。佛告大慧。識能執著種種境界樂求異道。取彼境界故。大慧。四大有四。謂色香味觸。大慧。四大無因。何以故。謂地自體形相長短不生四大相故。大慧。依形相大小上下容貌而生諸法。不離形相大小長短而有法故。是故大慧。外道虛妄分別四大及四塵。非我法中如此分別。復次大慧。我為汝說五陰體相。大慧。何者五陰相。謂色受想行識。大慧。四陰無色相。謂受想行識。大慧。色依四大生。四大彼此不同相。大慧。無色相法同如虛空。云何得成四種數相。大慧。譬如虛空離於數相。而虛妄分別此是虛空。大慧。陰之數相離於諸相。離有無相離於四相。愚癡凡夫說諸數相非謂聖人。大慧。我說。諸相如幻種種形相離一二相依假名說。如夢鏡像不離所依。大慧。如聖人智修行分別見五陰虛妄。大慧。是名五陰無五陰體相。大慧。汝今應離如是虛妄分別之相。離如是已為諸菩薩說離諸法相寂靜之法。為遮外道諸見之相

。大慧。說寂靜法得證清淨無我之相入遠行地。入遠行地已得無量三昧自在如意生身故。以得諸法如幻三昧故。以得自在神通力修行進趣故。隨一切眾生自在用如大地故。大慧。譬如大地一切眾生隨意而用。大慧。菩薩摩訶薩隨眾生用亦復如是。復次大慧。外道說有四種涅槃。何等為四。一者自體相涅槃。二者種種相有無涅槃。三者自覺體有無涅槃。四者諸陰自相同相斷相續體涅槃。大慧。是名外道四種涅槃。非我所說。大慧。我所說者。見虛妄境界分別識滅名為涅槃。大慧白佛言。世尊。世尊可不說八種識耶。佛告大慧。我說八種識。大慧言。若世尊說八種識者。何故但言意識轉滅。不言七識轉滅。佛告大慧。以依彼念觀有故。轉識滅七識亦滅。復次大慧。意識執著取境界生。生已種種熏習增長阿梨耶識。共意識故。離我我所相。著虛妄空而生分別。大慧。彼二種識無差別相。以依阿梨耶識因觀自心見境。妄想執著生種種心。猶如束竹迭共為因。如大海波。以自心見境界風吹而有生滅。是故大慧。意識轉滅七種識轉滅。爾時世尊重說偈言

我不取涅槃	亦不捨作相
轉滅虛妄心	故言得涅槃
依彼因及念	意趣諸境界
識與心作因	為識之所依
如水流枯竭	波浪則不起
如是意識滅	種種識不生

復次大慧。我為汝說虛妄分別法體差別相。汝及諸菩薩摩訶薩。善分別知虛妄法體差別之相。離分別所分別法。善知自身內修行法。遠離外道能取可取境界。遠離種種虛妄分別因緣法體相。遠離已不復分別虛妄之相。大慧。何者虛妄分別法體差別之相。大慧。虛妄分別自體差別相有十二種。何等為十二。一者言語分別。二者可知分別。三者相分別。四者義分別。五者實體分別。六者因分別。七者見分別。八者建立分別。九者生分別。十者不生分別。十一者和合分別。十二者縛不縛分別。大慧。是名分別自體相差別法相。大慧。言語分別者。謂樂著種種言語美妙音聲。大慧。是名言語分別。大慧。可知分別者。謂作是思惟應有前法實事之相。聖人修行知。依彼法而生言語。如是分別。大慧。是名可知分別。大慧。相分別者。謂即彼可知境界中熱濕動堅種種相執以為實。如空陽焰諸禽獸見生於水想。大慧。是名相分別。大慧。義分別者。謂樂金銀等種種實境界。大慧。是名義分別。大慧。自體分別者。謂專念有法自體形相。此法如是如是不異。非正見見分別。大慧。是名自體分別。大慧。因分別者。謂何等何等因。何等何等緣。有無了別因。相生了別相。大慧。是名因分別。大慧。見分別者。謂有無一異俱不俱。邪見外道執著分別。大慧。是名見分別。大慧。建立分別者。謂取我我所相說虛妄法。大慧。是名建立分別。大慧。生分別者。謂依眾緣有無法中生執著心。大慧。是名生分別。大慧。不生分別者。謂一切法本來不生。以本無故依因緣有而無因果。大慧。是名無生分別。大慧。和合分別者。謂何等何等

法和合。如金縷共。何等何等法和合。如金縷和合。大慧。是名和合分別。大慧。縛不縛分別者。謂縛因執著如所縛。大慧。如人方便結繩作結。結已還解。大慧。是名縛不縛分別。大慧。是名虛妄分別法體差別之相。以此虛妄分別法體差別之相。一切凡夫執著有無故。執著法相種種因緣。是故大慧。分別法體差別之相。見種種法執著為實。如依於幻見種種事。凡夫分別知異於幻有如是法。大慧。我於種種法中不異幻說。亦非不異。何以故。若幻異於種種法者。不應因幻而生種種。若幻即是種種法者不應異見。此是幻此是種種而見差別。是故我說不異非不異。是故大慧。汝及諸菩薩摩訶薩。莫分別幻有實無實。爾時世尊重說偈言

心依境界縛	知覺隨境生
於寂靜勝處	生平等智慧
妄想分別有	於緣法則無
取虛妄迷亂	不知他力生
種種緣生法	即是幻不實
彼有種種想	妄分別不成
彼想則是過	皆從心縛生
愚癡人無智	分別因緣法
此諸妄想體	即是緣起法
妄想有種種	眾緣中分別
世諦第一義	第三無因生
妄想說世諦	斷則聖境界
譬如修行者	一事見種種
彼法無種種	分別相如是
如目種種瞽	妄想見眾色
瞽無色非色	無智取法爾
如真金離垢	如水離泥濁
如虛空離雲	真法淨亦爾
無有妄想法	因緣法亦無
取有及謗無	分別觀者見
妄想若無實	因緣法若實
離因應生法	實法生實法
因虛妄名法	見諸因緣生
想名不相離	如是生虛妄
虛妄本無實	則度諸妄想
然後知清淨	是名第一義
妄想有十二	緣法有六種

內身證境界	彼無有差別
五法為真實	及三種亦爾
修行者行此	不離於真如
眾生及因緣	名分別彼法
彼諸妄想相	從彼因緣生
真實智善觀	無緣無妄想
第一義無物	云何智分別
若真實有法	遠離於有無
若離於有無	云何有二法
分別二法體	二種法體有
虛妄見種種	清淨聖境界
見妄想種種	因緣中分別
若異分別者	則墮於外道
妄想說妄想	因見和合生
離二種妄想	即是真實法

爾時大慧菩薩摩訶薩復白佛言。世尊。惟願為說自身內證聖智修行相及一乘法。不由於他遊行一切諸佛國土通達佛法。佛告聖者大慧菩薩言。善哉善哉。善哉大慧。諦聽諦聽。當為汝說。大慧言。善哉世尊。唯然受教。佛告大慧。菩薩摩訶薩離阿含名字法諸論師所說分別法相在寂靜處獨坐思惟。自內智慧觀察諸法不隨他教。離種種見虛妄之相。當勤修行入如來地上上證智。大慧。是名自身內證聖智修行之相。大慧。更有三界中修一乘相。大慧。何者一乘相。大慧。如實覺知一乘道故。我說名一乘。大慧。何者如實覺知一乘道相。謂不分別可取能取境界。不生如是諸法相住。以不分別一切諸法故。大慧。是名如實覺知一乘道相。大慧。如是覺知一乘道相。一切外道聲聞辟支佛梵天等未曾得知。惟除於我。大慧。故我說名一乘道相。大慧白佛言。世尊。世尊何因說於三乘不說一乘。佛告大慧。聲聞緣覺不能自知證於涅槃。是故我說惟一乘道。大慧。以一切聲聞辟支佛。隨受佛教厭離世間。自不能得解脫。是故我說惟一乘道。復次大慧。一切聲聞辟支佛。不離智障。不離業煩惱習氣障故。是故我說惟一乘道。大慧。聲聞辟支佛。未證法無我。未得離不可思議變易生。是故我為諸聲聞故。說一乘道。大慧。聲聞辟支佛。若離一切諸過熏習。得證法無我。爾時離於諸過。三昧無漏。醉法覺已修行出世間無漏界中一切功德。修行已得不可思議自在法身。爾時世尊重說偈言

天乘及梵乘	聲聞緣覺乘
諸佛如來乘	我說此諸乘
以心有生滅	諸乘非究竟
若彼心滅盡	無乘及乘者

無有乘差別
引導眾生故
解脫有三種
不離二種障
譬如海浮木
諸聲聞亦然
離諸隨煩惱
味著三昧樂
無有究竟趣
得諸三昧身
譬如昏醉人
得佛無上體

我說為一乘
分別說諸乘
及二法無我
遠離真解脫
常隨波浪轉
相風所漂蕩
熏習煩惱縛
安住無漏界
亦復不退還
無量劫不覺
酒消然後悟
是我真法身

入楞伽經卷第四

佛心品第四

爾時佛告聖者大慧菩薩言。大慧。我今為汝說意生身修行差別。大慧。諦聽諦聽。當為汝說。大慧白佛言。善哉世尊。唯然受教。佛告大慧。有三種意生身。何等為三。一者得三昧樂三摩跋提意生身。二者如實覺知諸法相意生身。三者種類生無作行意生身。菩薩從於初地如實修行。得上上地證智之相。大慧。何者菩薩摩訶薩。得三昧樂三摩跋提意生身。謂第三第四第五地中。自心寂靜行種種行。大海心波轉識之相三摩跋提樂。名意識生。以見自心境界故。如實知有無相。大慧。是名意生身相。大慧。何者如實覺知諸法相意生身。謂菩薩摩訶薩。於八地中觀察覺了。得諸法無相如幻等法悉無所有。身心轉變得如幻三昧及餘無量三摩跋提樂門。無量相力自在神通。妙華莊嚴迅疾如意。猶如幻夢水中月鏡中像。非四大生似四大相具足身分。一切修行得如意自在。隨入諸佛國土大眾。大慧。是名如實覺知諸法相意生身。大慧。何者種類生無作行意生身。謂自身內證一切諸法。如實樂相法相樂故。大慧。是名種類生無作行意生身。大慧。汝當於彼三種身相觀察了知。爾時世尊重說偈言

我乘非大乘 非說亦非字
非諦非解脫 非無有境界
然乘摩訶衍 三摩提自在
種種意生身 自在華莊嚴

爾時聖者大慧菩薩。復白佛言。世尊。如世尊說。善男子善女人行五無間業。世尊。何等是五無間業。而善男子善女人。行五無間入於無間。佛告聖者大慧菩薩言。善哉善哉。善哉大慧。諦聽諦聽。當為汝說。大慧白佛言。善哉世尊。唯然受教。佛告大慧。五無間者。一者殺母。二者殺父。三者殺阿羅漢。四者破和合僧。五者惡心出佛身血。大慧。何者眾生母。謂更受後生貪喜俱生如緣母立。大慧。何者為父。謂無明為父生六入聚落。大慧。斷彼二種能生根本。名殺父母。大慧。何者殺阿羅漢。謂諸使如鼠毒發。拔諸使怨根本不生。大慧。是名殺阿羅漢。大慧。何者破和合僧。謂五陰異相和合積聚。究竟斷破。名為破僧。大慧。何者惡心出佛身血。謂自相同相見外自心相八種識身。依無漏三解脫門。究竟斷八種識佛。名為惡心出佛身血。大慧。是名內身五種無間。若善男子善女人行此無間。得名無間者。無間者名證如實法故

復次大慧。我為汝等說外五種無間之相。諸菩薩聞是義已。於未來世不生疑心。大慧。何者是外五種無間。謂殺父母羅漢。破和合僧。出佛身血。行此無間者。於彼三種解脫門中。不能得證一一解脫。除依如來力住持。應化聲聞菩薩如來神力。為五種罪人懺悔疑心。斷此疑心令生善根。為彼罪人作應化說。大慧。若犯五種無間罪者。畢竟不得證入道分。除見自心惟是虛妄。離身資生所依住處分別見我我所相。於無量無邊劫中。遇善知識。於異道身離於自心虛妄見過。爾時世尊重說偈言

貪愛名為母 無明則為父
了境識為佛 諸使為羅漢
陰聚名為僧 無間斷相續
更無有業間 得真如無間

爾時聖者大慧菩薩。復白佛言。世尊。惟願為我說諸如來知覺之相。佛告聖者大慧菩薩摩訶薩言。大慧。如實知人無我法無我。如實能知二種障故。遠離二種煩惱。大慧。是名如來如實知覺。大慧。聲聞辟支佛得此法者。亦名為佛。大慧。是因緣故我說一乘。爾時世尊重說偈言

善知二無我 二障二煩惱
得不思議變 是名佛知覺

爾時聖者大慧菩薩。復白佛言。世尊。世尊何故於大眾中說如是言。我是過去一切佛。及說種種本生經。我於爾時作頂生王。六牙大象。鸚鵡鳥。毘耶娑仙人。帝釋王。善眼菩薩。如是等百千經皆說本生。佛告聖者大慧菩薩摩訶薩言。大慧。依四種平等。如來應正遍知。於大眾中唱如是言。我於爾時作拘留孫佛。拘那含牟尼佛。迦葉佛。何等為四。一者字平等。二者語平等。三者法平等。四者身平等。大慧。依此四種平等法故。諸佛如來在於眾中說如是言。大慧。何者字平等。謂何等字。過去佛名佛。我同彼字亦名為佛。不過彼字與彼字等無異無別。大慧。是名字平等。大慧。何者諸佛語平等。謂過去佛有六十四種美妙梵聲言語說法。我亦六十四種微妙梵聲言語說法。大慧。未來諸佛亦以六十四種微妙梵聲言語說法。不增不減。不異無差別。迦陵頻伽梵聲美妙。大慧。是名諸佛語平等。大慧。何者諸佛身平等。大慧。我及諸佛法身色身相好莊嚴。無異無差別。除依可度眾生。彼彼眾生種種生處。諸佛如來現種種身。大慧。是名諸佛身平等。大慧。云何諸佛法平等。謂彼佛及我。得三十七菩提分法十力四無畏等。大慧。是名諸佛法平等。大慧。依此四種平等法故。如來於大眾中作如是說。我是過去頂生王等。爾時世尊重說偈言

迦葉拘留孫 拘那含是我
說諸佛子等 依四平等故

大慧菩薩復白佛言。世尊。如來說言。我何等夜證大菩提。何等夜入般涅槃。我於中間不說一字。佛言非言。世尊依何等義說如是語。佛語非語。佛告大慧言。大慧。如來依二種法說如是言。何者為二。我說如是。一者依自身內證法。二者依本住法。我依此二法作如是言。大慧。云何依自身內證法。謂彼過去諸佛如來所證得法。我亦如是證得不增不減。自身內證諸境界行。離言語分別相離二種字故。大慧。何者本住法。大慧。謂本行路平坦。譬如金銀真珠等寶在於彼處。大慧。是名法性本住處。大慧。諸佛如來出世不出世。法性法界法住法相法證常住如城本道。大慧。譬如有人行曠野中。見向本城平坦正道即隨入城。入彼城已受種種樂作種種業大慧。於意云何。彼人始作是道隨入城耶。始作種種諸莊嚴耶。大慧白佛。不也世尊。大慧。我及過

去一切諸佛。法性法界法住法相法證常住亦復如是。大慧。我依此義於大眾中作如是說。我何等夜得大菩提。何等夜入般涅槃此二中間不說一字。亦不已說當說現說。爾時世尊重說偈言

我何夜成道	何等夜涅槃
於此二中間	我都無所說
內身證法性	我依如是說
十方佛及我	諸法無差別

爾時聖者大慧菩薩。復請佛言。惟願世尊。說一切法有無相。令我及餘菩薩大眾。得聞是已離有無相。疾得阿耨多羅三藐三菩提。佛告聖者大慧菩薩言。善哉善哉善哉大慧。諦聽諦聽。當為汝說。大慧白佛言。善哉世尊。唯然受教。佛告大慧。世間人多墮於二見。何等二見。一者見有。二有見無。以見有諸法見無諸法故。非究竟法生究竟想。大慧。云何世間墮於有見謂實有因緣而生諸法非不實有。實有法生非無法生。大慧。世間人如是說者。是名為說無因無緣及謗世間。無因無緣而生諸法。大慧。世間人云何墮於無見。謂說言貪瞋癡。實有貪瞋癡。而復說言無貪瞋癡。分別有無。大慧。若復有人作如是言。無有諸法。以不見諸物相故。大慧。若復有人作如是言。聲聞辟支佛。無貪無瞋無癡。復言先有。此二人者。何等人勝何等人不如。大慧菩薩言。若人言先有貪瞋癡後時無。此人不。佛告大慧。善哉善哉。善哉大慧。汝解我問。大慧。非但言先實有貪瞋癡。後時言無同衛世師等。是故不如。大慧。非但不如滅一切聲聞辟支佛法。何以故。大慧。以實無內外諸法故。以非一非異故。以諸煩惱非一非異故。大慧。貪瞋癡法內身不可得。外法中亦不可得。無實體故。故我不許。大慧。我不許者。不許有貪瞋癡。是故彼人滅聲聞辟支佛法。何以故。諸佛如來知寂靜法。聲聞緣覺不見法故。以無能縛所縛因故。大慧。若有能縛必有所縛。若有所縛必有能縛因。大慧。如是說者名滅諸法。大慧。是名無法相。大慧我依此義餘經中說。寧起我見如須彌山。而起憍慢。不言諸法是空無也。大慧。增上慢人言諸法無者。是滅諸法。墮自相同相見故。以見自心見法故。以見外物無常故。諸相展轉彼彼差別故。以見陰界入相續體。彼彼因展轉而生。以自心虛妄分別。是故大慧。如此人者滅諸佛法。爾時世尊重說偈言

有無是二邊	以為心境界
離諸境界法	平等心寂靜
無取境界法	滅非有非無
如真如本有	彼是聖境界
本無而有生	生已還復滅
非有非無生	彼不住我教
非外道非佛	非我亦非餘
從因緣不成	云何得言有

若因緣不生 云何而言無
邪見論生法 妄想計有無
若知無所生 亦知無所滅
觀世悉空寂 彼不墮有無

爾時聖者大慧菩薩。復白佛言。世尊。惟願如來應正遍知天人師。為我及諸一切菩薩。建立修行正法之相。我及一切菩薩摩訶薩。善知修行正法相已。速得成就阿耨多羅三藐三菩提。不隨一切虛妄覺觀魔事故。佛告大慧菩薩言。善哉善哉。善哉大慧。諦聽諦聽。我為汝說。大慧言。善哉世尊。唯然受教。佛告大慧言。大慧。有二種法。諸佛如來菩薩聲聞辟支佛。建立修行正法之相。何等為二。一者建立正法相。二者說建立正法相。大慧。何者建立正法相。謂自身內證諸勝法相。離文字語言章句。能取無漏正戒諸證地修行相法。離諸外道虛妄覺觀諸魔境界。降伏一切外道諸魔。顯示自身內證之法如實修行。大慧。是名建立正法之相。大慧。何者建立說法之相。謂說九部種種教法。離於一異有無取相。先說善巧方便。為令眾生入所樂處。謂隨眾生信彼彼法說彼彼法。大慧。是名建立說法相。大慧。汝及諸菩薩。應當修學如是正法。爾時世尊重說偈言

建立內證法 及說法相名
若能善分別 不隨他教相
實無外諸法 如凡夫分別
若諸法虛妄 何故取解脫
觀察諸有為 生滅等相續
增長於二見 不能知因緣
涅槃離於識 唯此一法實
觀世間虛妄 如幻夢芭蕉
雖有貪瞋癡 而無有作者
從愛生諸陰 有皆如幻夢

爾時聖者大慧菩薩。復請佛言。世尊。惟願如來應正遍知。為諸菩薩說不實妄想。何等法中不實妄想。佛告大慧菩薩言。善哉善哉。善哉大慧。汝為安隱一切眾生。饒益一切眾生。安樂一切眾生。哀愍一切世間天人。請我此事。大慧。諦聽諦聽。當為汝說。大慧言。善哉世尊。唯然受教。佛告大慧。一切眾生執著不實虛妄想者。從見種種虛妄法生。以著虛妄能取可取諸境界故。入自心見生虛妄想故。墮於有無二見朋黨非法聚中。增長成就外道虛妄異見熏習故。大慧。以取外諸戲論義故。起於虛妄心心數法猶如草束分別我我所法。大慧。以是義故生不實妄想。大慧白佛言。世尊。若諸眾生執著不實虛妄想者。從見種種虛妄法生。執著虛妄能取可取一切境界。入自心見生虛妄想。墮於有無二見朋黨分別聚中。增長成就外道虛妄異見熏習。以取外諸戲論之義不實妄想。起於虛妄心心數法。猶如草束取我我所者。世尊。如彼彼依外種

種境界種種相。墮有墮無朋黨相中。離有無見相。世尊。第一義諦亦應如是。遠離阿含聖所說法。遠離諸根。遠離建立三種之法譬喻因相。世尊。云何一處種種分別執著。種種虛妄想生。何故不著第一義諦。虛妄分別而生分別。世尊。世尊如是說法。非平等說無因而說何以故。一處生一處不生故。若世尊如是說者墮二朋黨。以見執著虛妄分別而生分別。以世尊說如世幻師。依種種因緣生種種色像。以世尊自心虛妄分別。以世尊言種種虛妄。若有若無不可言說為離分別。如是如來墮世間論。入邪見心朋黨聚中。佛告大慧。我分別虛妄不生不滅。何以故。不生有無分別相故。不見一切外有無故。大慧。以見自心如實見故。虛妄分別不生不滅。大慧。我此所說。惟為愚癡凡夫而說自心分別。分別種種隨先心生。分別種種有相執著。何以故。若不說者。愚癡凡夫不離自心虛妄覺知。不離執著我我所見。不離因果諸因緣過。如實覺知二種心故。善知一切諸地行相。善知諸佛自身所行內證境界。轉五法體見分別相入如來地。大慧。因是事故。我說一切諸眾生等。執著不實虛妄生心。自心分別種種諸義。以是義故。一切眾生知如實義而得解脫。爾時世尊重說偈言

諸因及與緣	從此生世間
妄想著四句	彼不知我說
世有無不生	離有無不生
云何愚分別	依因緣生法
若能見世間	有無非有無
轉於虛妄心	得真無我法
諸法本不生	故依因緣生
諸緣即是果	從果不生有
從果不生果	若爾有二果
若有二果者	果中果難得
離念及所念	觀諸有為法
見諸唯心法	故我說唯心
量體及形相	離緣及諸法
究竟有真淨	我說如是量
假名世諦我	彼則無實事
諸陰陰假名	假名非實法
有四種平等	相 . 因 . 生 . 無我
如是四平等	是修行者法
轉一切諸見	離分別分別
不見及不生	故我說唯心
非有非無法	離有無諸法
如是離心法	故我說惟心

真如空實際	涅槃及法界
意身身心等	故我說唯心
分別依熏縛	心依諸境生
眾生見外境	故我說唯心
可見外法無	心盡見如是
身資生住處	故我說唯心

爾時聖者大慧菩薩。復白佛言。世尊。如來說言。如我所說。汝及諸菩薩。莫著音聲言語之義。世尊。云何菩薩不著言語之義。世尊。何者為言語。何者為義。佛告聖者大慧菩薩言。善哉善哉。善哉大慧。當為汝說。大慧言。善哉世尊。唯然受教。佛告大慧。何者為聲。謂依無始熏習言語名字和合分別。因於喉鼻齒頰脣舌和合動轉。出彼言語分別諸法。是名為聲。大慧。何者為義。菩薩摩訶薩依聞思修聖智慧力。於空閑處獨坐思惟。云何涅槃趣涅槃道。觀察內身修行境界。地地處處修行勝相。轉彼無始熏習之因。大慧。是名菩薩善解義相。復次大慧。云何菩薩摩訶薩。善解言語義。大慧。菩薩見言語聲義不一不異。見義言語聲不一不異。大慧。若言言語離於義者。不應因彼言語聲故而有於義。而義依彼言語了別。大慧。如依於燈了別眾色。大慧。譬如有人然燈觀察種種珍寶。此處如是如是。彼處如是如是。大慧。菩薩依言語聲證離言語。入自內身修行義故。復次大慧。一切諸法不生不滅。自性本來入於涅槃。三乘一乘五法心諸法體等同。言語聲義依眾緣取相。墮有無見諦於諸法。見諸法體各住異相分別異相。如是分別已。見種種法相如幻。見種種分別。大慧。譬如幻種種異異分別。非謂聖人是凡夫見。爾時世尊重說偈言

分別言語聲	建立於諸法
以彼建立故	故墮於惡道
五陰中無我	我中無五陰
不如彼妄相	亦復非是無
凡夫妄分別	見諸法實有
若如彼所見	一切應見真
一切法若無	染淨亦應無
彼見無如是	亦非無所有

復次大慧。我今為汝說智識相。汝及諸菩薩摩訶薩。應善知彼智識之相如實修行智識相故。疾得阿耨多羅三藐三菩提。大慧。有三種智。何等為三。一者世間智。二者出世間智。三者出世間上上智。大慧。識者生滅相。智者不生滅相。復次大慧。識者墮於有相無相。墮彼有無種種相因。大慧。智相者遠離有相無相有無因相。名為智相。復次大慧。集諸法者名為識相。不集諸法名為智相。大慧。智有三種。何等為三。一者觀察自相同相。二者觀察生相滅相。三者觀察不生不滅相。大慧。何者世間智。諸外道凡夫人等。執著一切諸法有無。是名世間智相。大慧。何者出世間智。謂諸

一切聲聞緣覺。虛妄分別自相同相。是名出世間智。大慧。何者出世間上上智。謂佛如來菩薩摩訶薩。觀察一切諸法寂靜不生不滅。得如來地無我證法。離彼有無朋黨二見。復次大慧。所言智者無障礙相。識者識彼諸境界相。復次大慧。識者和合起作所作名為識相。無礙法相應名為智相。復次大慧。無所得相名之為智。以自內身證得聖智修行境界故。出入諸法如水中月。是名智相。爾時世尊重說偈言

識能集諸業	智能了分別
慧能得無相	及妙莊嚴境
識為境界縛	智能了諸境
無相及勝境	是慧所住處
心意及意識	遠離於諸相
聲聞分別法	非是諸弟子
寂靜勝進忍	如來清淨智
生於善勝智	遠離諸所行
我有三種慧	依彼得聖名
於彼想分別	能聞於有無
離於二乘行	慧離於境界
取於有無想	從諸聲聞生
能入唯是心	智慧無垢相

復次大慧。諸外道有九種轉變見。何等為九。一者形相轉變。二者相轉變。三者因轉變。四者相應轉變。五者見轉變。六者物轉變。七者緣了別轉變。八者作法了別轉變。九者生轉變。大慧。是名九種轉變見。依九種轉變見故。一切外道說於轉變從有無生。大慧。何者外道形相轉變。大慧。譬如以金作莊嚴具。鑲釧瓔珞種種各異。形相雖殊金體不變。一切外道分別諸法形相轉變亦復如是。大慧。復有外道分別諸法依因轉變。大慧。而彼諸法亦非如是非不如此。以依分別故。大慧。如是一切轉變亦爾。應知譬如乳酪酒果等熟一一轉變。一切外道分別轉變亦復如是。而無實法可以轉變。以自心見有無可取。分別有無故。大慧。一切凡夫亦復如是。以依自心分別。而生一切諸法。大慧。無有法生無有法轉。如幻夢中見諸色事。大慧。譬如夢中見一切事石女兒生死。爾時世尊重說偈言

轉變時形相	四大種諸根
中陰及諸取	如是取非智
因緣生世間	佛不如此說
因緣即世間	如乾闥婆城

爾時大慧菩薩摩訶薩。復白佛言。世尊。惟願如來應正遍知。善說一切諸法相續不相續相。惟願善逝說一切法相續不相續相。我及一切諸菩薩眾。善解諸法相續不相續相。善巧方便知己。不墮執著諸法相續不相續相。離一切法相續不相續言說文字妄

想已。得力自在神通遊化十方一切諸佛國土大眾之中。陀羅尼門善印所印。十盡句善轉所轉。種種變化光明照曜。譬如四大日月摩尼自然而行。眾生受用遠離諸地惟自心見分別之相。示一切法如幻如夢。示入依止諸佛之地。於眾生界隨其所應而為說法。攝取令住一切諸法如幻如夢。離於有無一切朋黨。生滅妄想異言說義。轉身自在往勝處生

佛告聖者大慧菩薩言。善哉善哉。善哉大慧。諦聽諦聽。當為汝說。大慧白佛言。善哉世尊。唯然受教。佛告大慧。一切諸法相續不相續相者。謂如聲聞執著義相續。相執著相續緣執著相續。有無執著相續。分別生不生執著相續。分別滅不滅執著相續。分別乘非乘執著相續。分別有為無為執著相續。分別地地相執著相續。分別自分別執著相續。分別有無入外道朋黨執著相續。大慧。如是愚癡凡夫。無量異心分別相續依此相續愚癡分別如蠶作繭。依自心見分別縊相續。樂於和合自纏纏他。執著有無和合相續。大慧然無相續無相續相。以見諸法寂靜故大慧。以諸菩薩見一切法無分別相。是故名見一切菩薩寂靜法門。復次大慧。如實能知外一切法離於有無。如實覺知自心見相。以入無相自心相故。大慧。以見分別有無法故。名為相續。以見諸法寂靜故。名無相續。無相續相。無相續諸法相。大慧。無縛無脫。墮於二見。自心分別有縛有脫。何以故。以不能知諸法有無故。復次大慧。愚癡凡夫有三種相續。何等為三。謂貪瞋癡及愛樂生。以此相續故有後生。大慧。相續者眾生相續生於五道。大慧。斷相續者無相續無相續相。復次大慧。執著因緣相續故生於三有。以諸識展轉相續不斷。見三解脫門。轉滅執著三有因識。名斷相續。爾時世尊重說偈言

不實妄分別	名為相續相
能如實知彼	相續網則斷
若取聲為實	如蠶繭自纏
自心妄想縛	凡夫不能知

大慧菩薩復白佛言。如世尊說。以何等何等分別心。分別何等何等法。而彼彼法無彼如是如是體相。惟自心分別。世尊。若惟自心分別非彼法相者。如世尊說。一切諸法應無染淨。何以故。如來說言。一切諸法妄分別見無實體故。佛告大慧。如是如是如汝所說。大慧。而諸一切愚癡凡夫分別諸法。而彼諸法無如是相。虛妄分別以為實有。大慧。彼是凡夫虛妄分別諸法體相。虛妄覺知非如實見。大慧。如聖人知一切諸法自體性相。依聖人智。依聖人見。依聖慧眼。如如實知諸法自體。大慧菩薩言。世尊。世尊如諸聖人等。依聖智依聖見依聖慧眼。非肉眼天眼。覺知一切諸法體相無如是相。非如凡夫虛妄分別。世尊。云何愚癡凡夫轉虛妄相。佛告大慧。能如實覺知聖人境界轉虛妄識。世尊。彼癡凡夫非顛倒見。非不顛倒見。何以故。以不能見聖人境界如實法體故。以見轉變有無相故。大慧白佛言。世尊。一切聖人亦有分別。一切種種諸事無如是相。以自心見境界相故。世尊。彼諸聖人見有法體分別法相。以世尊不說有因不說無因。何以故。以墮有法相故。餘人見境不如是見。世尊。如是說者有

無窮過。何以故。以不覺知所有法相無自體相故。世尊。非因分別有法體相而有諸法。世尊。彼云何分別。不如彼分別。應如彼分別。世尊。分別相異相。自體相異相。世尊。而彼二種因不相似。彼彼分別法體相異。云何凡夫如此分別。此因不成如彼所見。世尊說言。我為斷諸一切眾生虛妄分別心故。作如是說如彼凡夫虛妄分別無如是法。世尊。何故遮諸眾生有無見事。而執著實法聖智境界。世尊。復令一切眾生墮無見處。何以故。以言諸法寂靜無相。聖智法體如是無相故。佛告大慧。我不說言一切諸法寂靜無相。亦不說言諸法悉無。亦不令其墮於無見。亦令不著一切聖人境界如是。何以故。我為眾生離驚怖處故。以諸眾生無始世來。執著實有諸法體相。是故我說聖人知法體相實有。復說諸法寂靜無相。大慧。我不說言法體有無。我說自身如實證法。以聞我法修行寂靜諸法無相得見真如無相境界。入自心見法。遠離見外諸法有無。得三解脫門。得已以如實印善印諸法。自身內證智慧觀察離有無見。復次大慧。菩薩不應建立諸法不生。何以故。以建立法同諸法有。若不爾者同諸法無。復次大慧。因建立諸法有故說一切法。於建立法中同。何以故。以彼建立不同一切法不生。是故建立說一切法。是言自破。何以故。以建立中無彼建立。若不爾者。彼建立亦不生。以同諸法無差別相故。是故建立諸法不生。名為自破。以彼建立三法五法和合有故。離於建立有無不生。大慧。彼建立入諸法中。不見有無法故。大慧。若彼建立諸法不生。而作是言。一切法不生。大慧。如是說者建立則破。何以故離於建立。有無相不可得故。大慧。是故不應建立諸法不生。大慧。以彼建立同彼一切不生法體。是故不應建立諸法不生。以有多過故。大慧。復有不應建立諸法不生何以故。以三法五法彼彼因不同故。大慧。復有不應建立諸法不生。何以故。以彼三法五法。作有為無常故。是故不應建立一切諸法不生。大慧。如是不應建立一切法空。一切諸法無實體相。大慧。而諸菩薩為眾生說一切諸法如幻如夢。以見不見相故。以諸法相迷惑見智故。是故應說如幻如夢。除遮一切愚癡。凡夫離驚怖處。大慧。以諸凡夫墮在有無邪見中故。以凡夫聞如幻如夢生驚怖故。諸凡夫聞生驚怖已遠離大乘。爾時世尊重說偈言

無自體無識	無阿梨耶識
愚癡妄分別	邪見如死屍
一切法不生	餘見說不成
諸法畢不生	因緣不能成
一切法不生	莫建如是法
同不同不成	是故建立壞
譬如目有翳	虛妄見毛輪
分別於有無	凡夫虛妄見
三有惟假名	無有實法體
執假名為實	凡夫起分別
相事及假名	心意所受用

佛子能遠離	住寂境界行
無水取水相	諸獸癡安心
凡夫見法爾	聖人則不然
聖人見清淨	三脫三昧生
遠離於生滅	得無障寂靜
修行無所有	亦復不見無
有無法平等	是故生聖果
有無法云何	云何成平等
以心不能見	內外法無常
若能滅彼法	見心成平等

爾時聖者大慧菩薩白佛言。世尊。如世尊說。智慧觀察不能見前境界諸法。爾時善知惟是內心。心意意識如實覺知。無法可取亦無能取。是故智亦不能分別而取。世尊。若言智慧不能取者。為見諸法自相同相。異異法相種種異法體不同故。智不能知。為見諸法種種體相不可異故。智不能知。為是山巖石壁牆幕樹林草木。地水火風之所障故。智不能知。為是極遠極近處故。智不能知。為是老小。為是盲冥諸根不具。智不能知。世尊。若一切法異異。法相異異。法體自相同相。種種不同故。智不能知者。世尊。若爾彼智非智。何以故。不能知前實境界故。世尊。若一切法種種體相。自相同相不見異故。智不能知者。若爾彼智不得言智。何以故。實有境界不能知故。世尊。有前境界如實能見。名之為智。若為山巖石壁牆幕樹林草木。地水火風極遠極近。老小盲冥諸根水具。不能知見者。彼智無智。有實境界而不知故。佛告大慧。如汝所說言無智者。是義不然。何以故。有實智故。大慧。我不依汝如是之說。境界是無惟自心見。我說不覺惟是自心。見諸外物以為有無。是故智慧不見境界。智不見者不行於心。是故我說。入三解脫門智亦不見。而諸凡夫無始世來虛妄分別。依戲論熏習熏彼心故。如是分別。見外境界形相有無。為離如是虛妄心故。說一切法惟自心見。執著我我所故不能覺知但是自心。虛妄分別是智是境界。分別是智是境界故。觀察外法不見有無墮於斷見。爾時世尊重說偈言

有諸境界事	智慧不能見
彼無智非智	虛妄見者說
言諸法無量	是智不能知
障礙及遠近	是妄智非智
老小諸根冥	不能生智慧
而實有境界	彼智非實智

復次大慧。愚癡凡夫。依無始身戲論煩惱分別煩惱。幻舞之身建立自法。執著自心見外境界。執著名字章句言說。而不能知建立正法。不修正行。離四種句清淨之法。大慧菩薩言。如是如是。如是世尊。如世尊說。世尊為我說所說法建立法相。我及

一切諸菩薩等。於未來世善知建立說法之相。不迷外道邪見聲聞辟支佛不正見法。佛告大慧菩薩言。善哉善哉。善哉大慧。諦聽諦聽我為汝說。大慧言。善哉世尊。唯然受教。佛告大慧。有二種過去未來現在如來應正遍知所說法。何等為二。一者建立說法相。二者建立如實法相。大慧。何者建立說法相。謂種種功德。修多羅優波提舍。隨眾生信心而為說法。大慧。是名建立說法相。大慧。何者建立如實法相。謂依何等法而修正行。遠離自心虛妄分別諸法相故。不墮一異俱不俱朋黨聚中。離心意意識。內證聖智所行境界。離諸因緣相應見相。離一切外道邪見。離諸一切聲聞辟支佛見。離於有無二朋黨見。大慧。是名建立如實法相。大慧。汝及諸菩薩摩訶薩應當修學。爾時世尊重說偈言

我建立二法 說法如實法
依名字說法 為實修行者

入楞伽經卷第五

盧迦耶陀品第五

爾時聖者大慧菩薩復白佛言。世尊。如來應正遍知一時說言。盧迦耶陀種種辯說。若有親近供養彼人。攝受欲食不攝法食。世尊。何故說言盧迦耶陀種種辯說。親近供養攝受欲食不攝法食。佛告大慧。盧迦耶陀種種辯才。巧妙辭句迷惑世間。不依如法說不依如義說。但隨世間愚癡凡夫情所樂故說世俗事。但有巧辭言章美妙失於正義。大慧。是名盧迦耶陀種種辯才樂說之過。大慧。盧迦耶陀如是辯才。但攝世間愚癡凡夫。非入如實法相說法。自不覺知一切法故。墮於二邊邪見聚中。自失正道亦令他失。是故不能離於諸趣。以不能見唯是自心。分別執著外法有相。是故不離虛妄分別。大慧。是故我說盧迦耶陀。雖有種種巧妙辯才樂說諸法。失正理故不得出離生老病死憂悲苦惱一切苦聚。以依種種名字章句。譬喻巧說迷誑人故。大慧。釋提桓因廣解諸論自造聲論。彼盧迦耶陀有一弟子證世間通。詣帝釋天宮建立論法而作是言。憍尸迦。我共汝賭與汝論義。若不如者要受屈伏。令諸一切天人知見即共立要。我若勝汝要當打汝千輻輪碎。我若不如從頭至足節節分解以謝於汝。作是要已。盧迦耶陀弟子現作龍身。共釋提桓因論義。以其論法即能勝彼。釋提桓因令其屈伏。即於天中打千輻輪車碎如微塵即下人間。大慧。盧迦耶陀婆羅門。如是種種譬喻相應。乃至現畜生身依種種名字。迷惑世間天人阿修羅。以諸世間一切眾生執著生滅法故。何況於人。大慧。以是義故。應當遠離盧迦耶陀婆羅門。以因彼說能生苦聚故。是故不應親近供養恭敬諮請盧迦耶陀婆羅門。大慧。盧迦耶陀婆羅門所說之法。但見現前身智境界。依世名字說諸邪法。大慧。盧迦耶陀婆羅門所造之論有百千偈。後世末世分為多部各各異名。依自心見因所造故。大慧。盧迦耶陀婆羅門無有弟子能受其論。是故後世分為多部種種異名。大慧。諸外道等內心無有如實解故。依種種因種種異解。隨自心造而為人說。執著自在因等故。大慧。一切外道所造論中無如是法。惟是一切盧迦耶陀。種種因門說百千萬法。而彼不知是盧迦耶陀。大慧菩薩白佛言。世尊。若一切外道惟說盧迦耶陀。依於世間種種名字章句譬喻執著諸因者。世尊。十方一切國土眾生天人阿修羅集如來所。如來亦以世間種種名字章句譬喻說法。不說自身內智證法。若爾亦同一切外道所說不異。佛告大慧。我不說於盧迦耶陀。亦不說言諸法不來不去。大慧。我說諸法不來不去。大慧。何者名來。大慧。所言來者名為生聚。以和合生故。大慧。何者名去。大慧。所言去者名之為滅。大慧。我說不去不來名為不生不滅。大慧。我說不同彼外道法。何以故。以不執著外物有無故。建立說於自心見故。不住二處不行分別諸相境界故。以如實知自心見故。不生自心分別見故。以不分別一切相者。而能入空無相無願三解脫門名為解脫。大慧。我念過去於一處住。爾時有一盧迦耶陀大婆羅門。來詣我所而請我言。瞿曇。一切作耶。大慧。我時答言。婆羅門。一切作者此是第一盧迦耶陀。婆羅門言。瞿曇。一切不作耶。我時答言。婆羅門。一切不

作者是第二盧迦耶陀。如是一切常一切無常。一切生一切不生。我時答言。婆羅門。是第六盧迦耶陀。大慧。盧迦耶陀復問我言。瞿曇。一切一耶一切異耶。一切俱耶一切不俱耶。一切諸法依於因生。見種種因生故。大慧。我時答言。婆羅門。是第十一盧迦耶陀。大慧。彼復問我。瞿曇。一切無記耶一切有記耶。有我耶無我耶。有此世耶無此世耶。有後世耶無後世耶。有解脫耶無解脫耶。一切空耶一切不空耶。一切虛空耶。非緣滅耶。涅槃耶。瞿曇。作耶非作耶。有中陰耶無中陰耶大慧。我時答言。婆羅門。如是說者。一切皆是盧迦耶陀。非我所說是汝說法。婆羅門。我說因無始戲論虛妄分別煩惱熏習故說彼三有。以不覺知唯是自心分別見有。非見外有如外道法。大慧。外道說言。我根意義三種和合能生於知。婆羅門。我不如是。我不說因亦不說無因。唯說自心分別見有可取能取境界之相。我說假名因緣集故而生諸法。非汝婆羅門及餘境界。以墮我見故。大慧。涅槃虛空緣滅不成三數。何況言作有作不作。大慧。復有盧迦耶陀婆羅門來問我言。瞿曇。此諸世間無明愛業因故生三有耶無因耶。我時答言。婆羅門。此二法盧迦耶陀。非我法耶。婆羅門復問我言。瞿曇。一切法墮自相耶同相耶。我時答言。婆羅門。此是盧迦耶陀。非我法耶。婆羅門。但有心意意識執著外物。皆是盧迦耶陀。非我法耶。大慧。盧迦耶陀婆羅門。復問我言。瞿曇。頗有法非盧迦耶陀耶。瞿曇。一切外道建立種種名字章句因譬喻說者皆是我法。我時答言。婆羅門。有法非汝法。非不建立。亦非不說種種名字章句。亦非不依義依義說。而非盧迦耶陀建立法。婆羅門。有法非盧迦耶陀。以彼諸法一切外道乃至於汝不能了知。以妄執著外不實法分別戲論故。何者是謂遠離分別。心觀察有無自心見相如實覺知。是故不生一切分別。不取外諸境界法故。分別心息住自住處寂靜境界。是名非盧迦耶陀。是我論法非汝論耶。婆羅門。住自住處者不生不滅故。不生不滅者不生分別心故。婆羅門。是名非盧迦耶陀。婆羅門。略說言之。以何等處識不行不取不退。不求不生不執著不樂。不見不覩不住不觸。是名為住。名異義一。婆羅門。執著種種相。自我和合愛著諸因。是婆羅門盧迦耶陀法。非我法耶。大慧。盧迦耶陀婆羅門。來詣我所問如是法。我時答彼婆羅門。如向所說。時婆羅門默然而去。而不問我建立真法。時盧迦耶陀婆羅門心作是念。此沙門釋子外於我法是可憐愍。說一切法無因無緣無有生相。惟說自心分別見法。若能覺知自心見相。則分別心滅。大慧。汝今問我。何故盧迦耶陀種種辯說。親近供養恭敬彼人但攝欲味不攝法味。大慧白佛言。世尊。何者名食句義。何者名法句義。佛告大慧。善哉善哉。善哉大慧。汝能為於未來眾生。諮問如來如是二義。善哉大慧。諦聽諦聽我為汝說。大慧白佛言。善哉世尊。唯然受故。佛告大慧。何者為食。謂食味觸味。樂求方便巧諂著味執著外境。如是等法名異義一。以不能入無二境界法門義故。復次大慧。名為食者。依於邪見生陰有支。不離生老病死憂悲苦惱。愛生於有。如是等法名之為食。是故我及一切諸佛。說彼親近供養盧迦耶陀婆羅門者。名得食味不得法味。大慧。何者為法味。謂如實能知二種無我。以見人無我法無我相。是故不生分別之相。如實能知諸地上上智故。爾時能離心

意意識。入諸佛智受位之地。攝取一切諸句盡處。如實能知一切諸佛自在之處。名為法味。不墮一切邪見戲論分別二邊。大慧。外道說法多令眾生墮於二邊。不令智者墮於二邊。何以故。大慧。諸外道等多說斷常。以無因故墮於常見。見因滅故墮於斷見。大慧。我說如實見不著生滅。是故我說名為法味。大慧。是名我說食味法味。大慧。汝及諸菩薩摩訶薩當學此法。爾時世尊重說偈言

我攝取眾生	依戒降諸惡
智慧滅邪見	三解脫增長
外道虛妄說	皆是世俗論
以邪見因果	無正見立論
我立建立法	離虛妄因見
為諸弟子說	離於世俗法
惟心無外法	以無二邊心
能取可取法	離於斷常見
但心所行處	皆是世俗論
若能觀自心	不見諸虛妄
來者見因生	去者見果滅
如實知去來	不分別虛妄
常無常及作	不作彼此物
如是等諸法	皆是世俗論

入楞伽經涅槃品第六

爾時聖者大慧菩薩白佛言。世尊。如佛所言涅槃。涅槃者以何等法名為涅槃。而諸外道各各虛妄分別涅槃。佛告大慧菩薩言。善哉善哉。善哉大慧。諦聽諦聽當為汝說。諸外道等虛妄分別涅槃之相。如彼外道所分別者無是涅槃。大慧白佛言。善哉世尊。唯然受教。佛告大慧。有諸外道厭諸境界。見陰界入滅諸法無常心心數法不生。現前以不憶念過去未來現樂境界。諸陰盡處如燈火滅種種風止。不取諸相妄想分別。名為涅槃。大慧。而彼外道見如是法生涅槃心。非見滅故名為涅槃。大慧。或有外道從方至方名為涅槃。大慧。復有外道。分別諸境如風。是故分別名為涅槃。大慧。復有外道作如是說。不見能見所見境界不滅名為涅槃。復次大慧。復有外道作如是說。不見分別見常無常名為涅槃。復次大慧。復有外道作如是言。分別見諸種種異相能生諸苦。以自心見虛妄分別一切諸相怖畏諸相。見於無相深心愛樂生涅槃想。復次大慧。復有外道。見一切法自相同相不生滅想。分別過去未來現在諸法是有名為涅槃。復次大慧。復有外道。見我人眾生壽命壽者諸法不滅。虛妄分別名為涅槃。復次大慧。有餘外道。無智慧故分別所見自性。人命轉變分別轉變名為涅槃。復次大慧。有餘外道說如是言。罪盡故福德亦盡名為涅槃。復次大慧。有餘外道言。煩惱盡依智故名為涅槃。復次大慧。有餘外道說如是言。見自在天造作眾生。虛妄分別名為涅槃。復次

大慧。有餘外道言。諸眾生迭共因生非餘因作。如彼外道執著於因不知不覺。愚癡闇鈍虛妄分別名為涅槃。復次大慧。有餘外道說證諦道虛妄分別名為涅槃。復次大慧。有餘外道作如是言。有作所作而共和合見一異俱不俱。虛妄分別名為涅槃。復次大慧。有餘外道言。一切法自然而生。猶如幻師出種種形像。見種種寶棘刺等物自然而生。虛妄分別名為涅槃。復次大慧。有餘外道言。諸萬物皆是時作。覺知唯時。虛妄分別名為涅槃。復次大慧。有餘外道言。見有物見無物見有無物。如是分別名為涅槃。復次大慧。餘建立法智者說言。如實見者唯是自心。而不取著外諸境界離四種法。見一切法如彼彼法住。不見自心分別之相。不墮二邊不見能取可取境界。見世間建立一切不實迷如實法。以不取諸法名之為實。以自內身證聖智法。如實而知二種無我。離於二種諸煩惱垢。清淨二障如實能知上上地相。入如來地得如幻三昧。遠離心意意識分別如是等見。名為涅槃。大慧。復有諸外道等。邪見覺觀而說諸論。不與如實正法相應。而諸智者遠離訶嘖。大慧。如是等外道。皆墮二邊虛妄分別。無實涅槃。大慧。一切外道如是虛妄分別涅槃。無人住世間無人入涅槃。何以故。一切外道依自心論虛妄分別無如實智。如彼外道自心分別無如是法。去來搖動無有如是外道涅槃。大慧。汝及一切諸菩薩等。應當遠離一切外道虛妄涅槃。爾時世尊重說偈言

外道涅槃見	各各起分別
皆從心相生	無解脫方便
不離縛所縛	遠離諸方便
自生解脫想	而實無解脫
外道建立法	眾智各異取
彼悉無解脫	愚癡妄分別
一切癡外道	妄見作所作
是故無解脫	以說有無法
凡夫樂戲論	不聞真實慧
言語三界本	如實智滅苦
譬如鏡中像	雖見而非有
熏習鏡心見	凡夫言有二
不知唯心見	是故分別二
如實知但心	分別則不生
心名為種種	離能見可見
見相無可見	凡夫妄分別
三有惟妄想	外境界實無
妄想見種種	凡夫不能知
經經說分別	種種異名字
離於言語法	不說不可得

入楞伽經法身品第七

爾時聖者大慧菩薩白佛言。世尊。如來應正遍知。惟願演說自身所證內覺知法。以何等法名為法身。我及一切諸菩薩等。善知如來法身之相。自身及他俱入無疑。佛告大慧菩薩言。善哉善哉。善哉大慧。汝有所疑隨意所問為汝分別。大慧白佛言。善哉世尊。唯然受教。即白佛言。世尊。如來應正遍知。法身者為作法耶非作法耶。為是因耶為是果耶。為能見耶為所見耶。為是說耶為可說耶。為是智耶智所覺耶。如是等辭句。如來法身為異耶為不異耶。佛告大慧。如來應正遍知法身之相。如是辭句等。非作法非不作法非因非果。何以故。以二邊有過故。大慧。若言如來是作法者是則無常。若無常者一切作法應是如來。而佛如來應正遍知不許此法。大慧。若如來法身非作法者則是無身。言有修行無量功德一切行者則是虛妄。大慧。若不作者應同兔角石女兒等。以無作因亦無身故。大慧。若法非因非果非有非無。而彼法體離四種相。大慧。彼四種法名世間言說。大慧。若法離於四種法者。彼法但有名字如石女兒。大慧。石女兒等惟是名字章句之法說同四法。若墮四法者則智者不取。如是一切問如來句。智者應知。佛復告大慧。我說一切諸法無我。汝當諦聽無我之義。夫無我者。內身無我是故無我。大慧。一切諸法自身為有他身為無。如似牛馬。大慧。譬如牛身非是馬身。馬亦非牛。是故不得言有言無。而彼自體非是無耶。大慧。一切諸法亦復如是。非無體相有自體相。愚癡凡夫不知諸法無我體相。以分別心非不分別心。大慧。如是一切法空一切法不生。一切法無體相亦爾。大慧。如來法身亦復如是。於五陰中非一非異。大慧。如來法身五陰一者。則是無常。以五陰是所作法故。大慧。如來法身五陰異者。則有二法。不同體相。如牛二角相似不異。見有別體長短似異。大慧。若如是一切諸法應無異相而有異相。如牛左角異右角右角異左角。如是長短相待各別。如色種種彼此差別。大慧。如是如來法身之相。於五陰中不可說一不可說異。於解脫中不可說一不可說異。於涅槃中不可說一不可說異。如是依解脫故。說名如來法身之相。大慧。若如來法身異解脫者。則同色相則是無常。若如來法身不異解脫者。則無能證所證差別。大慧。而修行者則見能證及於所證。是故非一。大慧。如是知於可知境界非一非異。大慧。若法非常非無常。非因非果。非有為非無為。非覺非不覺。非能見非可見。非離陰界入非即陰界入。非名非境界。非一非異。非俱非不俱。非相續非不相續。過一切諸法。若過諸法但有其名。若但有名彼法不生。以不生故彼法不滅。以不滅故彼法則如虛空平等。大慧。虛空非因非果。若法非因非果者。彼法則為不可觀察。不可觀察者。彼法過諸一切戲論。若過一切諸戲論者。名如來法身。大慧。是名如來應正遍知法身之相。以過一切諸根境界故。爾時世尊重說偈言

離諸法及根	非果亦非因
已離覺所覺	離能見可見
諸緣及五陰	佛無有見法
若無有見法	云何而分別

非作非不作	非因亦非果
非陰非離陰	亦不在餘處
何等心分別	分別不能見
彼法非是無	諸法法自爾
先有故言無	先無故言有
是故不說無	亦不得說有
迷於我無我	但著於音聲
彼墮於二邊	妄說壞世間
離諸一切過	則能見我法
是名為正見	不謗於諸佛

爾時聖者大慧菩薩復白佛言。世尊。惟願世尊為我解說。惟願善逝為我解說。如來處處說言諸法不生不滅。世尊。復言。不生不滅者。名如來法身。故言不生不滅。世尊。如來言。不生不滅者。為是無法故名不生不滅。為是如來異名不生不滅。而佛如來常說。諸法不生不滅。以離建立有無法故。世尊。若一切法不生者。此不得言一切法。以一切法不生故。若依餘法有此名者。世尊應為我說

佛告大慧菩薩言。善哉善哉。善哉大慧。諦聽諦聽當為汝說。大慧菩薩白佛言。善哉世尊。唯然受教。佛告大慧。如來法身非是無物。亦非一切法不生不滅。亦不得言依因緣有。亦非虛妄說不生不滅。大慧。我常說言不生不滅者名意生身。如來法身非諸外道聲聞辟支佛境界故。住七地菩薩亦非境界。大慧。我言不生不滅者。即如來異名。大慧。譬如釋提桓因。帝釋。王。不蘭陀羅。手爪。身體。地。浮彌。虛空。無礙。如是等種種名號名異義一。不依多名言有多體帝釋等耶。大慧。我亦如是。於娑婆世界中。三阿僧祇百千名號。凡夫雖說而不知是如來異名。大慧。或有眾生知如來者。有知自在者。有知一切智者。有知救世間者。有知為導者。有知為將者。有知為勝者。有知為妙者。有知世尊者。有知佛者。有知牛王者。有知師子者。有知仙人者。有知梵者。有知那羅延者。有知勝者。有知迦毘羅者。有知究竟者。有知阿利吒尼彌者。有知月者。有知日者。有知婆樓那者。有知毘耶娑者。有知帝釋者。有知力者。有知海者。有知不生者。有知不滅者。有知空者。有知真如者。有知實際者。有知涅槃者。有知法界者。有知法性者。有知常者。有知平等者。有知不二者。有知無相者。有知緣者。有知佛體者。有知因者。有知解脫者。有知道者。有知實諦者。有知一切智者。有知意生身者。大慧。如是等種種名號如來應正遍知。於娑婆世界及餘世界中。三阿僧祇百千名號不增不減眾生皆知。如水中月不入不出。而諸凡夫不覺不知。以墮二邊相續法中。然悉恭敬供養於我。而不善解名字句義。取差別相不能自知。執著名字故虛妄分別。不生不滅名為無法。而不知是如來名號差別之相。如因陀羅帝釋王不蘭陀羅等。以不能決定名與真實。隨順名字音聲取法亦復如是。大慧。於未來世愚癡凡夫說如是言。如名義亦如是。而不能知異名有義。何以故。以義無體相

故。復作是言不異名字音聲有義。名字音聲即是義。何以故。不知名字體相故。大慧。彼愚癡人不知音聲即生即滅義不生滅故。大慧。音聲之性墮於名字。而義不同墮於名字。以離有無故。無生無體故。大慧。如來說法依自聲說。不見諸字是有無故不著名字。大慧。若人執著名字說者。彼人不名善說法者。何以故。法無名字故。大慧。是故我經中說。諸佛如來乃至不說一字不示一名。何以故。諸法無字依義無說。依分別說故。大慧。若不說法者。諸佛如來法輪斷滅。法輪滅者。亦無聲聞緣覺菩薩。無聲聞緣覺菩薩者。為何等人何等法何事說。大慧。是故菩薩摩訶薩。不應著於言說名字。大慧。名字章句非定法故。依眾生心說。諸佛如來隨眾生信而說諸法。為令遠離心意意識故。不說自身內證聖智建立諸法。如實能知一切諸法寂靜相故。但見自心覺所知法。離二種心分別之相。不如是說。大慧。菩薩摩訶薩。依義不依語。若善男子善女人。隨文字說者墮在邪見。自身失壞第一義諦。亦壞他人令不覺知。大慧。諸外道等各依自論異見言說。大慧。汝應善知一切地相。善知樂說辯才文辭章句。善知一切諸地相已。進取名句樂說辯才。善知諸法義相應相。爾時自身於無相法樂而受樂受。住大乘中令眾生知。大慧。取大乘者。即是攝受諸佛聲聞緣覺菩薩。攝受諸佛聲聞緣覺及菩薩者。即是攝受一切眾生。攝受一切諸眾生者。即是攝受勝妙法藏。攝受法藏者。即不斷佛種。不斷佛種者。不斷一切勝妙生處。以彼勝處諸菩薩等願生彼故。置諸眾生大乘法中。十自在力。隨諸眾生形色諸使。而能隨現說如實法。大慧。何者如實法。如實法者。不異不差。不取不捨。離諸戲論名如實法。大慧。善男子善女人。不得執著文字音聲。以一切法無文字故。大慧。譬如有人為示人物以指指示。而彼愚人即執著指。不取因指所示之物。大慧。愚癡凡夫亦復如是。聞聲執著名字指故。乃至沒命終不能捨文字之指取第一義。大慧。譬如穀粟名凡夫食。不舂不吹不可得食。若其有人未作食者名為顛狂。要須次第乃至吹熟方得成食。大慧。不生不滅亦復如是。不修巧智方便行者。不得具足莊嚴法身。大慧。執著名字言得義者。如彼癡人不知舂吹。噉文字穀不得義食。以是義故當學於義。莫著文字。大慧。所言義者名為涅槃。言名字者分別相縛生世間解。大慧。義者從於多聞人得。大慧。言多聞者謂義巧方便。非聲巧方便。大慧。義方便者離於一切外道邪說亦不和雜。如是說者。自身不墮外道邪法。亦不令他墮外道法。大慧。是名多聞有義方便。大慧。欲得義者應當親近多聞智者供養恭敬。著名字者應當遠離不應親近。爾時大慧菩薩承諸佛力白佛言。世尊。如來世尊說一切法不生不滅非為奇特。何以故。一切外道亦說諸因不生不滅。如來亦說虛空。非數緣滅。及涅槃界不生不滅。世尊。諸外道亦說依諸因緣生諸眾生。如來亦說無明愛業分別因緣生諸世間。若爾如來亦說因緣名字相異。依外因緣能生諸法。外道亦說依外因緣而生諸法。是故如來與外道說無有差別。世尊。外道因微塵。勝。自在天。梵天等。共外九種因緣。說言諸法不生不滅。如來亦說。一切諸法不生不滅。有無不可得。以諸四大不滅。自相不生不滅。隨佛如來種種異說。而不離於外道所說。而諸外道亦說諸大不離大體。世尊。諸外道分別諸大。如來亦爾分別諸大

。世尊。以是義故。如來所說不異外道。若不同者如來應說所有異相。若有異相當知不同外道所說。世尊。若佛如來於自法中不說勝相者。諸外道中亦應有佛。以說諸法不生不滅。如來常說一世界中而有多佛俱出世者。無有是處。如向所說一世界中應有多佛。何以故。所說有無因無差故。如佛所說言無虛謬。云何世尊於自法中不說勝相。佛告大慧言。大慧。我所說法不生不滅者。不同外道不生不滅。亦不同彼不生無常法。何以故。大慧。諸外道說有實有體性不生不變相。我不如是墮於有無朋黨聚中。大慧。我說離有無法。離生住滅相。非有非無。見諸一切種種色像如幻如夢。是故不得言其有無。大慧。云何不得言其是無。謂色體相有見不見取不取故。大慧。是故我說一切諸法非有非無。大慧。以不覺知唯是自心分別生見。一切世間諸法本來不生不滅。而諸凡夫生於分別。非聖人耶。大慧。迷心分別不實義者。譬如凡夫見乾闥婆城。幻師所作種種幻人種種象馬。見其入出虛妄分別。作如是言。此如是如是入。如是如是出。大慧。而彼實處無人出入。惟自心見迷惑分別。生不生法亦復如是。大慧。而彼實處無此有為無為諸法。如彼幻師所作幻事。而彼幻師不生不滅。大慧。諸法有無亦無所為。以離生滅故。惟諸凡夫墮顛倒心分別生滅。非謂聖人。大慧。顛倒者如心分別此法如是如是而彼法不如是如是。亦非顛倒分別顛倒者執著諸法是有是無。非見寂靜故。不見寂靜者不能遠離虛妄分別。是故大慧。見寂靜者名為勝相。非見諸相名為勝相。以不能斷生因相故。大慧。言無相者遠離一切諸分別心。無生無相者是我所說名為涅槃。大慧。言涅槃者謂見諸法如實住處。遠離分別心心數法。依於次第如實修行。於自內身聖智所證。我說如是名為涅槃。爾時世尊重說偈言

為遮生諸法	建立無生法
我說法無因	凡夫不能知
我說法無因	而凡夫不知
一切法不生	亦不得言無
乾闥婆幻夢	諸法無因有
諸法空無相	云何為我說
離諸和合緣	智慧不能見
以空本不生	是故說無體
一一緣和合	見物不可得
非外道所見	和合不可得
夢幻及毛輪	乾闥婆陽焰
無因而妄見	世間事亦爾
降伏無因論	能成無生義
能成無生者	我法不滅壞
說無因諸論	外道生驚怖
云何何等人	何因於何處

生諸法無因 非因非無因
智者若能見 能離生滅見
無法生不生 為無因緣相
若為法名字 無義為我說
非法有無生 亦非待因緣
非前法有名 亦名不空說
聲聞辟支佛 外道非境界
住在於七地 彼處無生相
離諸因緣法 為遮諸因緣
說建立惟心 我說名無生
諸法無因緣 離分別分別
離有無朋黨 我說名無生
心離於見法 及離二法體
轉身依正相 我說名無生
外非實無實 亦非心所取
幻夢及毛輪 乾闥婆陽焰
遠離於諸見 是名無生相
如是空等法 諸文句應知
非生及空空 而無於生空
諸因緣和合 有生及有滅
離於諸因緣 不生亦不滅
離因緣無法 離和合無得
外道妄分別 而見有一異
有無不生法 有無不可得
惟和合諸法 而見有生滅
但有於名字 展轉為鉤鎖
離彼因緣鎖 生法不可得
生法不見生 離諸外道過
我說緣鉤鎖 諸凡夫不知
若離緣鉤鎖 更無有別法
是則無因緣 破壞緣鎖義
如燈顯眾像 鉤鎖生亦然
是則離鉤鎖 別更有法生
生法本無體 自性如虛空
離鉤鎖求法 愚人無所知

復有餘無生
彼生無生者
若見諸世間
一切皆鉤鎖
無明愛業等
攢軸泥團輪
若更有他法
離於鉤鎖義
若生法是無
展轉相生故
堅濕熱動法
離鎖更無法
如醫療眾病
而論無差別
我念諸眾生
知根力差別
我法無差別
我唯一乘法

聖人所得法
是則無生忍
則是見鉤鎖
是則心得定
是則內鉤鎖
種子大鉤鎖
而從因緣生
彼不住聖教
彼為誰鉤鎖
是名因緣義
凡夫生分別
是故說無體
依病出對治
病殊故方異
為煩惱過染
隨堪受為說
隨根病異說
八聖道清淨

入楞伽經卷第六

無常品第八

爾時聖者大慧菩薩復白佛言。世尊。世尊說無常。無常者。一切外道亦說無常。世尊。如來依於名字章句。說如是言。諸行無常是生滅法。世尊。此法為是真實為是虛妄。世尊。復有幾種無常

佛告聖者大慧菩薩言。善哉善哉善哉大慧。一切外道虛妄分別說八種無常。何等為八。一者發起所作而不作。是名無常。何者名為發起。謂生法不生法。常法無常法。名為發起無常。二者形相休息。名為無常。三者色等即是無常。四者色轉變故異異無常。諸法相續自然而滅。如乳酪轉變。於一切法不見其轉亦不見滅。名為無常。五者復有餘外道等。以無物故。名為無常。六者有法無法而悉無常。以一切法本不生故。名為無常。以無常法彼中和合。是故無常。七者復有餘外道等。本無後有名為無常。謂依諸大所生相滅。不見其生離相續體。名為無常。八者不生無常。謂為非常是故無常。見諸法有無生不生。乃至微塵觀察不見法生。故言不生。諸法非生。大慧。是名無生無常相。而諸外道不知彼法所以不生。是故分別諸法不生。故言無常。復次大慧。外道分別無常之法。言有於物。彼諸外道自心虛妄分別無常常非無常。以有物故。何以故。自體不滅故。自體不滅者。無常之體常不滅故。大慧。若無常法是有物者應生諸法。以彼無常能作因故。大慧。若一切法不離無常者。諸法有無一切應見。何以故。如杖木瓦石。能破可破之物悉皆破壞。見彼種種異異相故。是故無常因一切法無法。亦非因亦非果。大慧。復有諸過。以彼因果無差別故。而不得言此是無常而彼是果。以因果差別故。不得言一切法常。以一切法無因故。大慧。諸法有因。而諸凡夫不覺不知。異因不能生異果故。大慧。若異因能生異果者。因異應生一切諸法。若爾復更有過。應因果差別而見差別。大慧。若其無常是有物者。應同因體所作之事。復更有過。於一法中即應具足一切諸法。以同一切所作。因果業相無差故。復更有過。自有無常。無常有無常體故。復更有過。一切諸法無常應常故。復更有過。若其無常同諸法者墮三世法。大慧。過去色同無常故已滅。未來法未生。以同色無常故不生。現在有法不離於色。以色與彼諸大相。依五大依塵。是故不滅。以彼彼不相離故。大慧。一切外道不滅諸大。三界依大依微塵等。是故依彼法說生住滅。大慧。離於此法更無四大諸塵等法。以彼外道虛妄分別離一切法更有無常。是故外道說言諸大不生不滅。以自體相常不滅故。是故彼說發起作事中間不作名為無常。諸大更有發起諸大。無彼彼異相同相不生滅法。以見諸法不生滅故。而於彼處生無常智。大慧。何者名為形相休息無常。謂能造所造形相見形相異如長短。非諸大滅而見諸大形相轉變。彼人墮在僧佉法中。大慧。復形相無常者。謂何等人即色名無常。彼人見於形相無常。而非諸大是無常法。若諸大無常。則諸世間一切不得論說世事。若論世事。墮盧迦耶陀邪見朋黨。以說一切諸法唯名。復見諸法自體相生。大慧。轉變無常者。謂見諸色

種種異相。非諸大轉變。譬如見金作莊嚴具形相轉變金體不異。餘法轉變亦復如是。大慧。如是外道虛妄分別見法無常。火不燒諸大。自體不燒。以彼諸大自體差別故。大慧。諸外道說若火能燒諸大者。則諸大斷滅是故不燒。大慧。我說大及諸塵非常非無常。何以故。我不說外境界有故。我說三界但是自心。不說種種諸相是有。是故說言不生不滅。唯是四大因緣和合。非大及塵是實有法。以虛妄心分別二種可取能取法。如實能知二種分別。是故離外有無見相。唯是自心分別作業。而名為生而業不生。以離有無分別心故。大慧。何故非常非不常。以有世間及出世間上上諸法。是故不得說言是常。何故非無常。以能覺知唯是自心分別見故。是故非無常。而諸外道墮在邪見執著二邊。不知自心虛妄分別。非諸聖人分別無常。大慧。一切諸法總有三種。何等為三。一者世間法相。二者出世間法相。三者出世間上上勝法相。以依言語種種說法。而諸凡夫不覺不知。爾時世尊重說偈言

遠離於始造	及與形相異
無常名有物	外道妄分別
諸法無有滅	諸大自性住
墮於種種見	外道說無常
彼諸外道說	諸法不生滅
諸大體自常	何等法無常
一切世唯心	而心見二境
可取能取法	我我所法無
三界上下法	我說皆是心
離於諸心法	更無有可得

入楞伽經入道品第九

爾時聖者大慧菩薩摩訶薩復白佛言。世尊。惟願世尊。為我說諸一切菩薩聲聞辟支佛入滅盡定次第相。我及一切諸菩薩等。若得善知入滅盡定次第之相巧方便者。不墮聲聞辟支佛三昧三摩跋提滅盡定樂。不墮聲聞辟支佛外道迷惑之法。佛告聖者大慧菩薩言。善哉善哉善哉大慧。諦聽諦聽當為汝說。大慧菩薩白佛言。善哉世尊。唯然受教。佛告大慧。菩薩從初地乃至六地入滅盡定。聲聞辟支佛亦入滅盡定。大慧。諸菩薩摩訶薩。於七地中念念入滅盡定。以諸菩薩悉能遠離一切諸法有無相故。大慧。聲聞辟支佛不能念念入滅盡定。以聲聞辟支佛緣有為行入滅盡定。墮在可取能取境界。是故聲聞辟支佛。不能入七地中念念滅盡定。以聲聞辟支佛生驚怖想。恐墮諸法無異相故。以覺諸法種種異相有法無法善不善法同相異相而入滅盡定。是故聲聞辟支佛。不能入七地中念念滅盡定。以無善巧方便智故。大慧。七地菩薩摩訶薩。轉滅聲聞辟支佛心意意識。大慧。初地乃至六地菩薩摩訶薩。見於三界但是自心心意識離我我所法。唯是自心分別。不墮外法種種諸相。唯是凡夫內心愚癡。墮於二邊見於可取能取之法。以無知故。而不覺知無始世來身口及意妄想煩惱戲論熏習而生諸法。大慧

。於八地中一切菩薩聲聞辟支佛入涅槃想。大慧。諸菩薩摩訶薩。承己自心三昧佛力。不入三昧樂門。墮涅槃而住。以不滿足如來地故。若彼菩薩住三昧分者。休息度脫一切眾生。斷如來種滅如來家。為示如來不可思議諸境界故。是故不入涅槃。大慧。聲聞辟支佛墮三昧樂門法。是故聲聞辟支佛生涅槃想。大慧。諸菩薩摩訶薩。從初地來乃至七地具巧方便。觀察心意意識之想。遠離我我所取相之法。觀察我空法空。觀察同相異相。善解四無礙巧方便義。自在次第入於諸地菩提分法。大慧。我若不說諸菩薩摩訶薩同相異相法者。一切菩薩不如實知諸地次第。恐墮外道邪見等法故。我次第說諸地相。大慧。若人次第入諸地者不墮餘道。我說諸地次第相者。唯自心見諸地次第。及三界中種種行相。而諸凡夫不覺不知。以諸凡夫不覺知故。是故我及一切諸佛。說於諸地次第之相。及建立三界種種行相。復次大慧。聲聞辟支佛。於第八菩薩地中。樂著寂滅三昧樂門醉故。不能善知唯自心見。墮自相同相熏習障礙故。墮人無我法無我見過故。以分別心名為涅槃。而不能知諸法寂靜。大慧。諸菩薩摩訶薩。以見寂靜三昧樂門。憶念本願大慈悲心度諸眾生。知十無盡如實行智。是故不即入於涅槃。大慧。諸菩薩摩訶薩。遠離虛妄分別之心。遠離能取可取境界。名入涅槃。以如實智知一切諸法唯是自心。是故不生分別之心。是故菩薩不取心意意識。不著外法實有之相。而非不為佛法修行。依根本智展轉修行。為於自身求佛如來證地智故。大慧。如人睡夢度大海水。起大方便欲度自身。未度中間忽然便寤。作是思惟。此為是實為是虛妄。彼復思惟。如是之相非實非虛。唯是我本虛妄分別不實境界。熏習因故見種種色。形相顛倒不離有無。意識熏習於夢中見。大慧。菩薩摩訶薩亦復如是。於八地中見分別心。初地七地諸法同相。如夢如幻平等無差。離諸功用可取能取分別之心。見心心數法。為於未得上上佛法修行者令得故。菩薩摩訶薩修行勝法。名為涅槃。非滅諸法名為涅槃。菩薩摩訶薩。遠離心意意識分別相故。得無生法忍。大慧。第一義中亦無次第。無次第行。諸法寂靜亦如虛空。大慧菩薩白佛言。世尊。世尊說。聲聞辟支佛。入第八菩薩地寂滅樂門。如來復說。聲聞辟支佛不知但是自心分別。復說諸聲聞得人無我。而不得法無我空。若如是說。聲聞辟支佛尚未能證初地之法。何況八地寂滅樂門。佛告大慧。我今為汝分別宣說。大慧。聲聞有三種。言入八地寂滅門者。此是先修菩薩行者墮聲聞地。還依本心修菩薩行。同入八地寂滅樂門。非增上慢寂滅聲聞。以彼不能入菩薩行。未曾覺知三界唯心。未曾修行菩薩諸法。未曾修行諸波羅蜜十地之行。是故決定寂滅聲聞。不能證彼菩薩所行寂滅樂門。爾時世尊重說偈言

唯心無所有	諸行及佛地
去來現在佛	三世說如是
七地為心地	無所有八地
二地名為行	餘地名我地
內身證及淨	此名為我地

自在最勝處	阿迦尼吒天
炤曜如炎火	出妙諸光明
種種美可樂	化作於三界
化現三界色	或有在光化
彼處說諸乘	是我自在地
十地為初地	初地為八地
九地為七地	七地為八地
二地為三地	四地為五地
三地為六地	寂滅有何次
決定諸聲聞	不行菩薩行
同入八地者	是本菩薩行

入楞伽經問如來常無常品第十

爾時聖者大慧菩薩摩訶薩白佛言。世尊。如來應正遍知。為是常耶為無常耶。佛告聖者大慧菩薩言。大慧。如來應正遍知。非常非無常。何以故。二邊有過故。大慧。有無二邊應有過失。大慧。若言如來是常法者則同常因。大慧。以諸外道說言微塵諸因常故。非是作法。大慧。是故不得言如來常。以非作法而言常故。大慧。亦不得言如來無常。言無常者即是同於有為作法。五陰可見能見法無。五陰滅故。五陰滅者諸佛如來亦應同滅。而佛如來非斷絕法。大慧。凡作法者皆是無常。如瓶衣車屋及疊席等皆是作法。是故無常。大慧。若言一切皆無常者。一切智一切智人。一切功德亦應無常。以同一切作法相故。又復有過。若言一切皆無常者。諸佛如來應是作法。而佛如來非是作法。以無更說有勝因故。是故我言如來非常亦非無常。復次大慧。如來非常。何以故。虛空之性亦無修行諸功德故。大慧。譬如虛空非常非無常。何以故。以離常無常故。以不墮一異俱不俱。有無非有非無。常無常非常非無常。是故離於一切諸過不可得說。復次大慧。亦不得言如來是常。何以故。若言常者同於兔馬駝驢龜蛇蠅魚等角。是故不得言如來常。復次大慧。亦不得言如來是常。恐墮不生常故。是故不得言如來世尊常。復次大慧。更有餘法。依彼法故。得言如來世尊是常。何以故。依內證智證常法故。是故得言如來是常。大慧。諸佛如來內證智法。常恒清涼不變。大慧。諸佛如來應正遍知。若出於世不出於世。法性常。如是法體常。如是法軌則常。如是以彼法性。一切聲聞辟支佛等。亦不曾聞亦不曾見。如是法體。非虛空中。毛道凡夫不覺不知。大慧。諸佛如來內證智者依彼得名。大慧。以依如實智慧修行得名為佛。非心意意識無明五陰熏習得名。大慧。一切三界不實妄想分別戲論得名。大慧。不實分別二種法者。而得名為常與無常。而佛如來不墮二法。不墮能取可取二邊。如來寂靜。二法不生故。是故大慧。諸佛如來應正遍知。不得言是常與無常。大慧。凡所言語。而得說言常與無常。遠離一切分別盡者。不得言取常無常法。是故我遮一切凡夫。不得分別常與無常。以得真實寂靜法者得盡分別不生分別。爾時世尊重說

偈言

離於常無常	非常非無常
若見如是佛	彼不墮惡道
若說常無常	諸功德虛妄
無智者分別	遮說常無常
所有立法者	皆有諸過失
若能見唯心	彼不墮諸過

入楞伽經佛性品第十一

爾時聖者大慧菩薩摩訶薩。復請佛言。世尊。惟願如來應正遍知為我說。善逝為我說陰界入生滅之相。世尊。若無我者誰生誰滅。世尊。一切凡夫依生滅住不見苦盡。是故不知涅槃之相。佛告聖者大慧菩薩言。善哉善哉。善哉大慧。汝今諦聽當為汝說。大慧白佛言。善哉世尊。唯然受教。佛告大慧。如來之藏是善不善因故。能與六道作生死因緣。譬如伎兒出種種伎。眾生依於如來藏故。五道生死。大慧。而如來藏離我我所。諸外道等不知不覺。是故三界生死因緣不斷。大慧。諸外道等妄計我故。不能如實見如來藏。以諸外道無始世來虛妄執著種種戲論諸熏習故。大慧。阿梨耶識者。名如來藏。而與無明七識共俱。如大海波常不斷絕身俱生故。離無常過離於我過自性清淨。餘七識者。心意意識等念念不住是生滅法。七識由彼虛妄因生。不能如實分別諸法。觀於高下長短形相故。執著名相故。能令自心見色相故。能得苦樂故。能離解脫因故。因名相生隨煩惱貪故。依彼念因諸根滅盡故。不次第生故。餘自意分別不生苦樂受故。是故入少想定滅盡定。入三摩跋提四禪實諦解脫而修行者生解脫相。以不知轉滅虛妄相故。大慧。如來藏識不在阿梨耶識中。是故七種識有生有滅。如來藏識不生不滅。何以故。彼七種識依諸境界念觀而生。此七識境界一切聲聞辟支佛外道修行者。不能覺知。不如實知人無我故。以取同相別相法故。以見陰界入法等故。大慧。如來藏如實見五法體相法無我故不生。如實知諸地次第展轉和合故。餘外道不正見不能觀察。大慧。菩薩住不動地。爾時得十種三昧門等為上首。得無量無邊三昧。依三昧佛住持。觀察不可思議諸佛法及自本願力故。遮護三昧門實際境界。遮已入自內身聖智證法真實境界。不同聲聞辟支佛外道修行所觀境界。爾時過彼十種聖道。入於如來意生身智身。離諸功用三昧心故。是故大慧。諸菩薩摩訶薩欲證勝法如來藏阿梨耶識者。應當修行令清淨故。大慧。若如來藏阿梨耶識名為無者。離阿梨耶識無生無滅。一切凡夫及諸聖人。依彼阿梨耶識故有生有滅。以依阿梨耶識故。諸修行者入自內身聖行所證。現法樂行而不休息。大慧。此如來心阿梨耶識如來藏諸境界。一切聲聞辟支佛諸外道等不能分別。何以故。以如來藏是清淨相。客塵煩惱垢染不淨。大慧。我依此義依勝鬘夫人。依餘菩薩摩訶薩深智慧者。說如來藏阿梨耶識。共七種識生名轉滅相。為諸聲聞辟支佛等示法無我。對勝鬘說言。如來藏是如來境界。大慧。如來藏識阿梨耶識境界我今與汝及諸菩薩甚深智者。能了分別此二種法。諸餘聲聞

辟支佛及外道等執著名字者。不能了知如此二法。大慧。是故汝及諸菩薩摩訶薩當學此法。爾時世尊重說偈言

甚深如來藏	與七識俱生
取二法則生	如實知不生
如鏡像現心	無始習所熏
如實觀察者	諸境悉空無
如癡見指月	觀指不觀月
計著名字者	不見我真實
心如巧伎兒	意如狡猾者
意識及五識	虛妄取境界
如伎兒和合	誑惑於凡夫

入楞伽經五法門品第十二

爾時聖者大慧菩薩摩訶薩。復請佛言。世尊。惟願如來應正遍知為我說。善逝。為我說五法體相及二無我差別行相。我及一切諸菩薩等。若得善知五法體相二種無我差別相者。修行是法次第入於一切諸地。修行是法能入一切諸佛法中。入諸佛法者。乃至能入如來自身內證智地。佛告聖者大慧菩薩言。善哉善哉。善哉大慧。汝今諦聽當為汝說。大慧菩薩言。善哉世尊。唯然受教。佛告大慧。我為汝說五法體相二種無我差別行相。大慧。何等五法。一者名二者相三者分別四者正智五者真如。內身修行證聖人智離斷常見現如實修行者。入三昧樂三摩跋提行門故。大慧。一切凡夫不覺不知五法體相二種無我。惟以自心見於外物。是故生於分別之心非謂聖人。大慧白佛言。世尊。云何凡夫生分別心非聖人也。佛告大慧。一切凡夫執著名相隨順生法。隨順生法已見種種相。墮我我所邪見心中。執著具足。一切法相。執著已入於無明黑闇障處。入障處已起於貪心。起貪心已而能造作貪瞋癡業。造業行已不能自止。如蠶作繭以分別心而自纏身。墮在六道大海險難。如轆轤迴轉不自覺知。以無智故不知一切諸法如幻。不知無我我所諸法非實從於妄想分別而生。而不知離可見能見。而不知離生住滅相。不知自心虛妄而生。謂知隨順自在天。時。微塵。我生。大慧。何者為名。謂眼識見前色等法相如聲相耳相鼻相舌相身相。大慧。如是等相。我說名為名相。大慧。何者分別以依何等法說名取相。了別此法如是如是畢竟不異。謂象馬車步人民等分別種種相。是名分別。大慧。何者正智。以觀察名相。觀察已不見實法。以彼迭共因生故見。迭共生者諸識不復起。分別識相不斷不常。是故不墮一切外道聲聞辟支佛地。大慧。是名正智。復次大慧。菩薩摩訶薩依正智。不取名相法以為有。不取不見相以為無。何以故。以離有無邪見故。以不見名相是正智義。是故我說名為真如。大慧。菩薩住真如法者。得入無相寂靜境界。入已得入菩薩摩訶薩初歡喜地。菩薩得初歡喜地時。證百金剛三昧明門。捨離二十五有一切果業。過諸聲聞辟支佛地。住如來家真如境界。如實修行知五法相如幻如夢。如實觀察一切諸法。起自內身證聖智修行

。如是展轉遠離虛妄世間覺觀所樂之地。次第乃至法雲地。入法雲地已次入三昧力自在神通諸華莊嚴如來之地。入如來地已為教化眾生。現種種光明應莊嚴身如水中月。依無盡句善縛所縛。隨眾生信者而為說法。離心意意識身故。大慧。菩薩入真如已得佛地中如是如是無量無邊法。大慧復白佛言。世尊。世尊為五法入三法。為三法入五法中。為自體相各各差別。佛告大慧。三法入五法中。大慧。非但三法入五法中。八種識二種無我亦入五法。大慧。云何三法入五法中。大慧。名相名為分別法相。大慧。依彼二法分別生心心數法。一時非前後。如日共光明一時。而有分別種種相。大慧。是名三相。依因緣力生故。大慧。正智真如名第一義諦相。依不滅法故。復次大慧。著於自心見分別法。差別有八種以分別諸相。以為實故離我我所生滅之法。爾時得證二無我法。大慧。五法法門入諸佛地。諸地法相亦入五法門中。一切聲聞辟支佛法亦入五法門中。如來內身證聖智法亦入五法門中。復次大慧。五法相名分別真如正智。大慧。何者名為相。相者見色形相狀貌勝不如。是名為相。大慧。依彼法相起分別相。此是瓶此是牛馬羊等。此法如是如是不異。大慧。是名為名。大慧。依於彼法立名。了別示現彼相。是故立彼種種名字牛羊馬等。是名分別心心數法。大慧。觀察名相乃至微塵。常不見一法相諸法不實。以虛妄心生分別故。大慧。言真如者名為不虛。決定畢竟盡自性自體。正見真如相。我及諸菩薩及諸佛如來應正遍知。說名異義一。大慧。如是等隨順正智。不斷不常。無分別分別不行處。隨順自身內證聖智。離諸一切外道聲聞辟支佛等惡見朋黨不正智中。大慧。於五法三法相八種識二種無我。一切佛法皆入五法中。大慧。汝及諸菩薩摩訶薩。為求勝智應當修學。大慧。汝知五法不隨他教故。爾時世尊重說偈言

五法自體相	及與八種識
二種無我法	攝取諸大乘
名相及分別	三法自體相
正智及真如	是第一義相

入楞伽經恒河沙品第十三

爾時聖者大慧菩薩摩訶薩白佛言。世尊。如世尊依名字說過去未來現在諸佛如恒河沙。世尊。佛說如是。為依如來口中所說。我隨順取。為更有義。願為我說。佛告聖者大慧菩薩言。大慧。如我所說名字章句。莫如是取。大慧。三世諸佛非恒河沙等。何以故。所說譬喻過世間者。非如譬喻。何以故。以有相似不相似故。大慧。諸佛如來應正遍知。不定說過世間相似不相似譬喻。何以故。大慧。我說譬喻但是少分故。大慧。我及諸佛如來應正遍知。所說譬喻但說少義。何以故。愚癡凡夫諸外道等。著諸法常增長邪見。隨順世間輪迴生死。為彼生厭聞生驚怖又聞諸佛如恒河沙便於如來無上聖道生易得想求出世法。大慧。是故我說諸佛如來如恒河沙。何以故。我餘經中說佛出世如優曇華。眾生聞已言佛道難得不修精進。是故我說諸佛如來如恒河沙。大慧。我說諸佛出世如優曇華者。依可化眾生義故。我說諸佛如優曇華。大

慧。而優曇華於世間中無人曾見。當亦不見。大慧。諸佛如來世間曾見現見當見。大慧。我說如是。非依自身所得法說。是故說言如優曇華。諸佛如來亦復如是。大慧。我依內身證法說法。是故說過世間譬喻。以諸凡夫無信眾生。不能信我所說譬喻。何以故。說自內身聖智境界。無譬喻可說。遠離心意意識過諸見地。諸佛如來真如之法不可說故。是故我說種種譬喻。大慧。我說諸佛如恒河河沙者。是少分譬喻。大慧。諸佛如來平等非不平等。以非分別分別故。大慧。譬如恒河河中所有之沙。魚鼈龜龍牛羊象馬諸獸踐踏。而彼河沙不生分別不瞋不恚。亦不生心彼惱亂我。無分別故淨離諸垢。大慧。諸佛如來應正遍知亦復如是。內身證得聖智。滿足諸力神通自在功德如恒河沙。一切外道邪論諸師愚癡魚鼈。以瞋恚心毀罵如來。如來不動不生分別。本願力故為與眾生三昧三摩跋提。一切諸樂令滿足故。不分別分別。大慧。是故我說諸佛如來如恒河河沙等。等者平等無有異相。以離愛身故。大慧。譬如恒河河沙不離地相。大慧。大地火燒火不異地故。火不燒地地大有火相續體故。大慧。愚癡凡夫墮顛倒智。自心分別言地被燒。而地不燒以不離地。而得更有四大火身故。大慧。諸佛如來亦復如是。諸佛如來法身之體。如恒河河沙等。不滅不失故。大慧。譬如恒河河沙無量無邊。大慧。諸佛如來亦復如是。出於世間放無量光。遍於一切諸佛大會。為化眾生令覺知故。大慧。如恒河河沙更不生相。如彼微塵微塵體相如是而住。大慧。諸佛如來亦復如是。於世間中不生不滅。諸佛如來斷有因故。大慧。如恒河河沙若出於河亦不可見入於河中亦不可見。亦不起心我出入河。大慧。諸佛如來智慧之力亦復如是。度諸眾生亦不盡滅亦不增長。何以故。諸法無身故。大慧。一切有身皆是無常磨滅之法。非無身法。諸佛如來唯法身故。大慧。譬如有人欲得蘇油。押恒河沙。終不可得無蘇油故。大慧諸佛如來為諸眾生苦惱。所押瞋不可得。不捨自法界相。不捨自法味相。不捨本願與眾生樂。以得具足大慈大悲。我若不令一切眾生入涅槃者。我身亦不入於涅槃。大慧。如恒河河沙隨水而流終不逆流。大慧。諸佛如來為諸眾生說法亦爾。隨順涅槃而非逆流。大慧。是故我說諸佛如來如恒河河沙。大慧。言恒河河沙隨順流者非是去義。若佛如來有去義者。諸佛如來應無常滅。大慧。世間本際尚不可知。不可知者我云何依而說去義。是故如來非為去義。大慧。去義者名為斷義。愚癡凡夫不覺不知。大慧白佛言。世尊。世尊若眾生在於世間輪迴。去來本際不可知者。云何如來而得解脫。復令眾生得於解脫。佛告大慧言。大慧。言解脫者。離於一切戲論煩惱無始熏習分別心故。如實能知唯自心見外所分別心迴轉故。是故我說名為解脫。大慧。言解脫者非是滅法。是故汝今問。我若不知本際云何得解脫者。此問不成。大慧。言本際者。是分別心一體異名。大慧。離分別心更無眾生。即此分別名為眾生。大慧。真實智慧觀內外法。無法可知能知故。大慧。以一切法本際來寂靜。大慧。不如實知唯自心見虛妄分別。是故生於分別之心。如實知者不生分別。爾時世尊重說偈言

觀察於諸佛 譬如恒河沙
不滅亦不生 彼人能見佛
遠離諸塵垢 如恒河河沙
隨順流不變 法身亦如是

入楞伽經卷第七

剎那品第十四

爾時聖者大慧菩薩摩訶薩復白佛言。世尊。惟願如來應正遍知為我說。善逝為我說一切法生滅之相。云何如來說一切法念念不住。佛告大慧菩薩言。善哉善哉。善哉大慧。汝今諦聽當為汝說。大慧言。善哉世尊。唯然受教。佛告大慧。一切法。一切法者。所謂善法不善法。有為法無為法。世間法出世間法。有漏法無漏法。內法外法。大慧略說五陰法。因心意意識熏習增長。諸凡夫人依心意意識熏習故。分別善不善法。大慧。聖人現證三昧三摩跋提無漏善法樂行。大慧。是名善法。復次大慧。言善不善法者。所謂八識。何等為八。一者阿梨耶識。二者意。三者意識。四者眼識。五者耳識。六者鼻識。七者舌識。八者身識。大慧。五識身共意識身。善不善法展轉差別相續。體無差別身。隨順生法生已還滅。不知自心見虛妄境界。即滅時。能取境界形相大小勝如之狀。大慧。意識共五識身相應生。一念時不住。是故我說彼法念時不住。大慧。言剎尼迦者。名之為空。阿梨耶識名如來藏。無共意轉識熏習故名為空。具足無漏熏習法故。名為不空。大慧。愚癡凡夫不覺不知。執著諸法剎那不住。墮在邪見而作是言。無漏之法亦剎那不住。破彼真如如來藏故。大慧。五識身者不生六道不受苦樂不作涅槃因。大慧。如來藏不受苦樂非生死因。餘法者共生共滅。依於四種熏習醉故。而諸凡夫不覺不知邪見熏習。言一切法剎那不住。復次大慧。金剛如來藏。如來證法。非剎那不住。大慧。如來證法。若剎那不住者。一切聖者不成聖人。大慧。非非聖人。以聖人故。大慧。金剛住於一劫。稱量等住不增不減。大慧。云何愚癡凡夫分別諸法。言剎那不住。而諸凡夫不得我意。不覺不知內外諸法念念不住。大慧復白佛言。世尊。如來常說滿足六波羅蜜法。得阿耨多羅三藐三菩提。世尊。何等為六波羅蜜。云何滿足。佛告大慧菩薩言。大慧。波羅蜜差別有三種。謂世間波羅蜜。出世間波羅蜜。出世間上上波羅蜜。大慧。言世間波羅蜜者。愚癡凡夫執著我所法墮於二邊。為於種種勝妙境界行波羅蜜。求於色等境界果報。大慧。愚癡凡夫行尸波羅蜜。羸提波羅蜜。毘梨耶波羅蜜。禪波羅蜜。般若波羅蜜。乃至生於梵天。求五神通世間之法。大慧。是名世間諸波羅蜜。大慧。言出世間波羅蜜者。謂聲聞辟支佛。取聲聞辟支佛涅槃心。修行波羅蜜。大慧。如彼世間愚癡凡夫。為於自身求涅槃樂。而行世間波羅蜜行。聲聞緣覺亦復如是。為自身故求涅槃樂。行出世間波羅蜜行。而乃求彼非究竟樂。大慧。出世間上上波羅蜜者。如實能知但是自心虛妄分別見外境界。爾時實知惟是自心見內外法。不分別虛妄分別。不取內外自心色相故。菩薩摩訶薩如實能知一切法故行檀波羅蜜。為令一切眾生得無怖畏安隱樂故。是名檀波羅蜜。大慧。菩薩觀彼一切諸法。不生分別隨順清涼。是名尸波羅蜜。大慧。菩薩離分別心忍。彼修行如實而知能取可取境界非實。是名菩薩羸提波羅蜜。大慧。菩薩云何修精進行。初中後夜常勤修行。隨順如實法斷諸分別。是名毘梨耶波羅蜜。大慧。菩薩離於分別心

。不隨外道能取可取境界之相。是名禪波羅蜜。大慧。何者菩薩般若波羅蜜。菩薩如實觀察自心分別之相。不見分別不墮二邊。依如實修行轉身。不見一法生不見一法滅。自身內證聖行修行。是名菩薩般若波羅蜜。大慧。波羅蜜義如是滿足者。得阿耨多羅三藐三菩提。爾時世尊重說偈言

空無常剎那	愚分別有為
如河燈種子	空無常剎那
分別剎那義	剎那亦如是
剎尼迦不生	寂靜離所作
一切法不生	我說剎那義
物生即有滅	不為凡夫說
分別相續法	妄想見六道
若無明為因	能生諸心者
乃至色未生	中間依何住
即生即有滅	餘心隨彼生
色不一念住	觀於何法生
依何因生法	心無因而生
是故生不成	云何知念壞
修行者證定	金剛佛舍利
光音天宮殿	世間不壞事
其如證法實	如來智成就
比丘證平等	云何念不住
乾闥婆幻色	何故念不住
無四大見色	四大何所為

入楞伽經化品第十五

爾時聖者大慧菩薩摩訶薩復白佛言。世尊。如佛世尊與諸羅漢。授阿耨多羅三藐三菩提記。如來復說諸佛如來不入涅槃。復說如來應正遍知。何等夜證大菩提。何等夜入般涅槃於其中間不說一字。如來復說諸佛如來。常入無覺無觀無分別定。復言作諸種種應化度諸眾生。世尊復說諸識念念差別不住。金剛密迹常隨侍衛。復說世間本際難知。復言眾生入般涅槃。若入涅槃。應有本際。復說諸佛無有怨敵而見諸魔。復說如來斷一切障。而見旃遮摩那毘孫陀梨等謗。佛入娑梨那村竟。不得食空鉢而出。世尊。若如是者如來便有無量罪業。云何如來不離一切諸罪過惡。而得阿耨多羅三藐三菩提一切種智。佛告聖者大慧菩薩言。善哉善哉。善哉大慧。汝今諦聽當為汝說。大慧白佛言。善哉世尊。唯然受教。佛告大慧。我為曾行菩薩行諸聲聞等依無餘涅槃而與授記。大慧。我與聲聞授記者。為怯弱眾生生勇猛心。大慧。此世界中及餘佛國。有諸眾生行菩薩行。而復樂於聲聞法行。為轉彼取大菩提。應化佛為應化聲聞授記

。非報佛法身佛而授記荊。大慧。聲聞辟支佛涅槃無差別。何以故。斷煩惱無差異故。斷煩惱障非斷智障。復次大慧。見法無我斷於智障。見人無我斷煩惱障。大慧轉意識故斷法障業障。以轉意阿梨耶識熏習故究竟清淨。大慧。我常依本法體而住更不生法。依本名字章句。不覺不思而說諸法。大慧。如來常如意知常不失念。是故如來無覺無觀。諸佛如來離四種地已。遠離二種死二種障二種業故。大慧。七種識意意識。眼耳鼻舌身念念不住。因虛妄熏習離於無漏諸善法故。大慧。如來藏世間不生不死。不來不去。常恒清涼不變。復次大慧。依如來藏故有世間涅槃苦樂之因。而諸凡夫不覺不知。而墮於空虛妄顛倒。大慧。金剛密迹常隨侍衛。應化如來前後圍遶。非法佛報佛根本如來應正遍知。大慧。根本如來遠離諸根大小諸量。遠離一切凡夫聲聞辟支佛等。大慧。如實修行。得彼真如樂行境界者。知根本佛。以得平等法忍故。是故金剛密迹隨應化佛。大慧。應化佛者無業無謗。而應化佛不異法佛報佛如來而亦不一。如陶師鹽等作所作事。應化佛作化眾生事。異真實相說法。不說內所證法聖智境界。復次大慧。一切凡夫外道聲聞辟支佛等。見六識滅墮於斷見。不見阿梨耶識墮於常見。復次大慧。不見自心分別本際。是故世間名無本際。大慧。遠離自心分別見者。名為解脫得涅槃證。大慧。諸佛如來遠離四種熏習氣故。是故無過。爾時世尊重說偈言

三乘及非乘	諸佛無量乘
一切記佛地	說諸煩惱斷
內身證聖智	及無餘涅槃
誘進怯眾生	是故隱覆說
如來得證智	亦說於彼道
眾生依入道	二乘無涅槃
見欲色及有	及四種熏地
意識亦所生	見意識共住
見意眼識等	常無常斷滅
常見依意等	而起涅槃見

入楞伽經遮食肉品第十六

爾時聖者大慧菩薩摩訶薩白佛言。世尊。我觀世間生死流轉怨結相連墮諸惡道。皆由食肉更相殺害。增長貪瞋不得出離甚為大苦。世尊。食肉之人斷大慈種。修聖道者不應得食。世尊。諸外道等說邪見法盧迦耶陀墮俗之論。墮於斷常有無見中皆遮食肉。自己不食不聽他食。云何如來清淨法中修梵行者。自食他食一切不制。如來世尊於諸眾生慈悲一等。云何而聽以肉為食。善哉世尊。哀愍世間願為我說食肉之過不食功德。我及一切諸菩薩等聞已得依如實修行廣宣流布。令諸現在未來眾生一切識知

佛告聖者大慧菩薩言。善哉善哉善哉大慧。汝大慈悲愍眾生故能問此義。汝今諦聽當為汝說。大慧菩薩白佛言。善哉世尊。唯然受教。佛告大慧。夫食肉者有無量過。諸菩薩摩訶薩修大慈悲不得食肉。食與不食功德罪過我說少分。汝今諦聽。大慧。

我觀眾生從無始來食肉習故。貪著肉味更相殺害。遠離賢聖受生死苦。捨肉味者聞正法味。於菩薩地如實修行速得阿耨多羅三藐三菩提。復令眾生入於聲聞辟支佛地止息之處。息已令入如來之地。大慧。如是等利慈心為本。食肉之人斷大慈種。云何當得如是大利。是故大慧。我觀眾生輪迴六道。同在生死共相生育。迭為父母兄弟姊妹。若男若女中表內外六親眷屬。或生餘道善道惡道常為眷屬。以是因緣我觀眾生更相噉肉無非親者。由貪肉味迭互相噉。常生害心增長苦業流轉生死不得出離。佛說是時。諸惡羅刹聞佛所說。悉捨惡心止不食肉。迭相勸發慈悲之心。護眾生命過自護身。捨離一切諸肉不食。悲泣流淚而白佛言。世尊。我聞佛說諦觀六道。我所噉肉皆是我親。乃知食肉眾生大怨斷大慈種。長不善業是大苦本。世尊。我從今日斷不食肉。及我眷屬亦不聽食。如來弟子有不食者。我當晝夜親近擁護。若食肉者。我當與作大不饒益。佛言。大慧。羅刹惡鬼常食肉者。聞我所說尚發慈心捨肉不食。況我弟子行善法者當聽食肉。若食肉者。當知即是眾生大怨斷我聖種。大慧。若我弟子聞我所說。不諦觀察而食肉者。當知即是旃陀羅種。非我弟子我非其師。是故大慧。若欲與我作眷屬者。一切諸肉悉不應食

復次大慧。菩薩應觀一切是肉皆依父母膿血不淨赤白和合生不淨身。是故菩薩觀肉不淨不應食肉

復次大慧。食肉之人。眾生聞氣悉皆驚怖逃走遠離。是故菩薩修如實行。為化眾生不應食肉大慧。譬如旃陀羅獵師屠兒捕魚鳥人一切行處。眾生遙見作如是念。我今定死而此來者是大惡人。不識罪福斷眾生命。求現前利今來至此為覓我等。今我等身悉皆有肉。是故今來我等定死。大慧。由人食肉能令眾生見者皆生如是驚怖。大慧。一切虛空地中眾生。見食肉者皆生驚怖。而起疑念我於今者為死為活。如是惡人不修慈心。亦如豺狼遊行世間常覓肉食。如牛噉草蜚蝗逐糞不知飽足。我身是肉正是其食不應逢見。即捨逃走離之遠去。如人畏懼羅刹無異。大慧。食肉之人。能令眾生見者皆生如是驚怖。當知食肉眾生大怨。是故菩薩修行慈悲。為攝眾生不應食彼。非聖慧人所食之味。惡名流布聖人呵嘖。是故大慧。菩薩為攝諸眾生故不應食肉

復次大慧。菩薩為護眾生信心不應食肉。何以故。大慧。言菩薩者眾生皆知。是佛如來慈心之種。能與眾生作歸依處。聞者自然不生疑怖。生親友想善知識想不怖畏想。言得歸依處得安隱處得善導師。大慧。由不食肉能生眾生如是信心。若食肉者眾生即失一切信心。便言世間無可信者斷於信根。是故大慧。菩薩為護眾生信心一切諸肉悉不應食

復次大慧。我諸弟子。為護世間謗三寶故不應食肉。何以故。世間有人見食肉故。謗毀三寶作如是言。於佛法中。何處當有真實沙門婆羅門修梵行者。捨於聖人本所應食食眾生肉。猶如羅刹食肉滿腹醉眠不動。依世凡人豪貴勢力覓肉食噉。如羅刹王驚怖眾生。是故處處唱如是言。何處當有真實沙門婆羅門修淨行者。無法無沙門無毘尼無淨行者。生如是等無量無邊惡不善心。斷我法輪絕滅聖種。一切皆由食肉者過。

是故大慧。我弟子者。為護惡人毀謗三寶。乃至不應生念肉想。何況食肉

復次大慧。菩薩為求清淨佛土教化眾生不應食肉。應觀諸肉如人死屍。眼不欲見不用聞氣。何況可嗅而著口中。一切諸肉亦復如是。大慧。如燒死屍臭氣不淨。與燒餘肉臭穢無異。云何於中有食不食。是故大慧。菩薩為求清淨佛土教化眾生不應食肉

復次大慧。菩薩為求出離生死。應當專念慈悲之行。少欲知足厭世間苦速求解脫當捨憤鬧就於空閑。住屍陀林阿蘭若處。塚間樹下獨坐思惟。觀諸世間無一可樂。妻子眷屬如枷鎖想。宮殿臺觀如牢獄想。觀諸珍寶如糞聚想。見諸飲食如膿血想。受諸飲食如塗癰瘡。趣得存命繫念聖道不為貪味。酒肉葱韭蒜薤臭味悉捨不食。大慧。若如是者是真修行。堪受一切人天供養。若於世間不生厭離。貪著滋味酒肉葷辛得便噉食。不應受於世間信施

復次大慧。有諸眾生過去曾修無量因緣。有微善根得聞我法。信心出家在我法中。過去曾作羅刹眷屬。虎狼師子猫狸中生。雖在我法食肉餘習見食肉者歡喜親近。入諸城邑聚落塔寺飲酒噉肉以為歡樂。諸天下觀猶如羅刹爭噉死屍等無有異。而不自知已失我眾成羅刹眷屬。雖服袈裟剃除鬚髮。有命者見心生恐怖如畏羅刹。是故大慧。若以我為師者。一切諸肉悉不應食

復次大慧。世間邪見諸呪術師若其食肉呪術不成。為成邪術尚不食肉。況我弟子為求如來無上聖道出世解脫。修大慈悲精勤苦行猶恐不得。何處當有如是解脫為彼癡人食肉而得。是故大慧。我諸弟子為求出世解脫樂故不應食肉

復次大慧。食肉能起色力。食味人多貪著。應當諦觀。一切世間有身命者。各自寶重畏於死苦。護惜身命人畜無別。寧當樂存疥野干身。不能捨命受諸天樂。何以故。畏死苦故。大慧。以是觀察死為大苦是可畏法。自身畏死云何當得而食他肉。是故大慧。欲食肉者先自念身。次觀眾生不應食肉

復次大慧。夫食肉者。諸天遠離。何況聖人。是故菩薩為見聖人。當修慈悲不應食肉。大慧。食肉之人睡眠亦苦起時亦苦。若於夢中見種種惡。驚怖毛豎心常不安。無慈心故乏諸善力。若其獨在空閑之處。多為非人而伺其便。虎狼師子亦來伺求欲食其肉。心常驚怖不得安隱

復次大慧。諸食肉者貪心難滿。食不知量不能消化。增益四大口氣腥臊。復中多有無量惡蟲。身多瘡癬白癩病疾種種不淨。現在凡夫不憚聞見。何況未來無病香潔人身可得。復次大慧。我說凡夫為求淨命噉於淨食。尚應生心如子肉想。何況聽食非聖人食。聖人離者以肉能生無量諸過。失於出世一切功德。云何言我聽諸弟子食諸肉血不淨等味。言我聽者是則謗我。大慧。我聽弟子食諸聖人所應食食。非謂聖人遠離之食。聖食能生無量功德遠離諸過。大慧。過去現在聖人食者。所謂粳米大小麥豆。種種油蜜。甘蔗甘蔗汁。鶩陀末干提等。隨時得者聽食為淨。大慧。於未來世有愚癡人。說種種毘尼言得食肉。因於過去食肉熏習愛著肉味。隨自心見作如是說。非佛聖人說為美食。大慧。不食肉者。要因過去供養諸佛種諸善根。能信佛語堅住毘尼信諸因

果。至於身口能自節量。不為世間貪著諸味。見食肉者能生慈心。大慧。我憶過去有王名師子奴。食種種肉愛著肉味。次第乃至食於人肉。因食人肉父母兄弟妻子眷屬皆悉捨離。一切臣民國土聚落即便謀反共斷其命。以食肉者有如是過。是故不應食一切肉。復次大慧。自在天王化身為鵠。釋提桓因是諸天主。因於過去食肉習氣。化身作鷹驚逐此鵠。鵠來投我。我於爾時。作尸毘王。憐愍眾生更相食噉。稱己身肉與鷹代鵠。割肉不足身上秤上受大苦惱。大慧。如是無量世來食肉熏習。自身他身有如是過。何況無愧常食肉者。大慧。復有餘王不食肉者。乘馬遊戲為馬驚波牽入深山。失於侍從不知歸路。不食肉故師子虎狼見無害心。與雌師子共行欲事。乃至生子斑足王等。以過去世食肉熏習。及作人王亦常食肉。在七家村多樂食肉。食肉太過遂食人肉。生諸男女盡為羅刹。大慧。食肉眾生依於過去食肉熏習。多生羅刹師子虎狼豺豹猫狸鷄梟雕鷲鷹鷄等中。有命之類各自護身不令得便。受飢餓苦常生惡心念食他肉。命終復墮惡道。受生人身難得。何況當有得涅槃道。大慧當知。食肉之人有如是等無量諸過。不食肉者即是無量功德之聚。大慧。而諸凡夫不知如是食肉之過不食功德。我今略說不聽食肉。大慧。若一切人不食肉者。亦無有人殺害眾生。由人食肉若無可食處處求買。為財利者殺以販賣。為買者殺。是故買者與殺無異。是故食肉能障聖道。大慧。食肉之人愛著肉味。至無畜生乃食人肉。何況麋鹿雉兔鵝鴈猪羊雞狗駝驢象馬龍蛇魚鱉。水陸有命得而不食。由著肉味設諸方便殺害眾生。造作種種罝羅機網。羅山罝地截河堰海。遍諸水陸安置罝網機撥坑塹弓刀毒箭間無空處。虛空地水種種眾生皆被殺害。為食肉故。大慧。獵師屠兒食肉人等。惡心堅固能行不忍。見諸眾生形體鮮肥膚肉充悅生食味心。更相指示言是可噉。不生一念不忍之心。是故我說食肉之人斷大慈種

大慧。我觀世間無有是肉而非命者。自己不殺不教人殺他不為殺。不從命來而是肉者。無有是處。若有是肉不從命出而是美食。我以何故不聽人食。遍求世間無如是肉。是故我說食肉是罪。斷如來種故不聽食

大慧。我涅槃後於未來世法欲滅時。於我法中有出家者。剃除鬚髮自稱我是沙門釋子。披我袈裟癡如小兒。自稱律師墮在二邊。種種虛妄覺觀亂心貪著肉味。隨自心見說毘尼中言得食肉。亦謗我言諸佛如來聽人食肉。亦說因制而聽食肉。亦謗我言如來世尊亦自食肉。大慧。我於象腋。央掘魔。涅槃。大雲等一切修多羅中不聽食肉。亦不說肉入於食味。大慧。我若聽諸聲聞弟子肉為食者。我終不得口常讚歎修大慈悲行如實行者。亦不讚歎屍陀林中頭陀行者。亦不讚歎修行大乘住大乘者。亦不讚歎不食肉者。我不自食不聽他食。是故我勸修菩薩行歎不食肉。勸觀眾生應如一子。云何唱言我聽食肉。我為弟子修三乘行者速得果故。遮一切肉悉不聽食。云何說言我毘尼中聽人食肉。又復說言如來餘修多羅中說三種肉聽人食者。當知是人不解毘尼次第斷故唱言得食。何以故。大慧。肉有二種。一者他殺。二者自死。以世人言有肉得食有不得者。象馬龍蛇人鬼獼猴猪狗及牛。言不得食餘者得食。屠兒不問得食不得。一切

盡殺處處銜賣。眾生無過橫被殺害。是故我制他殺自死悉不得食。見聞疑者所謂他殺。不見聞疑者所謂自死。是故大慧。我毘尼中唱如是言。凡所有肉於一切沙門釋子皆不淨食。污清淨命障聖道分無有方便而可得食。若有說言佛毘尼中說三種肉為不聽食非為聽食。當知是人堅住毘尼是不謗我。大慧。今此楞伽修多羅中。一切時一切肉。亦無方便而可得食。是故大慧。我遮食肉不為一人。現在未來一切不得。是故大慧。若彼癡人自言律師。言毘尼中聽人食肉。亦謗我言如來自食。彼愚癡人成大罪障。長夜墮於無利益處無聖人處不聞法處。亦不得見現在未來賢聖弟子。況當得見諸佛如來。大慧。諸聲聞人常所應食。米麵油蜜種種麻豆能生淨命。非法貯畜非法受取。我說不淨尚不聽食。何況聽食血肉不淨。大慧。我諸聲聞辟支佛菩薩弟子食於法食。非食飲食何況如來。大慧。諸佛如來法食法住非飲食身。非諸一切飲食住身。離諸資生愛有求等。遠離一切煩惱習過。善分別知心心智慧一切智一切見。見諸眾生平等憐愍。是故大慧。我見一切諸眾生等猶如一子。云何而聽以肉為食。亦不隨喜。何況自食。大慧。如是一切葱韭蒜薤臭穢不淨能障聖道。亦障世間人天淨處。何況諸佛淨土果報。酒亦如是能障聖道能損善業能生諸過。是故大慧。來聖道者酒肉葱韭及蒜薤等能熏之味悉不應食。爾時世尊重說偈言

大慧菩薩問	酒肉葱韭蒜
佛言是不淨	一切不聽食
羅剎等食噉	非聖所食味
食者聖呵嘖	及惡名流布
願佛分別說	食不食罪福
大慧汝諦聽	我說食中過
酒肉葱韭蒜	是障聖道分
我觀三界中	及得聖道眾
無始世界來	展轉莫非親
云何於其中	而有食不食
觀肉所從來	出處最不淨
膿血和雜生	尿屎膿涕合
修行淨行者	當觀不應食
種種肉及葱	酒亦不得飲
種種韭及蒜	修行常遠離
常遠離麻油	穿孔床不眠
飛揚諸細蟲	斷害他命故
肉食長身力	由力生邪念
邪念生貪欲	故不聽食肉
由食肉生貪	貪心致迷醉

迷醉長愛欲 不解脫生死
為利殺眾生 為肉追錢財
彼二人惡業 死墮叫喚獄
三種名淨肉 不見聞不疑
世無如是肉 生墮食肉中
臭穢可厭患 常生顛狂中
多生旃陀羅 獵師屠兒家
或生羅刹女 及諸食肉處
羅刹猫狸種 食肉生彼中
象腋與大雲 涅槃。勝鬘經
及入楞伽經 我不聽食肉
諸佛及菩薩 聲聞亦呵嘖
食肉無慚愧 生生常顛狂
先說見聞疑 已斷一切肉
妄想不覺知 故生食肉想
如彼貪欲過 障礙聖解脫
酒肉葱韭蒜 悉為聖道障
未來世眾生 於肉愚癡說
言此淨無罪 佛聽我等食
淨食如藥想 猶如食子肉
知足生厭離 修行行乞食
安住慈心者 我說常厭離
師子豺虎狼 恒可同遊止
食肉見者怖 云何而可食
是故修行者 慈心不食肉
食肉斷慈心 離涅槃解脫
及違聖人教 故不聽食肉
不食生梵種 及諸修行道
智慧及富貴 斯由不食肉

入楞伽經陀羅尼品第十七

爾時世尊。告聖者大慧菩薩摩訶薩言。大慧。汝應諦聽受持我楞伽經呪。是呪過去未來現在諸佛。已說今說當說。大慧。我今亦說。為諸法師受持讀誦楞伽經者。而說呪曰

兜諦兜諦 祝諦祝諦 蘇頗諦蘇頗諦 迦諦迦諦 阿摩利 阿摩諦 毘摩梨毘摩
梨 尼彌尼彌 奚彌奚彌 婆迷婆迷 歌梨歌梨 歌羅歌梨 阿^{齒齋}摩^{齒齋} 遮^{齒齋}兜^{齒齋}
讓^{齒齋} 蘇弗^{齒齋} 葛弟葛弟 波弟波弟 奚咪奚咪地咪地咪 羅制羅制 波制波制 槃
弟槃弟 阿制彌制 竹荼梨兜荼弟 波羅弟 遏計遏計 斫計斫計梨利 爾犀咪 屎
咪 奚咪奚咪 晝晝晝晝 抽畜抽畜 紬紬紬紬 除除除除 蘇婆呵

大慧。是名楞伽大經中呪文句。善男子善女人。比丘比丘尼優婆塞優婆夷等。能
受持讀此文句為人演說。無有人能覓其罪過。若天天女。若龍龍女。若夜叉夜叉女。
阿修羅阿修羅女。迦樓羅迦樓羅女。緊那羅緊那羅女。摩睺羅伽摩睺羅伽女。浮多浮
多女。鳩槃荼鳩槃荼女。毘舍闍毘舍闍女。鳴多羅鳴多羅女。阿波羅阿波羅女。羅剎
羅剎女。荼伽荼伽女。鳴周何羅鳴周何羅女。伽吒福多羅伽吒福多羅女。若人非人。
若人女非人女。不能覓其過。若有惡鬼神損害人。欲速令彼惡鬼去者。一百遍轉此陀
羅尼呪。彼諸惡鬼驚怖號哭疾走而去。佛復告大慧。大慧。我為護此護法法師。更說
陀羅尼。而說呪

波頭彌 波頭彌提婢 奚尼奚尼奚禰諸梨 諸羅 諸麗 侯羅 侯麗 由麗 由
羅 由麗 波麗 波羅 波麗 聞制 瞋迭頻迭槃逝末迭遲那 迦梨蘇波呵

大慧。是陀羅尼呪文句。若善男子善女人受持讀誦為人演說。無人能得與作過失。
若天。若天女。若龍若龍女。夜叉夜叉女。阿修羅阿修羅女。迦樓羅迦樓羅女。緊
那羅緊那羅女。摩睺羅伽摩睺羅伽女。乾闥婆乾闥婆女。浮多浮多女。鳩槃荼鳩槃荼
女。毘舍闍毘舍闍女。鳴多羅鳴多羅女。阿拔摩羅阿拔摩羅女。羅叉羅叉女。鳴闍阿
羅鳴闍阿羅女。伽吒福單那伽吒福單那女。若人若非人。若人女非人女。彼一切不能
得其過失。大慧。若有人能受持讀誦此呪文句。彼人得名誦一切楞伽經。是故我說此
陀羅尼句。為遮一切諸羅剎。護一切善男子善女人護持此經者

入楞伽經卷第八

入楞伽經卷第九

元魏天竺三藏菩提留支譯

總品第十八之一

爾時世尊。欲重宣此修多羅深義。而說偈言

如夏諸禽獸	迷惑心見波
諸禽獸愛水	彼水無實事
如是識種子	見諸境界動
諸愚癡眾生	如眼瞠見物
思惟可思惟	及離能思惟
見實諦分別	能知得解脫
是諸法非堅	虛妄分別生
虛妄分別空	依彼空分別
五陰識等法	如水中樹影
如見幻夢等	識中莫分別
幻起尸機關	夢電雲常爾
絕三相續法	眾生得解脫
依諸邪念法	是故有識生
八九種種識	如水中諸波
依熏種子法	常堅固縛身
心流轉境界	如鐵依磁石
依止諸眾生	真性離諸覺
遠離諸作事	離知可知法
行如幻三昧	出諸十地行
汝觀心王法	離心境識相
時知心常轉	即住恆不變
住蓮花宮殿	如幻境界相
住彼勝處已	得諸自在行
如摩尼現色	作度眾生業
無有為無為	除諸分別心
愚癡無智取	如石女夢兒
寂靜及無生	五陰人相續
因緣諸境界	空有及非有
我說諸方便	無如是實相
愚癡取實有	無能相可相
我覺一切法	而不覺一切

我有一切智
凡夫愚分別
我未曾覺知
一切法惟心
輪相畢竟無
本無始生物
石女兒空華
爾時見可見
我不入涅槃
滅諸分別識
非滅諸法相
如瀑水竭盡
如種種識滅
空及無識相
有無離有無
我說一實法
聖人妙境界
如見螢火相
世間見四大
如依草木石
彼幻無是相
無取著可取
如幻如陽焰
若如是實見
即住如實定
此中無心識
如是知諸法
離有無諸緣
三界心迷惑
夢及世間法
可見與資生
身無常世間
世間尊者說
心三界種子
知世間分別

而無一切智
自言世智者
亦不覺眾生
諸陰如毛輪
何處有分別
諸緣中亦無
若能見有為
見迷法即住
不滅諸相業
此是我涅槃
愚癡妄分別
爾時波不生
滅而不復生
如幻本不生
此諸法如夢
離於諸覺觀
離二法體相
種種而無實
種種亦如是
示現諸幻相
諸法體如是
無解脫無縛
如夢眼中醫
離諸分別垢
彼見我無疑
如虛空陽焰
而不知一法
故諸法不生
是故種種見
此二法平等
諸觸及於量
種種色亦爾
如是所作事
迷惑見現未
無如是實法

見世間如是
生及與不生
不生及不滅
阿迦尼妙境
常無分別行
得力通自在
彼處成正覺
諸法不生滅
應化無量億
愚人聞佛法
遠離初中後
遍不動清淨
識性覆法身
迷惑是幻有
心無迷惑法
心依二法縛
但心如是見
觀世間如是
乃是我真子
煖濕及堅動
非實專念有
八種物一身
愚分別諸色
諸因緣和合
不知如是法
諸法及言語
而諸法是無
觀諸法如是
心種種種子
可見分別生
無智愛及業
依他力法生
依法分別事
故不成分別
心依因緣縛

能離諸生死
愚癡迷惑見
修智慧者見
離諸惡行處
離諸心數法
到諸三昧處
化佛此中成
諸法如是體
彼體中出世
如響不思議
及離有無法
無諸相現相
一切身中有
幻非迷惑因
亦非不少有
阿梨耶識起
我法如瀑水
爾時轉諸心
成就實法行
愚分別諸法
無能相可相
形相及諸根
迷惑身羅網
愚癡分別生
流轉三界中
是眾生分別
如化如夢等
不住世涅槃
現見心境界
愚癡樂二法
是心心法因
故說他力法
心迷惑境界
迷惑邪分別
是故生諸身

若離諸因緣	我說不見法
離諸因緣法	離於諸法相
不住諸法中	我說不見境
如王長者等	以種種禽獸
會集宅野中	以示於諸子
我如是諸相	種種鏡像法
內身智為子	說於實際法
如大海波浪	從風因緣生
能起舞現前	而無有斷絕
阿梨耶識常	依風境界起
種種水波識	能舞生不絕
能取可取相	眾生見如是
可見無諸相	毛道如是見
阿梨耶本識	意及於意識
離可取能取	我說如是相
五陰中無我	及無人眾生
生即諸識生	滅即諸識滅
如畫中高下	可見無如是
如是諸物體	見無如是相
如乾闥婆城	禽獸渴愛水
如是可見見	智觀無如是
離可量及想	非因亦非果
離能覺所覺	離能見可見
依陰因緣覺	無人見可見
若不見可見	云何修彼法
因緣 . 因 . 譬喻	立意及因緣
夢 . 乾闥婆 . 輪	陽焰及日月
光焰幻等喻	我遮諸法生
如夢幻迷惑	空分別眾生
不依於三界	內外亦皆無
見諸有不生	乃得無生忍
得如幻三昧	及於如意身
諸通及自在	力 . 心種種法
諸法本不生	空無法體相
彼人迷不覺	隨因緣生滅

如愚癡分別
見外種種相
見骨相佛像
善覺心能知
身住持資生
識取識境界
分別可分別
不能見實法
諸法無自體
行者爾乃息
如墨圖於雞
如癡凡夫取
無諸聲聞人
所見聲聞色
諸菩薩大慈
三界唯是心
轉變彼諸相
法及人行相
大諸摩尼寶
諸佛法如是
如是分別法
離於生住滅
可見染淨去
如中莨若人
一切如金色
如是愚癡人
幻陽焰生有
一子及無子
亦是無量子
一子如清淨
平等無分別
能生種種子
因緣不生法
生法惟因緣
三界惟假名

心見於自心
實無可見法
及諸大離散
住持世間相
可取三種境
意．識．分別三
所有字境界
彼覺迷不見
智慧者能覺
住於無相處
愚取是我雞
三乘同是一
亦無辟支佛
及見諸如來
示現是化身
離二種體相
彼即是真如
日月光焰熾
無分別作事
如醫取毛輪
愚癡虛妄取
及離常無常
如空中毛輪
見諸像大地
彼不曾有金
無始心法染
愚人取為實
大海是一子
汝觀心種子
轉於無種子
起即是生死
是故說種子
因緣不滅法
心如是分別
實無事法體

妄覺者分別
觀諸法實體
實體不生法
我不見幻無
顛倒速如電
非本生如生
無有處及體
不遮緣生滅
遮諸愚癡見
實無識體法
愚癡生分別
三界但是心
即得種類身
得力通自在
現諸一切色
而無心及色
爾時修行者
智慧中觀察
相及事假名
我諸子過是
乾闥婆城幻
無實而見實
如心見諸法
一切法不生
毛道迷分別
初識生分別
識如瀑水起
種種念觀法
如虛空壁中
若有少相觀
若從因緣生
心取於自心
心法體清淨
虛妄取自心
外法無可見

取假名為實
我不遮迷惑
觀是得解脫
說諸法是有
是故說如幻
諸因緣無體
惟有於言語
不遮緣和合
分別因緣生
無事及本識
如死尸惡覺
諸佛子能見
離作有為法
及共相應法
心法如是生
無始心迷惑
得見於無相
不見諸眾生
意取諸動法
無分別修行
毛輪及陽焰
諸法體如是
無如是體相
但見迷惑法
以住於二法
種種熏種子
斷彼則不生
若但心中生
何故而不生
心則從緣生
不得言惟心
無法無因生
虛空中無熏
是故心現生
是故說惟心

本識但是心	意能念境界
能取諸境界	故我說惟心
心常無記法	意二邊取相
取現法是識	彼是善不善
離二種識相	是第一義門
說三乘差別	寂靜無是相
若心住寂靜	及行於佛地
是過去佛說	現未亦如是
初七是心地	寂靜第八地
二地是行處	餘地是我法
自內身清淨	是我自在地
自在究竟處	阿迦尼吒現
如諸火焰等	而出諸光明
種種心可樂	化作於三界
或有先有化	而化作三有
彼處說諸法	是我自在地
諸地無時節	國土轉亦然
過諸心地法	是住寂靜果
實無而謂實	而見於種種
愚人顛倒取	是種種顛倒
如無分別智	有事不相應
以心非諸色	是故無分別
諸禪及無量	及無色三昧
諸相畢竟滅	是故心中無
須陀洹果法	往來及不還
及諸羅漢果	一切心迷惑
空無常剎那	愚分別有為
河種子譬喻	分別剎那義
剎那無分別	離諸所作法
一切法不生	我說剎那義
有無說於生	僧佉等妄說
一切法無說	亦是彼人說
◎有四種記法	一往答反問
分別差別答	默答遮外道
世諦一切有	第一義諦無

而實體無相
見於虛妄法
因於言語生
無事有言語
是即顛倒事
若事顛倒有
依於顛倒事
畢竟定是無
所見諸種種
心見外迷惑
分別無分別
如幻像諸相
是可見人見
聖人不見迷
迷惑即是實
遠離諸迷惑
即是其迷惑
如醫見毛輪
於諸境界中
諸法如毛輪
三界如夢幻
分別可分別
縛可縛及因
無地及諸諦
佛辟支聲聞
人體及五陰
勝人自在作
心遍一切處
以心不善觀
五陰中無我
分別無是法
如愚癡分別
如是見實有
一切法若無
愚癡見如是

是第一義諦
是故說世諦
無如是實體
世諦中實無
可見亦是無
寂靜畢竟無
及見諸法生
即是無體相
熏習煩惱生
現取於前境
是空實相法
如樹葉金色
心無明熏習
中間不見實
以實即中間
若能生諸相
如眼醫不淨
依迷取諸法
愚癡取是法
陽炎水迷惑
修行得解脫
能生於分別
六種解脫因
無國土及化
惟是心分別
諸緣及微塵
惟是心分別
一切處皆心
心性無諸相
我中無五陰
而彼法非無
有諸一切法
一切應見實
無染亦無淨
彼法不如是

迷惑分別相
彼相所有名
名相是分別
若不生彼心
報相佛實體
眾生及菩薩
習氣法化佛
是皆一切從
應化所說法
修多羅廣說
所有佛子說
是皆化佛說
是諸法不生
乾闥婆城幻
種種隨心轉
心生種種生
眾生妄分別
無義惟是心
無始世戲論
諸分別熏修
識無分別義
轉彼是寂靜
觀察義思惟
念真如思惟
分別諸法體
依他力因緣
他力若清淨
轉彼即真如
莫分別分別
分別迷惑法
見外分別境
心分別分別
邪見見外義
觀斟量相應
無諸外境界

是他力分別
是名分別相
因緣事和合
是第一義相
及所化佛相
并十方國土
及作於化佛
阿彌陀國出
及報佛說法
汝應知密意
及於諸如來
非淳熟者說
而彼法非無
如夢化相似
惟心非餘法
心滅種種滅
無物而見物
無分別得脫
依止於煩惱
是故邪見生
真如是智境
是諸聖境界
諸凡夫思惟
諸佛淨思惟
一切法不生
眾生迷分別
離分別相應
離分別是行
分別是無實
取可取不盡
分別是實體
彼法因緣生
無義但是心
能滅取可取
愚癡妄分別

熏習增長心
滅二種分別
生於無法相
名相及分別
正智及真如
依父母和合
如蘇瓶等鼠
辟尸厚泡瘡
業風長四大
五及於五五
諸毛甲遍覆
生如糞中蟲
眼見色起念
分別及專念
口始說言語
諸外道說定
依眾生心定
我乘內證智
如來滅世後
如來滅度後
大慧汝諦聽
於南大國中
名龍樹菩薩
為人說我法
證得歡喜地
智慧觀察法
是故不可說
若因緣生法
因緣中有物
邪見二邪法
一切法名字
以學復更學
若不說諸名
是故作名字
依三種分別

似生於諸法
真如智境界
不思議聖境
實體二種相
是成就實體
阿梨耶意合
共赤白增長
不淨依節畫
如諸果成熟
及有九種孔
如是增長生
如人睡中寤
增長生分別
斷齒脣和合
如鸚鵡弄聲
大乘不決定
邪見不能近
妄覺非境界
誰持為我說
未來當有人
有人持我法
有大德比丘
能破有無見
大乘無上法
往生安樂國
不見實法體
及說亦無體
不得言有無
愚分別有無
我知離我法
無量劫常學
迭共相分別
諸世間迷惑
為除迷惑業
愚癡分別法

依名迷分別
法不滅不生
法無體是體
影像及於幻
火輪乾闥婆
不二真如空
我說無分別
口心境界虛
心墮於二邊
有無墮二邊
遠離諸境界
以離取境界
如聖人境界
有滅住真如
如彼諸法住
法體不如是
愚癡人見鐵
非金而見金
本無言始生
從因緣有無
無始無終法
以世間住相
過去法是有
現在法亦有
轉時及行相
虛妄取中陰
一切佛世尊
因緣即世間
但法緣和合
離諸和合法
鏡及於水中
而見諸鏡像
如獸愛空水
種種似如有
我乘非大乘

及因緣能生
自性如虛空
分別相即體
陽焰與夢響
諸法如是生
實際及法體
成就彼法相
實乃立虛妄
是故立分別
以在心境界
爾時正滅心
彼滅非有無
愚人不能知
智慧者能見
智慧者能見
以諸法無相
分別以為金
外道取法爾
始生後還滅
此說非我教
無始是相住
邪覺者不知
未來法非無
不應言法生
諸大及諸根
若取非覺者
不說因緣生
如乾闥婆城
依此法生法
不滅亦不生
眼及器摩尼
諸影像是無
見諸種種色
如夢石女兒
非聲亦非字

非諦非解脫
而我乘大乘
身如意種種
一體及別體
略說諸法生
不生空是一
不生空是勝
真如空實際
身及意種種
經毘尼毘曇
依名不依義
非外道非佛
從緣成有法
何人成就有
說法生邪見
若人見不生
彼人離有無
眾生分別見
分別是迷惑
虛妄分別法
無因緣分別
無水而取水
愚癡如是見
聖人見清淨
離諸生死法
深快妙方便
我為諸子說
三有是無常
同相及別相
不著一切法
我說緣覺果
分別外實體
見自身迷惑
十地即初地
九地即七地

非寂靜境界
諸三昧自在
自在花莊嚴
因緣中無法
廣說諸法滅
而生空是二
生滅即是空
涅槃與法界
我說異名法
分別我清淨
彼不知無我
非我亦非餘
云何無諸法
從因緣說無
有無妄分別
亦見法不滅
見世間寂靜
可見如兔角
如禽愛陽焰
依彼分別見
無因不應分
如獸妄生愛
聖者無如是
以生三解脫
修行寂靜處
知國土妙事
不為諸小乘
空無我離我
我為聲聞說
離世間獨行
非思量境界
從他力故生
爾時轉諸心
初地即八地
七地即八地

二地即三地
三地即六地
諸法常寂靜
有無法平等
諸法無體相
而能作平等
若不見諸心
爾時滅諸法
愚無始流轉
誑凡夫而轉
依彼因及觀
依於識種子
修得及住持
及夢中所得
夢中所得通
取種類身得
熏種子熏心
愚人不覺知
分別於外物
爾時心悶沒
何故說於生
不可見而見
為於何等人
為於何等人
心體自清淨
意及一切識
阿梨耶出身
意識取境界
自心所見法
如是觀迷惑
修禪者境界
此三不思議
過現及未來
我依世諦說
二乘及外道

四地即五地
寂靜無次第
修行者無法
爾時聖得果
云何於無法
寂寂無分別
內及外動法
已見平等心
取法如懷抱
如因橢出橢
共意取境界
能作於心因
隨種類身得
是通有四種
及於諸佛恩
彼通非實通
似有法生轉
為說生諸法
諸法相成就
不見自迷惑
何故說無見
願必為我說
說何等法有
說何等法無
意起共諸濁
能作熏種子
意出求諸法
迷惑見貪取
外法無外法
常憶念真如
業諸佛大事
是智者境界
涅槃及虛空
真諦無名字
等著於邪見

迷沒於心中
緣覺佛菩提
菩提堅種子
何處為何等
所為為何義
幻心去寂靜
心中迷堅固
生滅相相應
分別惟是意
鏡像水波等
若心及於意
時得如意身
諸緣及陰界
假名及人心
世間如幻夢
諸相實相應
諸聖人內境
迷覆斟量因
離一切戲論
諸法無體相
心住於愚癡
說是諸法者
一二及於二
依時勝微塵
世種子是識
如依壁畫像
如人見於幻
愚癡人依闇
內外諸種種
如是觀修行
熏習中無心
心無差別相
如垢見熏習
◎如帛心亦爾
如物非無物

分別於外法
羅漢見諸佛
及夢中成就
云何為何因
惟願為我說
有無朋黨說
說有幻無幻
相可相有無
共於五種識
從心種子生
而諸識不生
乃至於佛地
是法自體相
如夢如毛輪
見依止得實
離諸斟量因
常觀諸妙行
令世間實解
智不住迷惑
空及常無常
迷惑故分別
非說於無生
忽然自在有
緣分別世間
依止彼因生
知實即是滅
見生死亦爾
縛及解脫生
諸法及因緣
住於寂靜處
心不共熏習
熏習纏於心
意從於識生
依熏習不顯
我說虛空然

阿梨耶身中
意識轉滅已
覺知一切法
斷絕於三世
世法四相應
是二法體相
餘地亦成就
色界及無色
一切心境界
若見諸法生
覺自心迷惑
無生法體相
見諸相如幻
自心虛妄取
為癡無智說
及說於無乘
我法有二種
四種斟量相
形及相勝種
名字及行處
依分別分別
離分別分別
常恒實不變
真如離心法
若無清淨法
以有清淨心
清淨聖境界
是諸法體相
從因生世間
如幻與夢等
煩惱熏種種
眾生見外境
心法常清淨
迷從煩惱起
迷惑即真實

離於有無物
心離於濁法
故我說心佛
離於有無法
諸有悉如幻
七地從心生
二地及佛地
欲界及涅槃
不離於身中
是生迷惑法
是不生諸法
生即著世間
法體相如是
莫分別諸法
三乘與一乘
諸聖人寂靜
相法及於證
立量相應法
見迷惑分別
聖行實清淨
故有分別相
實體聖境界
性事及實體
遠離於分別
亦無有於染
而見有染法
是故無實事
聖人之境界
離於諸分別
見法得解脫
共心相應生
非諸心法體
非是迷惑生
是故心不見
餘處不可得

非陰非餘處
離見能見相
見自心世間
莫見惟心法
住於真如觀
過心境界已
修行住寂靜
不見摩訶衍
依諸願清淨
應觀心境界
智慧觀境界
心境界苦諦
二諦及佛地
得果及涅槃
覺知一切法
眼色及於明
如是等和合
能取可取受
無因分別者
於義中無名
因無因而生
一切法無實
空不空義爾
妄取於實住
一法成五種
五種是魔法
非修行境界
不求有邪法
以作自常法
實諦不可說
依止阿梨耶
依止依心意
依虛虛妄成
如是修行者
分別常無常

觀陰行如實
若見有為法
彼人能離相
莫分別外義
過於心境界
遠離諸寂靜
行者寂靜住
自然云寂靜
智無我寂靜
亦觀智境界
不迷於相中
智境界是集
是般若境界
及於八聖道
得清淨佛智
虛空與心意
識從梨耶生
無名亦無事
若取於覺者
名中義亦爾
莫分別分別
言語亦復然
愚癡見法是
邪見說假名
如實能遠離
超越過有無
是外道之法
亦無相見我
惟從言語生
寂滅見諸法
能轉生意識
能生於轉識
真如是心法
能知心性體
意相及於事

生及與不生
莫分別二法
一義二心生
取一二之法
無說者及說
不見於自心
諸因緣不生
界及五陰無
本無有作業
無除亦無縛
無無記無物
無時無涅槃
無佛無實諦
無顛倒無滅
十二支亦無
離於諸邪見
煩惱業及身
如陽焰及夢
住於心法中
住於心法中
涅槃中無陰
能入惟是心
見他何過失
心非有非無
垢中不見白
如雲蓋虛空
心能作諸業
慧能觀寂靜
心依境界縛
寂靜勝境界
心意及意識
得無分別體
寂靜勝人相
能生於勝義
分別法體有
行者不應取
識從梨耶生
不知如是生
是凡夫境界
不空以見心
故生見羅網
諸根亦如是
無貪無有為
不作非有為
無縛無解脫
無法無非法
法體亦是無
無因亦無果
無滅亦無生
邊無邊亦爾
是故說惟心
作者與果報
乾闥婆城等
而生諸法相
而見於斷常
無我亦無相
解脫不取相
諸眾生見外
由熏習不顯
白中不見垢
是故心不見
智於中分別
得大妙法體
智依覺觀生
慧能於中行
於相中分別
二乘非諸子
諸佛智慧淨
已離諸行相
他力法是無

迷惑取分別 不分別他力
非諸大有色 有色非諸大
夢幻乾闥婆 獸渴愛無水
我有三種慧 得止依聖名
心無法中生 是故心不見
身資生住持 眾生依熏見
依彼分別相 而說於諸法
離二乘相應 慧離現法相
虛妄取法故 聲聞見於法
能入惟是心 如來智無垢
若實及不實 從因緣生法
一二是取見 畢竟能取著
種種諸因緣 如幻無有實
如是相種種 不能成分別
依於煩惱相 諸縛從心生
不知分別法 他力是分別
所有分別體 即是他力法
種種分別見 於他力分別
世諦第一義 第三無因生
分別說相續 斷即聖境界
修行者一事 惟心種種見
彼處無心體 如是分別相
如人眼中醫 分別種種色
醫非色非色 愚見他力爾
如金離塵垢 如水離泥濁
如虛空離雲 如是淨分別
聲聞有三種 應化及願生
離諸貪癡垢 聲聞從法生
菩薩亦三種 諸如來無相
眾生心心中 見佛如來像
分別無如是 他力法體有
見有無二邊 見故見分別
若無分別法 他力云何有
遠離有法體 實有法體生
依止於分別 而見於他力

依名相和合
常無所成就
爾時知清淨
分別有十種
真如是內身
五法是實法
如是修行者
星宿雲形像
諸眾生見心
諸大無自體
若色從大生
如是不生大
若果是四大
實及假名色
夢及乾闥婆
一闍提五種
五乘及非乘
陰有二十四
佛有二十四
度門有百種
諸佛國土一
解脫有三種
我無我六種
離於諸因緣
知內身離垢
生及於不生
一時證次第
無色有八種
緣覺及佛子
無有三世法
作及於業果
佛從來不生
心離於可見
胎生轉法輪
住諸國土中

而生於分別
他力分別生
第一義實體
他力有六種
是故無異相
及三種實相
不壞真如法
似於日月體
可見熏集生
非能見可見
諸大生諸大
大中無四大
因是地水等
幻生作亦爾
獸愛水第五
諸性亦如是
涅槃有六種
色復有八種
佛子有二種
聲聞有三種
而佛亦有一
心慮有四種
可知境四種
亦離邪見過
大乘無上法
有八種九種
立法惟是一
禪差別六種
能取有七種
常無常亦爾
如夢中作事
聲聞佛子爾
亦常如幻法
出家及兜率
可見而不生

去行及眾生	說法及涅槃
實諦國土覺	從因緣生法
世間諸樹林	無我外道行
禪乘阿梨耶	證果不思議
月及星宿性	諸王阿修羅
夜叉乾闥婆	因業而發生
不可思議變	退依熏習緣
斷絕諸變易	時煩惱罪滅
一切諸菩薩	如實修行者
不畜諸財寶	金銀及象馬
牛羊奴婢等	米穀與田宅
不臥穿孔床	不得泥塗地
金銀赤白銅	鉢盂及諸器
修行淨行者	一切不得畜
僑奢耶衣服	一切不得著
欽婆羅袈裟	牛糞草果葉
青赤泥土汁	染壞於白色
石泥及與鐵	珂及於琉璃
如是鉢聽畜	滿足摩陀量
為割截衣故	聽畜四寸刀
刃如半月曲	不得學伎術
如實修行人	不得市販賣
所須倩白衣	及諸優婆塞
常護於諸根	知於如實義
讀誦修多羅	及學諸毘尼
不與白衣雜	修行人如是
空處與塚間	窟中林樹下
尸陀林草中	乃至於露地
如實修行人	應住如是處
三衣常隨身	不畜餘錢財
為身須衣服	他自與聽受
為乞食出行	亦不左右視
視前六尺地	安庠而直進
如蜂採諸花	乞食亦如是
比丘比丘尼	眾中眾所雜

我為佛子說
如實修行者
王小王王子
為求於飲食
死家及生家
比丘雜等眾
寺舍烟不斷
故為人所作
離有無朋黨
行者觀世間
三昧力相應
若不生分別
從微塵勝人
諸因緣和合
分別諸世間
行者如實觀
莫分別三有
離於有無謗
飲食如服藥
一心專恭敬
如實修行者
及諸修多羅
五法體及心
清淨內法身
如是修行者
諸佛大慈悲
去來於六道
發起如實行
日月形體相
虛空火種種
見如是諸相
亦隨聲聞道
遠離如是等
時佛妙光明
摩彼菩薩頂

此是惡命活
不聽此處食
大臣及長者
一切不得往
親家及愛家
修行者不食
常作種種食
行者不應食
能見可見縛
離於生滅法
及諸通自在
不久得如法
緣中莫分別
行者不分別
種種從熏生
三有如幻夢
身資生住持
亦離有無見
身心常正直
佛及諸菩薩
應知諸律相
簡擇諸法相
修行無我相
諸地及佛地
住於大蓮花
如意手摩頂
諸有生厭心
至尸陀林中
及於花海相
修行者見法
取於外道法
及緣覺境界
住於寂靜處
往於諸國土
此摩頂妙相

隨順真如法
有無因法體
謗於有無法
分別無諸因
見種種外法
不捨諸法相
有無是謗法
覺但是內心
轉虛妄分別
惟心無可見
即是中道法
生及於不生
諸法無自體
分別是有法
不覺心分別
覺知自心見
如實知遠離
實知可見心
不生諸分別
離諸外道過
彼智者應取
知此法是佛
若異見諸法
不生現於生
同時如水月
一身及無量
心心體不異
心中但是心
種種色形相
佛及聲聞身
復種種色身
無色界無色
色現為眾生
如幻三昧法
十地心自在

爾時得妙身
離於斷常法
是分別中道
無因是斷見
是人滅中道
恐有斷絕相
如是說中道
不滅於外法
即是中道法
離於心不生
我及諸佛說
有物無物空
莫分別二法
愚分別解脫
離於二取相
時離於二見
不滅分別相
時知分別生
是真如離心
若見生諸法
涅槃而不滅
我說及餘佛
是說外道事
不退常現退
萬億國土見
然火及注雨
故說但是心
心無心而生
所見惟是心
辟支佛身等
但說是內心
色界及地獄
但是心因緣
而身如意生
菩薩轉得彼

自心分別名
依見聞生知
相是他力體
分別是諸相
智慧觀諸法
畢竟無成就
若有成就法
離於有無體
分別二種體
分別見種種
分別是種種
若異分別者
分別是分別
分別說分別
離於二分別
國土佛化身
無涅槃一切
佛三十差別
一切國土器
如分別法相
彼法無種種
法佛是真佛
眾生自種子
依迷惑轉心
真不離分別
實體及受樂
佛眾三十六
如青赤及鹽
新果諸花等
非一亦非異
如是七識種
如大海轉變
阿梨耶亦爾
心意及意識
八無差別相

戲論而搖動
愚癡依相知
彼依名分別
依他力法生
無他力無相
智依何分別
離於有無法
二體云何有
二種體應有
清淨聖境界
分別是他力
是墮外道說
見是因體相
見是因相生
即是成就法
一乘及三乘
空離一切生
別復有十種
依諸眾生心
現見種種法
法佛世間爾
餘者依彼化
見一切佛相
能生於分別
及不離於相
化復作諸化
是諸佛實體
珂乳及石蜜
如月諸光明
如水中洪波
共於心和合
是故波種種
名識亦如是
分別外相義
非能見可見

如大海水波
諸識於心中
心能造諸業
意識能知法
青赤白種種
水波相對法
青赤白種種
愚癡見諸相
心中無是體
若有於可取
身資生住持
眾生識現見
大海水波起
本識如是轉
愚癡無智慧
水波轉相對
如日出世間
如是世尊燈
住於真如法
若說於實法
如海中水波
如自心境界
無一時境界
識能知諸法
五識現見法
如世間畫師
我住於妙法
離分別分別
我諸佛子說
亦如幻種種
說種種亦爾
為一人說法
如人病不同
諸佛為眾生
依外法種子

無有差別相
轉變不可得
意是能分別
五識虛妄見
眾生識現見
牟尼為我說
水波中無是
說於心中轉
離心無外見
應有於能取
說水波相似
水波共相似
如舞轉現見
何故知不取
本識如海波
是故說譬喻
平等照眾生
不為愚說法
何故不說實
心中無實法
如鏡及於夢
等見無前後
是故次第生
意復能分別
寂靜無次第
及畫師弟子
為實修行說
是內身實智
不為於愚人
可見無如是
說亦爾不爾
不為餘人說
醫師處藥別
隨心說諸法
分別說現法

心取他力法
依止心種子
二種轉迷惑
以迷惑不生
六十十八法
自心見外法
若入心分別
依於阿梨耶
愚癡內身入
取星宿毛輪
有為無為常
乾闥婆城幻
無如是見有
我諸根形相
心意及意識
心意及意識
心意及意識
五法自體相
就相有三種
如綵色一種
二種無我心
五種法體相
遠離諸心相
諸法體如是
離於諸法體
身口及意業
如來性清淨
自在淨諸通
種種意生身
內身智離垢
八地及佛地
遠行善慧地
是諸佛之性
依眾生身別
為說七種地

可取是分別
觀取外境界
更無第三因
依何法不生
是故惟說心
見彼離於我
能離諸法相
能生於諸識
心見於外入
如夢中見色
分別無如是
如禽獸愛水
他力法亦爾
我說三種心
離於自體相
離於他體相
無我無二體
是諸佛境界
依於一熏因
壁上見種種
意及諸識相
我性無如是
識離於意相
是我之境界
是諸如來性
彼不作白法
離於諸修行
三昧力莊嚴
是淨如來性
離於諸因相
是諸如來性
法雲與佛地
餘地三乘雜
及為愚癡相
故佛說心地

口身心諸障
八地中妙身
八地及五地
一切諸佛子
生及與不生
實及於不實
此實此非實
緣覺及聲聞
有無有非實
假名及實法
依世諦有法
無實法迷惑
一切法無法
言語及受用
從於言語法
從言語生法
如離壁無畫
本淨識亦爾
如幻心亦爾
識共於五種
說是真法習
是諸佛根本
心迷可見中
身資生住持
心意及意識
二種無我淨
虛妄覺非境
是內身境界
長短等相待
有能成於無
及分別微塵
說但是於心
是中分別空
有無但分別
功德微塵合

七地中無是
如夢瀑水相
學種種伎術
三有中作王
不分空不空
心中無如是
莫分別此實
非為佛子說
亦無有空相
心中一切無
第一義悉無
是諸世諦法
我說於假名
愚癡見是實
是實有境界
見法無如是
亦如影離像
為水波不現
意如狡猾者
分別見如采
所有集作化
餘者應化佛
可見心中無
即阿梨耶現
實體五種法
諸佛如來說
及聲聞亦爾
諸佛如來說
彼此相依生
無能成於有
色體不分別
邪見不能淨
不空亦如是
可說無如是
愚癡分別色

一一微塵無
自心見形相
外無可見法
心如毛輪幻
火輪禽獸愛
常無常及一
無始過所縛
我不說三乘
為攝取眾生
解脫有三種
平等智煩惱
亦如水中木
如是癡聲聞
彼無究竟處
得寂滅三昧
是聲聞之定
離諸隨煩惱
三昧樂境醉
如世間醉人
彼人然後得
如眾沒深泥
如是三昧醉

是故無是義
眾生見外有
是故無是義
夢乾闥婆城
實無而人見
二及於不二
愚癡迷分別
但說於一乘
是故說一乘
亦說法無我
依解脫分別
為波之所漂
為諸相漂蕩
亦復不還生
無量劫不覺
非我諸菩薩
依習煩惱縛
住彼無漏界
酒消然後寤
我佛法身體
身東西動搖
聲聞沒亦爾

入楞伽經卷第九

入楞伽經卷第十

元魏天竺三藏菩提留支譯

總品第十八之二

依諸佛住持	諸願力清淨
受職及三昧	功德及十地
虛空及兔角	及與石女兒
分別法如是	無而說名字
因熏種世間	非有非無處
能見得解脫	解於法無我
實體分別名	他體從因生
我說是成就	諸經常說是
字句名身等	於名身勝法
愚癡人分別	如象沒深泥
天乘及梵乘	及於聲聞乘
如來及緣覺	我說如是乘
諸乘不可盡	有心如是生
心轉滅亦無	無乘及乘者
心分別及識	意及於意識
阿梨耶三有	思惟心異名
命及於煖識	阿梨耶命根
意及於意識	是分別異名
心住持於身	意常覺諸法
識自心境界	共於識分別
我說愛是母	無明以為父
識覺諸境界	是故說名佛
諸使是怨家	眾和合是陰
無於相續體	斷彼名無間
二無我煩惱	及二種無我
不可思議變	無生死名佛
意相應法體	我法是內身
若能如是見	彼不隨妄覺
實無於諸法	如愚癡分別
依虛妄無法	云何得解脫
生滅和合縛	見於有為法
增長於二見	不失因緣法

芭蕉夢幻等
惟是一法實
有貪及與瞋
從愛生諸陰
何等夜證法
於此二中間
內身證於法
彼佛及我身
實有神我物
陰體是實有
各各見分別
得世間自心
諸因及因緣
是四法相應
非有無生法
愚云何分別
有無四句離
爾時轉心識
諸法本不生
諸緣即是果
果中生二種
而二中無果
離於觀可觀
離心惟是心
量實體形相
究竟第一淨
如假名為我
如是陰陰體
平等有四種
無我亦平等
轉諸一切見
不見及不生
無法亦非無
真如離於心
真如空實際

是世間如是
涅槃離意識
及有癡無人
陰有亦如夢
何等夜入滅
我不說一字
我依如是說
無有說勝法
五陰離彼相
彼陰中無我
隨煩惱及使
離苦得解脫
世間如是生
彼不住我教
離有無不生
從因及諸緣
若能見世間
即得無我法
是故因緣生
果中生於有
果中應有二
果中不見物
若見有為法
故我說惟心
離於緣實體
我說如是量
無實法可見
是假名非實
相因及於生
四修行者法
分別可分別
故我說惟心
離於有無體
故我說惟心
涅槃及法界

意生身及心
分別依熏習
眾生心見外
可見無外物
身資生住持
諸聲聞盡智
一切辟支佛
無外諸色相
覺知於自心
愚人不知外
譬喻遮愚人
無因無分別
自心體形相
依分別可別
依止於分別
一一別和合
客二法是二
分別心心法
現生於諸法
因依現和合
依因觀和合
如鏡中見僧
如是依熏心
共分別可別
如外道分別
如人不識繩
不識自心義
而乘於乘體
以分別於乘
依何法何體
不得言彼無
依有故言無
故不得言無
即分別分別
云何見無體

故我說惟心
種種生種種
故我說惟心
見心種種見
故我說惟心
諸佛如來生
無和合而生
自心見外法
愚分別有為
自心種種見
著於四種法
譬喻五種論
能知是點慧
此是分別相
分別於現生
是一種子因
故人心不生
住於二界中
彼體是虛妄
故有十二入
我不說是法
眼瞳見毛輪
愚癡人心見
而生於分別
無如是外相
而取以為蛇
分別於外法
離於一二中
是自心過失
分別不能見
諸法體如是
依無故言有
亦不得言有
此非彼法體
而生於分別

色體無色身
可見是無法
若分別是迷
何法迷眾生
諸法無法體
不見於自心
若分別是無
彼法無異體
若聖有彼法
若聖妄有彼
聖人無迷惑
愚人無信心
如母為諸子
汝取果莫啼
我於諸眾生
令貪種種說
若本無法體
本不生始生
無身亦非生
生滅諸法體
略觀察如是
從因緣生法
說一體二體
世間如幻夢
依言語境界
我依了義說
聲聞及外道
於義不相應
相體及形相
觀於如是法
分別一二多
日月及諸天
聖人見正法
能轉虛妄相
此是解脫印

如瓶及疊等
云何有分別
有為法無始
牟尼為我說
而說惟是心
而起於分別
如愚癡分別
而智不能覺
非凡妄分別
聖愚癡無別
以得心清淨
故分別分別
虛空將果來
兒取種種果
分別種種果
離有無朋黨
非因非從因
亦無其身體
離因緣無處
離因緣處無
有無非餘處
智者莫分別
外道愚癡說
不從因緣生
大乘無上法
而愚癡不覺
依嫉妬說法
以依妄覺說
名是四種法
故生於分別
彼隨梵天縛
是見非我子
以如實修行
亦離於去來
我教諸佛子

離於有無法 亦離去來相
轉種種色識 若滅一切業
不應常無常 無世間生法
於轉時若滅 色離於彼處
離於無過失 業住阿梨耶
色是滅體相 識中有亦爾
色識共和合 而不失諸業
若共彼和合 眾生失諸業
若滅和合業 無縛無涅槃
若共於彼滅 生於世間中
色亦共和合 無差別應有
有別亦無別 但是心分別
諸法無滅體 離有無朋黨
假名因緣法 迭共無差別
如色中無常 迭共生諸法
離於彼此相 分別不可知
無有有何成 如色中無常
若善見分別 即不起他力
是於他力法 亦不起分別
若滅於分別 是滅於我法
於我法中作 亦謗於有無
是諸謗法人 於何時中有
是滅我法輪 不得共彼語
智者不共語 不共比丘法
已滅於分別 妄見離有無
見如毛輪幻 如夢乾闥婆
亦見如陽焰 時見於有無
彼人不覺佛 若有人攝彼
彼人墮二邊 亦壞於餘人
若知寂靜法 是實修行者
離於有無法 應攝取彼人
如有處可出 金銀諸珍寶
無業作種種 而眾生受用
眾生真如性 不由於業有
不見故無業 亦非作業生

諸法無法體
而有於諸法
若法無如是
無有一切法
諸法依心有
生死諸世間
無明愛和合
餘人恒無法
若人法不生
若諸法是無
愚人離於作
愚聖無差別
聖人無法體
五陰及人法
諸因緣及根
無因惟於心
內身真如淨
於未來世有
身披於袈裟
無法因緣有
分別無法體
未來世有人
無因而邪見
從微塵生世
九種物是常
從物生於物
此法異於法
若本無始生
我說於世間
三界諸眾生
狗駝驢無角
眼本無始有
席冠白疊等
於疊中無瓶
一於一中實

如聖人分別
如愚癡分別
如愚癡分別
眾生亦無染
煩惱亦如是
隨於諸根轉
而生於諸身
如愚癡分別
行者不見根
能作世間因
自然應解脫
有無云何成
以修三解脫
有同有異相
我為聲聞說
妙事及諸地
為諸佛子說
謗於我法輪
說有無諸法
是聖人境界
妄覺者分別
噉糠愚癡種
破壞世間人
而微塵無因
邪見如是說
功德生功德
分別是體是
世間應有本
無有於本際
是本無始生
必應生無疑
色及識亦爾
泥團中應生
蒲中亦無疊
何故因不生

即命即是身
此是他說法
我領因緣法
遮彼邪見者
故領外道法
恐諸弟子迷
從勝人生世
為諸弟子說
非實非不實
以無諸因緣
離於有無法
離於生滅法
世間如幻夢
立因緣者見
如禽獸愛水
離於有無法
見三有無因
何等人無事
遠離於心事
若觀於外事
云何心無因
真如惟心有
有及於非有
能取可取法
此是世間心
身資生住持
應有二種心
如刀不自割
如心不自見
非他非因緣
五法及二心
能生及於生
我意無能生
種種形相體
虛空兔角等

是本無始生
我說諸法異
然後遮他法
後說於自法
然後說正法
立於有無法
迦毘羅惡意
諸功德轉變
非從緣即緣
無實法不生
離因亦離緣
自法離可見
離諸因緣法
是故生分別
乾闥婆毛輪
離因及於緣
如是見淨心
但有於內心
不得說惟心
眾生起於心
不得說惟心
何人無聖法
彼不解我法
若心如是生
不應說惟心
若如夢中生
而心無二相
指亦不自指
其事亦如是
分別分別事
寂靜無如是
及二種法相
說法無自相
若生於分別
彼體無應生

若有諸法相
以無外分別
於無始世間
以心無生因
若無因生長
以無因增長
如現在無法
無體體和合
真如空實際
一切諸法生
凡夫墮有無
無因本不生
心見於可見
無始亦無法
若無物能生
云何生無物
此一切無心
乾闥婆夢幻
無生無體相
離於和合法
爾時空無生
夢及毛輪幻
無因而有見
如是和合一
非諸外道見
降伏依無因
若能成無生
說於無因相
云何為何人
何處生於法
生於無因中
若能智者見
說生一切法
為觀諸因緣
為有法有名

應有於外事
離心更無法
無有外諸法
而見於外義
兔角亦應生
云何生分別
如是本亦無
云何心能生
涅槃及法界
是第一義法
分別因及緣
不知於三有
無始因異見
云何見異生
貧人應多財
牟尼為我說
而不無諸法
諸法無因有
空法為我說
是不見諸法
我說無法相
乾闥婆愛水
世間法亦爾
離於可見無
和合無如是
成就於無生
我法輪不滅
外道生怖畏
何處來諸法
無因而生法
而無於二因
爾時轉邪見
無生為無物
爾時轉邪見
為無法無名

而無法不生
名非依於法
聲聞辟支佛
住七地菩薩
轉於因緣法
惟說依於心
無因生諸法
離立於有無
心離於可見
轉於依止法
不失外法體
離一切邪見
如是空無相
非生空空法
諸因緣和合
離於和合法
若離和合法
一體及異體
有無不生法
離於諸因緣
惟是於名字
可生體畢無
離可生無生
我說惟是鎖
而可生法體
彼人無說因
如燈了諸物
若更有別法
無體亦不生
離於鉤鎖法
此是異不生
彼法生不生
若見諸世間
世誰是鉤鎖
無明愛業等

亦非待因緣
而名非無體
外道非境界
彼則無生相
是故遮因義
故我說無生
離分別分別
故我說無生
亦離於二體
故我說無生
亦不取內心
此是無生相
一切應觀察
本不生是空
生及與於滅
不生亦不滅
更無實法體
如外道分別
非實生不生
生及與不生
彼此迭共鎖
差別因緣鎖
是離諸外道
而凡夫不知
離鎖更無別
破滅壞諸鎖
鎖亦應能了
離於鉤鎖體
自性如虛空
愚癡異分別
聖人所得法
不生是無生
即是緣鉤鎖
爾時心得定
是內鉤鎖法

幢泥團輪等
依於他法體
非惟鉤鎖體
若可生法無
彼法迭共生
煖濕動及堅
此鉤鎖無法
如醫師依病
而論無差別
我依眾生身
知諸根及力
煩惱根差別
我惟有一乘
瓶壘冠及角
無因依彼生
而彼是無法
依有因故無
有法對於無
若依少有法
無因見少法
若彼依餘法
如是無窮過
依於色木等
如是依止事
幻師非色等
愚癡見如幻
依止於實事
見時無二法
分別無分別
若分別無法
以分別無法
若不生分別
種種心差別
以無實法故
無外物可見

子四大外法
是從因緣生
不住量阿含
智何法為因
非是諸因緣
愚癡分別法
是故無體相
說治病差別
依病故差別
為說煩惱濁
我為愚法說
我教無差別
清涼八聖道
兔角無是因
而無彼因法
汝不得取無
依無不相應
是共相待法
見於少有法
少法是無因
彼此迭共見
少亦無少體
如幻可見法
人見有種種
非木亦非石
依止於幻身
若見於少事
云何見少事
而非無分別
無縛無解脫
故不生分別
不得說惟心
法中無實法
無解脫世間
愚癡妄分別

如鏡像現心
一切法不生
此一切惟心
愚人說諸法
實體離於心
僧佉毘世師
及於自在天
無體亦無生
諸佛為何說
修行清淨人
諸佛如法說
若一切惟心
去來依何法
如鳥虛空中
不住不觀察
如是諸眾生
自心中去來
見身資生器
云何因現見
身資生住持
無修行者生
分別境界體
知於可見心
若能見分別
名名不相合
此惟是可覺
離於知可知
此惟是可覺
若人異覺知
五法實法本
二種無我法
若見知可知
名名中分別
作名字分別
不見於自心

因熏心迷沒
非有似有生
離於諸分別
從因非智者
聖人心是淨
裸形婆羅門
無實墮邪見
如空幻無垢
佛為何人說
離邪見覺觀
我說亦如是
世間何處住
云何見地中
依止風而去
於地上而去
依分別風動
如空中飛鳥
佛說心如是
惟心為我說
現見依熏生
現見生分別
心依境界生
不復生分別
離於覺所覺
是說有為法
名名不相離
是說有為法
名名中不離
不自覺他覺
及於八種識
攝取於大乘
寂靜見世間
爾時不復生
見彼不復生
是故生分別

四陰無諸相
云何色多種
捨於諸相法
若有異色相
若見如是相
依境根及識
依相有三種
阿梨耶意我
因取於二法
離於彼此法
世間惟心分
不復分別二
不增長分別
離於因及緣
分別但是心
離於諸因緣
見自心種種
不知自心見
無見邪見成
彼何故不有
分別非有無
不知惟心見
無分別分別
遮四種朋黨
此異名字相
彼應異自生
因緣應和合
我遮於常過
是不生不滅
滅相法無法
故無常生有
我攝取眾生
智慧滅邪見
一切諸世俗
依因果邪見

彼則無數法
四大異異相
無諸大及大
何故陰不生
不見諸陰入
故生八種識
寂滅無如是
我所及於智
知彼法即滅
若見不相離
世尊為我說
我及於我所
亦無意識因
非物亦非生
世尊為我說
離能見可見
可見妄分別
不覺異心義
若於智不見
彼人心取有
故不生有心
是故生分別
是滅已無因
若諸法有因
彼人作不成
不爾應因生
以遮因生法
若諸緣無常
愚癡無常見
不見作於因
云何人不見
依持戒降伏
依解脫增長
外道妄語說
自法不能立

但成自立法
說諸弟子眾
惟心可見無
離可取能取
但有心動轉
不復起轉生
來者是事生
如實知去來
常無常及作
如是等一切
天人阿修羅
眾生去彼處
上中下業因
善護諸善法
佛說念念生
為比丘眾說
心不至第二
我為弟子說
色色分別有
分別即是人
我說於念法
離於取色相
因緣從緣生
依於二法生
因緣從緣生
從常生於果
無異於外道
佛及諸佛說
此一尋身中
滅及於道諦
取三為實者
世間出世法
我領於他法
為遮彼邪見
說過無定法

離於因緣果
離於世俗法
心見於二種
亦離於斷常
皆是世俗法
見世是自心
去者是事滅
不復生分別
亦不作彼此
是皆世俗法
畜生鬼夜摩
我說於六道
能生於彼處
得勝處解脫
生死及於退
何意為我說
已滅壞不續
念展轉生滅
生及滅即已
離分別無人
依彼我說竟
不生亦不滅
無明真如等
真如無是體
若爾無異法
果即是因緣
因果共相雜
大牟尼無異
苦諦及集諦
我為諸弟子
取可取邪見
凡夫人分別
是故說三法
莫分別實體
亦復無心生

實亦不二取	真如無二種
無明及愛業	識等從邪生
無窮過不作	作中不生有
諸法四種滅	無智者所說
分別二種生	有物無有物
離於四種法	亦離四種見
二種生分別	見者更不生
諸法本不生	起於智差別
現生於諸法	平等莫分別
願大牟尼尊	為我及一切
如法相應說	離二種二見
我離於邪見	及諸餘菩薩
常不見有無	以不見彼法
離外道和雜	離聲聞緣覺
佛證法諸聖	為我說不失
顛倒因緣因	無生及一切
異名諸迷惑	智者所遠離
譬如雲雨樓	宮閣及於虹
陽焰毛輪幻	有無從心生
諸外道分別	世間自因生
不生真如法	及與實際空
是諸異法名	莫分別無物
於色上種種	莫分別無法
如世間 . 手 . 瓜 . 自在 . 能 . 破物	
如是一切法	莫分別無法
離色空不異	亦無生法體
莫分別無異	分別著邪見
分別可分別	攝取於諸事
長短方圓等	是攝分別相
分別是心法	可分別是意
若能如法知	離能相可相
外道說不生	及取於我法
分別如是相	此二見無差
何意如是說	若能如是知
彼人入於量	能解我說法

因見是沈沒
知是二種義
諸法無有生
無因不相當
無因亦無生
離有無無法
生及於不生
說無因無生
自然無作者
方便諸願等
若諸法是無
離可取能取
從物見異物
諸法不生化
實有而不知
牟尼諸法中
離諸外道過
生及與不生
離有及於無
地及於次第
世間墮二邊
無生無生等
我無三世法
有二畢有過
諸法空剎那
說邪法覆心
生及與不生
云何何等法
色具足和合
聚於外色相
知於彼法者
隨順聖人性
離於一切大
心虛妄觀大
莫分別可別

無生是不依
故我說無生
牟尼為我說
無有有法雜
異因見外道
是故說惟心
離法是邪見
說有是著因
作者是邪見
是見為我說
云何生三世
不生亦不滅
依彼法生心
云何為我說
是故我說法
前後自相違
離於顛倒因
大師為我說
不失於因果
為說一無相
為諸見迷惑
不知寂滅因
我亦不說法
諸佛二清淨
無體亦不生
分別非如來
惟願為我說
離於境界生
從於戲論集
從分別而生
是如實解義
而心不復生
生法不相應
觀如是無生
智者不分別

分別於分別
立於無生法
從幻等因生
見心如鏡像
似義而無義
如鏡中色像
可見無非無
乾闥婆幻等
如是諸法體
分別似如人
說我及於法
相違及無因
自成及佛力
時攝及於滅
是四種無常
愚癡墮二邊
不知解脫因
譬如愚癡人
如是樂名字
諸大各異相
而諸大和合
火能燒諸色
風能動諸色
色陰及於識
是諸陰異名
心心數差別
四大彼此別
依青等有白
依因果可生
能作可作作
如是等一切
心意及餘六
離於一異體
僧佉毘世師
墮有無朋黨

是二無涅槃
如幻不見法
所立諸法破
無始熏習因
觀諸法亦爾
離於一二相
諸相亦如是
依於因緣觀
生非不生法
二種相而現
而愚人不知
聲聞諸羅漢
是五種聲聞
第一離第一
愚無智分別
功德及微塵
以著有無法
取指即是月
不知我實法
無色體相生
無大無依大
水能爛諸物
云何大相生
是法二無五
我說如帝釋
現轉諸法生
色心非從依
依白有青等
空有及於無
寒熱見等見
妄覺不能成
諸識共和合
生死虛妄生
裸形自在天
離於寂靜義

形相貌勝生
是外道說生
餘者無處生
愚癡而不覺
生共心相應
清淨實相法
業及於色相
眾生無因體
佛說法無我
說無我是斷
心有四種住
內外諸法相
妄覺者計有
如是無色生
自然應解脫
是外道無疑
若彼處無色
彼無非立法
識從種子生
八種色一分
色不住於時
是故如來說
若不見色體
若智不生者
即生時即滅
一時亦不念
諸根及境界
愚癡聞名取
第六無依止
不善知於我
愚於有無法
有為無為我
一中有施法
共心中一體
若施是心者

四大生非塵
四大及四塵
外道分別因
以依有無黨
死不共相應
共智相應住
五陰境界因
無色界不住
無色同外道
識亦不應生
無色云何住
而識不能行
中陰有五陰
有而是無色
無眾生及識
妄覺不能知
是故見無色
非乘無乘者
共諸根和合
於念時不取
根不共根住
諸根念不住
識云何分別
云何生世間
佛不如是說
虛妄分別取
愚癡非智者
聖人如實知
以無因可取
離於有法過
覺者離實智
愚癡不能知
異中亦如是
意識能覺知
心數是名字

云何離能取
共因依止見
如火如是說
如火一時間
如是我依因
生及與不生
妄覺者立我
迷於識稠林
妄覺東西走
內身修實行
如來藏佛境
可取及能取
若能知於相
外道說意識
共於我相應
若如實知法
修行於見道
心自性清淨
是法依眾生
如金及與色
陶冶人能見
非人亦非陰
無漏常世尊
心自性清淨
共五陰相應
心自性清淨
彼能作諸業
意等客塵法
彼依煩惱染
如依離於垢
有而不可見
如琴及^阿鼓
陰中我亦爾
地中諸寶藏
陰中我亦爾

分別於一異
業．生．作業等
相似相似法
可燒能燒異
妄覺何不爾
而心常清淨
何故不說喻
離於真實法
覓神我亦爾
我是清淨相
妄覺非境界
差別五陰我
爾時生真智
阿梨耶藏體
我法說不爾
實諦得解脫
斷煩惱清淨
如來淨法身
離於邊無邊
石性與真金
眾生於陰爾
佛是無漏智
是故我歸依
煩惱及意作
說中勝者說
意等是因緣
故彼二種染
煩惱我清淨
如垢依清淨
亦如金離垢
我離過亦爾
種種美妙聲
愚癡覓一異
及與清淨水
實有不可見

心及心數法
陰中我亦爾
如女人胎藏
我於五陰中
如香藥重擔
陰中我亦爾
一切諸法中
陰中我亦爾
諸地及自在
無上妙諸法
及諸勝境界
而此諸法等
有人破壞言
智者應答言
說無真如我
作比丘業者
是人立有無
破壞諸佛法
離諸外道過
令我見熾然
如石蜜菹桃
彼處所有味
取於五種中
愚癡人不見
明等諸譬喻
何處何因緣
諸法異體相
無因亦無生
實行者見心
可見從見生
我姓迦旃延
為眾生說法
是過去行路
三千修多羅
欲界及無色
功德陰和合
無智不能見
雖有而不見
無智故不見
火及於諸薪
無智不能見
無常及與空
無智有不見
通及於受位
及餘諸三昧
若陰中無我
一切亦應無
若有應示我
汝心應示我
惟是虛妄說
不應共和合
墮於二朋黨
彼不住我法
焚燒無我見
如劫盡火炎
乳酪蘇油等
不嘗者不知
五陰我亦爾
智見得解脫
心法不可見
和合不可見
一心不能取
虛妄覺者過
心中不見心
能見何因生
首陀會天出
趣於涅槃城
我及彼諸佛
說於涅槃法
佛不彼成佛

色界中上天
境界非縛因
依智斷煩惱
有我有幻等
愚不見如是
以有作不作
一切法不生
諸因不能生
彼二不能生
先後及一時
虛空瓶弟子
佛非有為作
是轉輪功德
諸佛是智相
內身是智見
聾瞎盲及啞
是等一切人
廣大勝妙體
出家或一二
毘耶娑迦那
迦毘羅釋迦
未來世當有
我滅後百年
及於般荼婆
然後復更有
次毛釐掘多
次有刀劍亂
次於末世世
如是等過未
日火共和合
復成妙世界
四姓及國王
供養大會施
話笑本如是
子註復重作

離欲成菩提
因境界是縛
修行者利劍
法有無云何
云何有無我
無因而轉生
愚癡不覺知
諸緣亦不作
云何分別緣
妄覺者說因
一切諸物生
諸相相莊嚴
非諸佛得名
離諸邪見過
離諸一切過
老少懷惡人
名無梵行者
是轉輪王相
餘者是放逸
及於梨沙婆
我入涅槃後
如是等出世
毘耶娑圍陀
鳩羅婆失羅
及於毛釐等
次有無道王
次刀劍末世
無法無修行
如輪轉世間
焚燒於欲界
彼器世間生
諸仙人及法
時法還如本
長行及子註
種種說無量

如是我聞等
不知真實法
衣裳如法染
清泥牛糞等
諸香塗身衣
流通我法輪
不澆水不飲
依時行乞食
生於妙天境
諸寶相成就
依法修行者
多時而受用
正時及三災
我及餘正時
釋種悉達他
如是等外道
如是我聞等
曾有如是事
八臂那羅延
說如是等言
我母名善才
我姓迦旃延
生於瞻波城
父名為月護
出家修實行
授記入涅槃
大慧與法勝
彌佉無弟子
迦葉拘留孫
離於諸煩惱
過彼正法後
於彼成正覺
無二三災中
諸佛不出世
無人奪有相
迷沒諸世間
何者為是非
擣治令潔淨
壞色而受用
離於外道相
是諸如來相
腰繩及內衣
離於下賤家
及人中勝處
天人中自在
生天四天下
依多貪還滅
及於二惡世
釋迦末世時
八臂及自在
我滅出於世
釋迦師子說
毘耶娑說是
及摩醯首羅
我化作世間
父名梵天王
離於諸煩惱
我父及祖父
從於月種生
說於千種句
付慧轉法輪
勝與彌佉梨
於後時法滅
拘那含及我
一切名正時
有佛名如意
為人說五法
過末世亦爾
正時出於世
衣裳不割裁

納衣碎破雜
二寸或三寸
若不如是者
常滅貪欲火
日夜六時中
如放箭石木
放一還下一
一中無多種
如風取一切
若一能作多
不爾一切失
如燈及種子
一能生於多
如麻不生豆
小麥等種子
波尼出聲論
末世有梵藏
迦旃延作經
浮稠迦天文
婆梨說世福
能護於諸法
彌迦摩修羅
迷惑及王論
悉達他釋種
口力及黠慧
阿示那三掘
我住阿蘭若
汝當未來世
能說真解脫
梵天共梵眾
鹿皮等施我
諸雜間錯衣
帝釋四天王
說無生及因
欲成於不生

如孔雀畫色
間錯而補納
愚人所貪奪
智水常洗浴
如實修行法
勢極則還下
善不善亦爾
以相無如是
如田地被燒
一切無作有
是妄覺者法
云何多相似
是妄覺者法
稻不生麩麥
云何一生多
阿叉波太白
說於世俗論
夜婆伽亦爾
是後末世論
世人依福德
王婆離施地
阿舒羅等說
末世諸仙現
浮單陀五角
我滅後出世
彌佉羅澡罐
梵天施與我
名大離塵垢
是諸牟尼尊
及餘諸天眾
還沒自在天
及為乞食鉢
閑處施與我
生及與不生
是但說言語

若無明等因 能生於諸心
未生於色時 中間云何住
即時滅於心 而更生餘心
色不一念住 觀何法能生
依於何因緣 心是顛倒因
彼不能成法 云何知生滅
修行者合定 金安闍那性
光音天宮殿 世間法不壞
住於所證法 是諸一切佛
如來等智慧 比丘證於法
及餘所證法 彼法常不壞
云何虛妄見 諸法念不住
乾闥婆幻色 何故念不住
諸色無四大 諸大何所為
因無明有心 無始世界習
依生滅和合 妄覺者分別
僧佉有二種 從勝及轉變
勝中有於果 果復成就果
勝是大體相 說功德差別
因果二種法 於轉變中無
如水鏡清淨 諸塵土不染
真如如是淨 依止於眾生
如興求及葱 女人懷胎藏
鹽及鹽中味 種子云何有
異體不異體 二體離二法
有法無因緣 非無於有為
如馬中無牛 陰中我亦爾
說有為無為 是法無可說
惡見量阿含 依邪覺垢染
不覺說有我 非因不離因
五陰中無我 取我是過失
一中及異中 妄覺者不覺
水鏡及眼中 如見鏡中像
遠離於一異 陰中我亦爾
可觀及能觀 禪道見眾生

觀察是三法
即滅於知見
諸法轉變相
涅槃離有無
遠離生滅法
離能見可見
離諸外道說
依內身邪見
諸天及地獄
無有中陰法
胎卵濕化等
眾生身種種
離量及阿含
諸外道浪言
先觀察於我
不知有說有
般若離肉眼
離於有為陰
住好惡色中
妙體住有為
在於六趣中
我過於人道
而無生我心
如河燈種子
而識未生時
離於闇無識
三世及無世
是諸佛境界
行中不可說
取於諸行中
依此法生此
諸緣不可見
依風火能燒
風能吹動火
愚者不分別

離於邪見法
如孔中見空
愚人妄分別
住如實見處
亦離有無體
觀察轉變法
離名相形體
觀察轉變法
觸及於逼惱
云何依識生
生於中陰中
應觀於去來
能生煩惱種
智慧者莫取
後觀於因緣
故石女兒勝
妙眼見眾生
妙身體眾生
出離縛解脫
能見妙法身
妄覺非境界
非餘妄覺者
何因如是生
何不如是說
未有無明等
云何相續生
第五不可說
妄覺者觀行
以離智行中
智離於行法
現見是無因
離於無作者
因風動能生
風還能滅火
云何生眾生

說有為無為
云何成彼法
彼此增長力
云何而生火
眾生是誰作
能作陰入軀
如常無我義
二法常清淨
火不能成彼
心眾生涅槃
無始等過染
外道邪見垢
依意意識覆
彼人見如實
捨譬喻稠林
知能知差別
朦鈍人不覺
譬如栴檀鼓
如栴檀沈水
愚人不覺知
中後不受食
離口等諸過
此是如法行
依於法能信
不著世間物
彼人取真金
癡有無因緣
一切煩惱垢
爾時不復生
諸如來身手
外道迷因果
及無因有物
受於果轉變
意從本識生
一切識從本

離於依所依
風火愚分別
彼此法不及
惟言語無義
而分別如火
意等因能生
共心常轉生
離於諸因果
妄覺者不知
自性體清淨
如虛空無差
如白象床城
大等能清淨
見已破煩惱
彼人取聖境
彼分別異體
復言不可說
愚人作異說
諸佛智亦爾
以依虛妄見
以鉢依量取
噉於清淨食
不能知相應
莫分別邪行
能取於正義
能然於法燈
邪見網分別
離於貪瞋恚
以無一切染
而授於佛位
餘者迷因緣
斷見無聖人
識及於意識
識從於意生
能生如海波

一切從熏因 隨因緣而生
念差別鉤鎖 縛自心取境
似於形體相 意眼等識生
無始來過縛 依熏生取境
外見心諸法 遮諸外道見
依彼更生餘 及依彼觀生
是故生邪見 及世間生死
諸法如夢幻 如乾闥婆城
陽焰水中月 觀察是自心
行差非真如 正智幻三昧
依首楞嚴定 及餘諸三昧
入於初地得 諸通及三昧
智及如意身 受位入佛地
爾時心不生 以見世虛妄
得觀地餘地 及得於佛地
轉於依止身 如諸色摩尼
亦如水中月 作諸眾生業
離有無朋黨 離二及不二
出於二乘地 及出第七地
內身見諸法 地地中清淨
離外道外物 爾時說大乘
轉於分別識 離於變易滅
如兔角摩尼 得解脫者說
如依結相應 依法亦如是
依相應相應 莫分別於異
眼識業及受 無明及正見
眼色及於意 意識染如是
佛說此妙經 聖者大慧士
菩薩摩訶薩 羅婆那大王
叔迦婆羅那 甕耳等羅叉
天龍夜叉等 乾闥婆修羅
諸天比丘僧 大歡喜奉行

入楞伽經卷第十